



أحمد حلمي

تم التلحين الموسيقي بواسطة :



جزء من المكتبة الكبيرة على موقع www.Biblio-Med.org

تحت معايير الكتاب في قسم المعايير التابع لمجلة الإبتمانة

تم المسح الضوئي بواسطة:



www.arabicbooks.com

Arabic.Books

تفف نفسك بالكتب الفيما

© 2010 Arabic Books - All rights reserved - www.arabicbooks.com

حرف

جميع حقوق المؤلف المادية عن هذا الكتاب
يتم التبرع بها لجمعية «ألوان وأوتار»

٢٨ حرف

أحمد حلمي

تصميم الغلاف: محمد صالح شحاته (Shadows)

الطبعة الأولى ٢٠١٢

الطبعة الثانية ٢٠١٢

تصنيف الكتاب: مقالات

© دار الشروق

٨ شارع سبويه المصري

مدينة نصر - القاهرة - مصر

تلفون: ٢٤٠٢٣٣٩٩

www.shorouk.com

رقم الإبداع ٢٠١٢/١٦٨٢

ISBN 978-977-09-3099-1

جامعة
المنوفية

إهداء

أبي.. أين أنت؟

هل تراني كما أراك دوما في منامي؟

رحمك الله..

أحمد حلمي

المحتويات

٩	مش مقدمة
١١	ماليش في الكورة
١٥	٢٨ حرف
١٩	كيس السعادة
٢٣	أنا وأخويا وميكى ماوسن
٢٩	كابينة خمسة
٣٥	السقيط
٤١	غروب الشمس
٤٧	قميص أبيض - ١ / ١ / ١
٥٣	جرس الفسحة
٦١	سنة ١٩٠٠ حاجة و ٨٠
٦٩	عسل أبيض
٧٥	كان نفسي أطلع عربيجي
٨١	ماتيجوا نقرأ الفاتحة
٨٧	عيد ميلادي

٩٣	جواب
٩٩	مجرد سؤال
١٠٥	وقت إضافي
١١١	عصيدة عمصاء
١٢١	أبطال البطالة
١٢٧	زغروطة وحشة
١٣٣	مكرونة باشاميل
١٤١	وزير التنقية والتقليم
١٤٧	خليك لئيم
١٥٥	اعتذار مؤقت

مشن مقدمة

قرأت العديد من الكتب.. لم أقرأ يوما مقدماتها.. ولا أعرف السبب.. ربما لأنني لا أحب المقدمات وأفضل الدخول في صلب الموضوع؛ لذلك، ويسبب عدم حبي للمقدمات فليس هناك مقدمة لما سأكتب.. علما بأن ما كتبته الآن قيل لي إنه بمثابة مقدمة، فلتكن كما قالوا.. «مقدمة».

ربما ما تقرأونه يكون خياليا من وحي خيالي، وربما يكون من الخيال أنه بالفعل حدث. سأبدأ هذا الكتاب المتواضع بمقالة وحيدة تم نشرها في جريدة الشروق اليومية في شهر نوفمبر ٢٠٠٩. هذه المقالة بعنوان «ماليش في الكورة» وهي لها وضع خاص في قلبي، فهي مقالتي البكرية وأول خلفتي، كانت لي سندًا قويا في الارتكاز عليها لتكملا رغبتي في خلفة غيرها من أخواتها البنات والصبيان من المقالات التي نُشرت في جريدة الدستور الأسبوعي. كما أحب أن أدين بالشكر لأناس شجعوني على الاستمرار في الكتابة بكلمات لم يكن مطلوبا منهم قولها، كلمات أتذكرها جيدا ولن

أنسها حتى ولو نسوها هم. أشكر السيناريست تامر حبيب، والكاتب والسيناريست بلال فضل، والناقد طارق الشناوي، والكاتب الصحفي أحمد المسلماني، وإبراهيم عيسى، ومجدى الجلاد، ودعاة سلطان، والدكتور مصطفى الفقي، وعماد (واحد صاحبى ماتعرفهوش)، وزوجتي الحبيبة ومراتي المخلصة.

ماليش في الكورة

أنا ماليش في الكورة، وآخر حاجة كنت أتوقعها إني أكتب مقال عن الكورة. صحيح الجرأة مطلوبة، بس مش للدرجة دي.. أتمنى أن يكون اللي هاعمله ده، جراءة مش بجاحة. أنا فاكر إني مرة لعبت ماتش وأنا صغير، بس أصحابي علشان كانوا مقدرين موقفي إني «ماليش فيها»، فكانوا بيخلوني ألعب مع الفرقتين في نفس الوقت وفي نفس الماتش، أول ما الكورة تيجي عندي أحطها في أقرب جون جنبي.. جون مين بقى مش مهم. وبالرغم من كل التسهيلات دي برضه ماكتتش بعجيب أجوان، والمرة الوحيدة اللي ممكن أكون جبت فيها جون، ماحسبهوش! كانوا بيلاعبوني علشان يريحوني. عمر ما كان من اهتماماتي إني أشتري كورة مثلا. جايز لأن كان في واحد من أصحابي مرة أخذ الكورة بتاعتته من نص الماتش وروح والفرقتين والجمهور شتموه، فخفت أشتري كورة لحسن مرة اضطر أروح، فيشتموني ولو سبّلهم الكورة وروحت من غيرها، أكيد هاتهزا وأتشتم في البيت من أبويا. يعني في الحالتين هاتهزا.. طب وعلى إيه؟ مش شاري كورة، بس اشتريت منفاخ، علشان أبقى أنفخ لهم الكورة

بتاعتكم لما تفسي.. أنفخ أحسن ما اتنفح، لحد ما جه ماتش كل الناس
قالت عليه مهم، وده كان سنة ١٩٨٩ وأنا الوحيد اللي ماعرفتش مهم
ليه! ولما سالت، قالولي ده ماتش مصر والجزائر للدخول في كأس
العالم. فرحت جداً علشان الشوارع هاتبقى فاضية وممكن أنزل اعمل
كام مشوار بعيد عن الزحمة، ونزلت فعلاً، بس ماعرفتش أخلص ولا
مشوار، لأن كل اللي كنت رايح لهم كانوا بيترجوا على الماتش.
تقريباً أنا المجنون الوحيد في مصر اللي كنت ماشي لوحدي في
الشارع. قعدت على قهوة في شارع التحرير أشرب شاي وكانوا كل
زبائن القهوة باصين جوه القهوة في اتجاه التلفزيون، ماعدا أنا، أنا
الوحيد اللي كنت باصص ناحية الشارع الفاضي، كأني مجنون قاعد
على القهوة. بقالي ربع ساعة طالب الشاي وما جاش.. لفيت رقبتي
وخطفت نظرة جوة القهوة لاقيت الكل متسمِّر في كرسيه، حتى
القهوجي شايل الصينية عليها كباية الشاي بتاعتني ومتسمِّر في مكانه،
النظرة اللي خطفتها للقهوة، صادفت أنها كانت في نفس زمن هجمة
في الماتش، كان بيها جمها لاعب مش عارف اسمه.. بس فجأة كده
ومن غير سبب، طالت نظرتي، ودق قلبي بخوف مش عارف سببه
ومرت دقائق في دقائق، ورقبتي في نفس اتجاهها، وقلبي عمال يدق
 زي قلوب كل الزبائن.. لحد ما جه الجنون واتحول الخوف اللي جوايا
لرغفة اتكسفت منها، بس لما لاقيت القهوة كلها رغرت، رحت
مرغبي وراح الكسوف من عيني وزادت رغرتها. حضنت ناس ما
أعرفهمش، وبوست ناس عمري ما كنت أفكِّر أبوسهم، وأخيراً
القهوجي اتحولت كل تقسيمات وشه القلقانة لا بتسامة كشفت عن
ضرس العقل المسوس في بقه، وأخيراً اتحرَّك وجابلي الشاي اللي

اكتشفت إنه ساقع جدا بعد ما شربته وما حاسبتش عليه.. مش لأنه ساقع أو لأنني زوغت من الحساب.. لأن القهوجي مارضيش ياخد حسابه. اكتشفت إني ما عرفتش أنهى النظرة اللي خطفتها جوة القهوة واللي كان زمنها زمان الماش، وحسيت إني رقبي وجعنى من كتر ما طالت نظرتى. بس وجع له معنى.. وجع الخوف اللي بيحلى الفوز، وعرفت يومها إني جايز ما كونش كروي، بس أكيد مصرى ما عندوش أي تردد في إن رقبته تتكسر علشان مصر تكسب. وبعد عشرين سنة وفي سنة ٢٠٠٩، مصر والجزائر تاني.. وكل حاجة زي ما هي.. القهوة زي ما هي.. لا بقت محل موبایلات، ولا فيديو جيم، والقهوجي شعبان زي ما هو وضرس العقل بتاعه زي ما هو، لا خلعله ولا حتى حشا، وشارع التحرير زي ما هو لا طال ولا قصر، ومصر ألم الدنيا غابت الجزائر.. فاضل بس إن رقبتي توجعني.. وهو ده اللي أنا بعمله دلو قتي.. باكتب المقال وأنا باصص ورأيا.. مصر هاتكسب!

٢٨ حرف

أ- أبدأ بسم الله الرحمن الرحيم كتابة مقال أسبوعي..

ب- بداية من النهار ده.. اللي هو

ت- تقريبا كل يوم أربع..

ث- ثابت من كل أسبوع..

ج- جايز أكون

ح- حابب موضوع الكتابة ده.. أو جايز أكون

خ- خايف.. أصلني عملت لنفسي امتحان زي مانتو شاييفين،
امتحان حروف أبدأ بيها الكلام.. وأشوف ياترى الكلام ها يكون
زي العجينة بين إيديا ولا ها يكون زي الصخر اللي بيكسره مسجون
محكوم عليه بالإعدام وأصرف نظر عن موضوع الكتابة ده خالص..

د- ده اللي هاعرفه دلوقتي لما أوصل لحرف «الذال».

أصله حرف صعب لما تبتدي بيها الكلام.. فمن أجل

ذ - ذلك، عملت الامتحان اللي واضح إنني عديت من أصعب حاجة فيه وهو الحرف اللي فات وآدinya داخل على الحرف اللي بعده..

ر - رابعا.. على اعتبار أن ما فات كان أولاً وثانياً وثالثاً..

ز - زي مانتو شاييفين بحاول أنجح نفسي في الامتحان.. أصللي حابب أكتب.. ومش عارف هاكتب في إيه!!

س - سياسة!! جايز..

ش - شماتة.. مستحيل..

ص - صدق.. أكيد..

ض - ضروري هالاقي

ط - طريق.. وبالرغم من إنني كنت

ظ - ظانن إن الموضوع سهل، أو إن الامتحان سهل وده مش باین.. إلا إن أنا لستة

ع - على إصراري في الكتابة حتى آخر حرف.. رغم خوفي من بعض الحروف..

غ - غموما (أقصد عموما.. معلش عادوهالي لصعوبة إيجاد الكلمة)

.. مانا برضه مش لازم أجيب مية

ف - في المية في الامتحان اللي عملته لنفسي ده..

ق - قد اقتربت من النهاية. ولم أفقد الأمل، ولكنني وجدت أن

كـ- كتابة مقال

لـ- ليس بالشيء السهل أو البسيط.. ده ربما يكون

مـ- مستحيل.. المهم..

نـ- نرجع مرة تانية للبي باكتبه.. حاسس إنني خدت قراري
خلاص.. مش هاكتب.. الامتحان حقيقي صعب.. أصللي مش
عارف..

هـ- هاكتب إيه!

وـ- ولهذا..

يـ- يؤسفني أن أقول لكم كده.. لكن الـ... الـ.. إيه ده.. أنا وصلت
للحرف الأخير.. أنا خلصت الـ ٢٨ حرف.. أنا عديت
من الامتحان.. أنا هاكتب.. هاكتب.. هاكتب.. هاكتب!

كيس السعادة (*)

والآن ماذا أكتب؟ أو بمعنى أدق.. بماذا أبدأ؟

بالرغم من أن عدد الكلمات العربية آلاف مؤلفة وليس لها حصر، إلا أنها من أصل ٢٨ حرف.. أي كلمة عربية هاتقولها أو عايز تقولها أو لستَ مافكرتش تقولها أو حتى هاتخترعها لازم تكون من أصل الـ ٢٨ حرف.. سواء بقى كانت كلمة شكر أو شتيمة أو كلام صحيح أو مغلوط، كذب أو صدق، كره أو حب، شرف أو خيانة، علم.. جهل.. فوز أو خسارة، حرب أو سلام، مع أو ضد.. فوق أو تحت، نار أو جنة، شباب أو شيخوخة، كل الكلام كل الكلام لازم يكون من أصل الـ ٢٨ حرف.

لكني سأبدأ بحروف ثلاثة، لو اجتمعت لكونت أجمل كلمة محببة إلى قلبي وإلى قلب كل مصري. سأختار من بين الحروف الثمانية والعشرين ثلاثة أحرف (الميم - الصاد - الراء).. مصر.

(*) تم نشر هذه المقالة بتاريخ: ٢٥ من نوفمبر ٢٠٠٩.

قالت لي أمي ذات يوم إنني ولدت في كيس بلاستيكي، وعندما سألت متخصصاً عن هذا الأمر فقال لي: إن من يولدون في مثل هذه الأكياس يتمتعون بحظ وسعادة في حياتهم، ومن هنا بدأت أنساب كل الأمور السعيدة في حياتي إلى هذا الكيس الذي خلقني الله فيه، ونزلت به من رحم أمي.. مثل فرحتي بعجلتي الجديدة التي اشتراها لي أبي، أو سعادتي بفيلم أبيض وأسود أشاهده في اليوم المفتوح يوم الأحد لعبد الحليم حافظ، وعندما كان يحدث شيء غير سعيد في حياتي مثل سقوطه عدة سنوات في الثانوية العامة، فكنت أقول: ربما كان الكيس مخروماً أو شيئاً من هذا القبيل، وعندما كانت تتزايد لحظات الحزن، كنت أظن أن أمي كذبت عليّ، وأنني لم أولد في كيس السعادة، وتروح الأيام وتتأتي.. بين أيام سعيدة وأخرى حزينة، ويظل اعتقادي بهذا الكيس يتارجح.. هل هو جالب للسعادة أم لا؟ هل كان له وجود أم لا؟ حتى أقسمت لي أمي إنني ولدت به، فجلست أفك ملياً.. ربما تكون هذه السعادة البسيطة ليست هي المقصودة، وأنه ربما يكون المقصود سعادة أكثر عمقاً.. حتى أدركت وعرفت وتأكدت.. أن السعادة الحقيقية التي ظللت أبحث عنها سنوات طويلة هي أنني «مصري».. سعادتي هي كوني مصرياً.. أعيش بروح مصرية ليس لها مثيل.. أحب المصريين، كل المصريين. هنا أدركت عظمة ما قاله مصطفى كامل: «لو لم أكن مصرياً لوددت أن أكون مصرياً»، ولو سمحتوالي أن أحرف في بعض كلمات المقوله لأقول: «لو لم أكن مصرياً لما وددت أن أكون موجوداً».. هذا الكيس جلب لي السعادة، وجعلني مصرياً.. أحب الأسود لأنه كان الظلام الذي عشته في رحم أمي المصرية، أحب الأبيض لأنه النور الذي رأيته في هذا الوطن،

وأحب الأحمر لون دمي، الذي لا أتردّد أن يراق كله فداءً لحبة رمل في بلدي.. أحب الميم لأننا مصريون، والصاد لأننا صابرون، والراء لأننا راضيون.. نعم.. نحن مصريون صابرون راضون.

كم أكون مشفقاً على هؤلاء الذين لا يرون جمال المصريين، وإن كنت لا تعرف من هم المصريون، دعني أخبرك. ليس عن تاريخهم الذي يملاً آلاف الكتب، ولا عن حضارتهم التي تمتد إلى آلاف السنين، بل عن صفاتهم. دعني أخبرك عن نفوسهم وأرواحهم التي تشبه الماء، نعم، المصريون كالماء. صافون ترى ما بداخلهم دون مجهد، وإذا كنت ترى أن الماء ليس له طعم أو لون أو رائحة.. فعليك أن تعرف أن هذا من معجزاته، أن يخلقه الله بلا لون أو طعم أو رائحة و يجعل منه كل شيء حي. إنه سر الحياة.. لو امتنع عنه لمت عطشاً. دعني أخبرك عن لونهم القمحي كسلسل الرمال الناعمة.. نعم.. المصريون كالرمال الناعمة. دعني أخبرك عن قلوبهم البيضاء.. المصريون لهم قلوب بيضاء كالجيس الأبيض.. نعم.. المصريون كالجيس.. هل تعرف الجيس؟ دعني أخبرك عنه.. إنه هذا الشيء الناعم الرقيق ذو الذرات البيضاء متناهية الصغر التي لو تحدثت بالقرب منها، ربما يتناشر نصفها، ولكن إياك أن تراهم غير ذلك، إياك أن تظن أن صفاتهم الجميلة ما هي إلا ضعف.. هنا لن أتهمك بأي شيء آخر إلا بالغباء، وسأوضح لك. سأقول لك أجمل ما يتمتع به المصريون لحظة الشدة.. إليك ما يفعله هؤلاء الصافون القمحيون الناعمون إذا ما اقترب أحد من أحدهم، هل تعرف ماذا يفعلون، يتحدون، يتشابكون، يمترجون ويختلطون. هل تعرف ماذا يحدث إذا ما اخْتَلَطَ الماء بالرمل بالجيس؟ يصبح حجراً قوياً،

وبمتهى السرعة يصبح صلباً لا يقوى أحد على تفتيته. هل تخيل حجراً بحجم ثمانين مليون مصرى؟ نحن مختلفون، ولكن عندما نختلط نصبح شيئاً واحداً صلباً، عندئذ يختفي الماء بصفاته ولا يبقى الرمل على لونه، ويتحول الناعم إلى خشن. لن ترى إلا حجراً يهبط عليك، ووقتها لن يكون لديك ما يكفى من الوقت لتقول يا ليتني فهمت كنه الأشياء.. لأنك ستصبح أنت والأرض سواء.

هذه رسالة لك يا من لا تعرف كنه الأشياء، نحن المصريون.. الفراعنة في الحضارة والصفات، نحن أصحاب الأهرامات، أبو الهول يسكن عندنا، نحن الفراعنة.. إن اتفرعنا، فلن تجد من يوقفنا.

أنا وأخويا وميكي ماوس (*)

«قم للمعلم وفه التبجيلا.. كاد المعلم أن يكون رسولا».

كثير من المقولات قيلت على ألسنة الحكماء والشعراء، هذا بخلاف ما ورد في القرآن الكريم وأحاديث السنة النبوية.. كلها تخص المعلم وتقدره وتجعله يقترب من مكانة الرسل، وليس المعلم هو من يقف فقط أمام السبورة في الجامعة أو المدرسة أو حتى في الكتاتيب، إنما المعلم هو من يعلمني شيئاً، حرفاً كان أو سطراً. ومن يُعلّمك شيئاً فلا بد وأنه يملك شيئاً، شاباً كان أو شيخاً، صعلوكاً أو ملكاً، وربما تتعلم شيئاً من شخص بسيط لا يمتلك علماً ولكنه يمتلك زماناً يحمل علماً بالحياة، وليس من الضروري أن كل من يتحدث يُعلم يا معلم! لقد علمني أبي «التسامح» وعلمتني أمي «الاستماع لرأي الآخر والاستماع به» تعلمت من أخي الكبير «الاحترام» فاحترمه. تعلمت من اختي الصغيرة «العطف» فأصبحت صديقها الصدوق، علمتني زوجتي «الحب» وعلمتني ابنتي «الأدب». أعتقد أنك إن أردت أن

(*) تم نشر هذه المقالة بتاريخ: ٢ من ديسمبر ٢٠٠٩.

تعلم فلا بد أن تعرف حكمة خلقك بضم واحد وأذنين. وذلك لتسمع أكثر من أن تتكلم، وأعتقد أن الأذنين لم يخلقوا لكي تسمع شخصين في نفس الوقت، ولكن لتسمع بشكل جيد وممتع (استيريو يعني).

فلنبدأ بعامية الكلام.. كنت قاعد مرة زمان مع أصحابي، وعلى حسب ما أنا فاكر، كنت باتكلم في موضوع ليه علاقة بالقراءة وقلت لهم: «أنا زمان كنت بقرة»، راحوا ضاحكين وهابها وهي هي ومه مي وواحد من اللي ضحكوا قال: «بيقول لك مرة زمان كان بقرة» قلت لنفسي: معذورين، ما هو لو كان الكلام بيكتب زي ترجمة الأفلام كده في الهوا، والواحد بيقوله كانوا عرفوا إني أقصد: إني زمان كنت «بقرة» فعلًا! أنا ماكتش أقصد بأقرأ.. أيوه كان قصدي أقول «بقرة» أنا كنت بقرة، لأنني ماكتش بأقرأ.. بأقرأ يعني.. علشان ماحدش يقرأها غلط تاني.. بس هما الحقيقة ماستنوش لحد ما أكمل الجملة.. المهم أنا دلو قتي الحمد لله حاسس إني مش بقرة، لأنني بقيت بأقرأ طيب وبيا ترى إيه اللي غير حالي من بقرة لـ«باقرأ»؟ أحكي لكو.. إحنا تلاتة سكر نباتة. أنا وأخوي وأختي، طلعت لاقيت نفسي وسطانينا بينهما لا أوصف بالكبير ولا بالصغير. ومرة زمان برضه.. أمي قالت لواحدة صاحبتها وهي بتعرفها علينا «ده بقى ابني الكبير، غاوي قرایة، اسم الله عليه، ربنا يُحرسه». طب وأنا إيه؟ أنا مش غاوي قرایة.. ربنا مايحرسنيش يعني؟! ماشي يا ماما.. وبعد اللي قالته أمي ده. قررت أقرأ علشان ربنا يحرسني زي أخوي الكبير اللي بيقرأ، وأدعني لأختي الصغيرة إنها لما تكبر وتبطل تصغر إن هي كمان تقرأ علشان ربنا يحرسها زينا. وابتديت مشوار القرایة.. اشتريت مجلة ميكى وخلصتها كلها في نفس اليوم، وكان كل ما يصدر عدد أشتريه وأقرأه، وزادت المجلات وزادت رغبتي في نهم

العلم وبقت مجلة ميكي ما بتكتفينيش فبقيت أشتري مجلدات لميكي وأقرها. القراءة استحوذت على كل وقتي، ولأن مجلد ميكي كان كبير وماكتش باعرف آخده معايا في أي مكان. اتجهت لميكي جيب اللي مابقتش تفارق جيبي أبداً، ضييعت فلوسي وسنوات صباي في تلقي العلم «الميكاوي» والبحر في عالم ميكي ماوس. هجرت العجلة والتلفزيون والأصدقاء.. ومن كتر حبي في ميكي، كنت بانام على المخددة ووداني في عكس اتجاهها الطبيعي، علشان تطرطق لبرة وتكبر وتبقى زي ودان ميكي. وحصل فعلًا.. ودان طرطقت وكترت واحلوت وبقيت شبه ميكي ماوس! نظري ضعف من كتر القراءة وحسينت إني حصنت نفسي بكم هائل من الثقافة، صحيح لما كان حد يسأل مثلاً عن تعداد سكان ماليزيا أخيها اللي ربنا حارسه هو اللي كان بيجاوب وأنا لأ، أو ما هي عاصمة الهند؟ أخيها برضه يجاوب، وأنا لست زي ما أنا.. لأ.. بس زي ما أنا ماكتش باعرف أجواب، هو كمان لا يمكن كان هايعرف يقولي ليه ميكي على طول بيزعق لبندق، وليه ببطوط بيتجاذب من محظوظ مع إنهم هما الاثنين بط، أو ليه دنجل لابس فانلة مخططة. صحيح ما حدش بيأسأل الأسئلة دي بس أكيد هاييجي يوم وتسأله، لحد ما جه يوم فعلًا، بس يوم أسود غير كل مفاهيمي. كان فرح بنت خالي وفرح كان فيه مطرب مغمور شافني وقال لصاحبه اللي كان واقف جنبه: «بس.. الولدده شبه ميكي ماوس». يااااه.. أخيرًا حد خد باله.. فرحت جداً.. لكن يا فرحة ماتمت! المطرب ده طلع بيتريق عليا، مش فخور بيا، حطمني، حسينت إن ودانني دلدلت لتحت وكنت عايز أقطعها وأرميها للسمك في النيل، أصل الفرح كان في مركب نيلية. روحـت بيـتنا وقطعت كل مجلدات ميكي وكـرهـت القراءـة بـسبـب هذا المـطـرب المـغمـور. كان نـفـسي تكون

دقني بتطلع، علشان اكتب وأربها بس كنت صغير وما بطلعش، وبعد وقت عديت من الأزمة ونظفت العجلة ورجعت لأصحابي من جديد وسألت نفسي: هو أنا كنت غلطان علشان كنت باحاول أقرأ وما أبقياش بقرة؟ ومالقتش إجابه سؤالي حتى عند أخويال اللي غاوي قرابة. ومرت سينين اتعلمت فيها حاجات كتير من ناس كتير أقف لهم الآن تبجيلاً واحتراماً زي الأستاذ نور الشريف مثلاً، لقد علمني «القراءة» دون أن يقصد. قابلته ذات يوم، ولا أعتقد أنه يتذكر متى وأين، كان في مكتبة، لم أكن معروفاً أبداً، وكان هو معروفاً طبعاً علشان كده فاكره، كان يريد ثلاثة أولاد في العشرينات ليمثلوا في فيلم «أولى ثانوي» و كنت واحداً من هؤلاء الثلاثة، ولكن لم يقع علياً الاختيار، لأنه كان عايزهم حديثي السن يعني لسة شبابتهم ودقونهم مانبتش، فلعننت دقني اللي وقت ما أعزها علشان اكتب بيها تكون ما بطلعش وقت ما عوزهاش تطلع!

علمني أستاذ نور شيئاً بكلمة قالها لي: لو بتحب التمثيل لازم تقرأ، وخصوصاً النجيب محفوظ لبراعته في وصف شخصياته، ولم تختف يوماً كلمات نور الشريف من أذني كلما قرأت كلمات نجيب محفوظ.

علمتني ثناء منصور «الحافظ على النجاح» عندما لم تجعلني أقدم برنامجاً آخر للأطفال كنت أراه جيداً، وكانت لا تراه كذلك، وأدركت أنها كانت على حق الحق.

علمني عادل إمام حاجة مهمة جداً في الحياة اسمها «قوة الرفض»، لما قال لي: ما أصعب أن تقول لا، وأنت في أشد الحاجة لقول نعم.

علمني أحمد زكي «سرًا» من أسرار التمثيل، لن أبوح به ليقى سرًا.. ليس خبئاً، ولكن حباً في أن يبقى سرًا.

علمني المخرج يسري نصر الله في مناقشة معه أن «أبحث دائمًا عن الحقيقى» بداخلى، لأن المخرج لا يستطيع أن يصل له أبدًا إلا إذا وصل له صاحبه.

تعلمت من كل الظروف حولي.. بحثت في صفات البشر عن شيء أتعلم منه، تعلمت من المريض «نعمـة الصـحة»، ومن المساجين «حـلاوة الحرـية».. ومن المحـتلين «ضرورـة الاستقلـال»، ومن الموتـى حين أـنـظـرـلـهـمـ ماـذـاـ تـعـنىـ «قيـمةـ الـحـيـاةـ»، تـعـلـمـتـ مـنـ الـمـعـرـمـينـ أـنـ «الـشـرـفـ منـقـذـ»، عـلـمـنـيـ الضـمـيرـ أـنـ خـلـقـ «لـلـإـخـلـاصـ»، وـأـنـ أـخـلـصـ فـيـ عـمـلـيـ حـتـىـ وـلـوـ كـانـ مـقـابـلـهـ قـلـيلـاـ، عـلـمـنـيـ الـأـمـلـ مـعـنىـ «الـرـضـاـ»، فـوـجـدـتـ نـفـسـيـ أـحـصـلـ عـلـىـ أـكـثـرـ مـاـ كـنـتـ أـرـيدـ أـنـ أـتـصـورـهـ.. تـعـلـمـتـ وـتـعـلـمـتـ.. مـاـ تـرـكـتـ شـيـئـاـ حـولـيـ: جـيدـاـ كـانـ أـوـ سـيـئـاـ، سـلـبـيـاـ أـوـ إـيجـابـيـاـ، إـلـاـ وـأـرـدـتـ التـعـلـمـ مـنـهـ.. حـتـىـ هـذـاـ الـمـطـرـبـ الـمـغـمـورـ الـذـيـ حـطـمـنـيـ، تـعـلـمـتـ مـنـهـ شـيـئـاـ اـسـمـهـ «الـقـوـةـ»، وـأـنـ لـاـ أـتـرـكـ مـاـ أـحـبـ حـتـىـ الـمـوـتـ، حـتـىـ وـلـوـ كـانـ مـيـكـيـ مـاـوـسـ الـذـيـ لـيـسـ لـهـ أـيـ عـلـاقـةـ بـعـدـ سـكـانـ مـالـيـزـياـ، أـوـ عـاصـمـةـ الـهـنـدـ. أـشـكـرـ أـمـيـ الـتـيـ ذـبـحـتـ بـقـرـةـ الـجـهـلـ دـاخـلـيـ حـيـنـ دـعـتـ لـأـخـيـ بـأـنـ رـبـنـاـ يـحـرـسـهـ فـجـعـلـتـنـيـ أـبـحـثـ عـنـ مـاـ يـفـعـلـهـ لـكـيـ يـجـعـلـ اللـهـ يـحـرـسـنـيـ مـثـلـهـ، أـشـكـرـ أـخـيـ الـذـيـ عـلـمـنـيـ كـمـ يـكـونـ عـدـسـكـانـ مـالـيـزـياـ وـأـشـكـرـهـ أـيـضـاـ عـلـىـ تـصـحـيـحـ مـعـلـومـاتـيـ حـيـنـ أـخـبـرـنـيـ أـنـ مـيـكـيـ لـاـ يـكـرـهـ بـنـدـقـ، وـلـكـنـهـ يـحـتـدـ عـلـيـهـ أـحـيـاـنـاـ لـأـنـ يـرـيدـ أـنـ يـعـلـمـهـ، فـعـلـمـنـيـ مـيـكـيـ الـفـرـقـ بـيـنـ الـكـرـهـ وـالـحـبـ.

كايينة خمسة (*)

هاحكيلكو حكاية مُوجزة وسريعة جداً، كنت عايش في بنيا حيث المجتمع البنهاوي والناس البنهاوية الطيبين الهاديين. دخلت معهد الفنون المسرحية في الهرم وكان خط سيري اليومي، بنيا -أحمد حلمي (الموقف طبعاً)، وكانت وسيلة المواصلات هي الميكروباص، وكانت الأجرة وقتها اتنين جنيه رايح وزيهم راجع، ولما أوصل موقف أحمد حلمي كنت باعدي من محطة مصر علشان أروح موقف رمسيس وبعد كده أركب من رمسيس ميكروباص علشان أروح الهرم والأجرة كانت وقتها ستين قرش رايح جاي.. يعني مواصلات بس ١٢٤,٨٠ جنيه في الشهر ده من غير أي ساندوتشات أو حاجة ساقعة. تعبت جداً، مش من المصاريف؛ لأنني مش أنا اللي بصرف.. أبويا اللي كان بيصرف، تعبت من السفر فقررت آخذ شقة مفروشة وأقعد فيها مشاركة مع أي واحد متشرحطط زبي.. المهم لاقيت الشقة وكان فاضل ألاقي المتشرحطط اللي هايشاركتني فيها.. ولاقيته.. بس كانت الشقة ضاعت، يعني معقوله

(*) تم نشر هذه المقالة بتاريخ: ٩ من ديسمبر ٢٠٠٩.

كده؟ يوم ما ألاقي الشقة ماألاقيش المتشحطط. وأما ألاقي المتشحطط
ماألاقيش الشقة! المهم لاقيت متشحطط تاني من الزقازيق، فمسكت
فيه بإيدي واسناني واتشحططنا احنا الاتنين على مالاقينا شقة تانية.
كنت مسئول عن نفسي مسئولية غير كاملة يعني أنيم نفسي، وأصحى
نفسى، لا كان حد بيحكيلي حكاية وينيمنى، ولا حد بييجي يطبع
علياً ويصحيني. وفرت لأبوايا ١٢٤, ٨٠ جنيه فلوس المواصلات بس
كنت باخد منه ٥٠٠ جنيه إيجار الشقة. ده غير مصاريف أكلى وفسحى
وفلوس السترال لما كنت بكلمهم في بناها. أصل ماكانش في موبایلات
وقتها، حتى لو كان في أكيد كنت هاخد فلوس الفواتير برضه، كل ده
بالرغم إن الحالة المادية في الأسرة لم تكن على مايرام، وكانت نخوتى
وإحساسى بالآخرين وقتها أيضاً لم يكونا على مايرام، وتوطدت
علاقتى بعامل السترال خلال سنوات دراستي الأربع في المعهد. لما
كنت في سنة أولى معهد كان بينادي ويقول: «اللي طالب بناها يدخل
كابينة خمسة»، إلى أن وصلت إلى البكالوريوس فأصبح نداوته: «حلمي
ادخل كابينة خمسة وسلم لي عليهم»، تطورت علاقتى بكل شيء ما
عدا كابينة خمسة التي لم تتغير على مدار الأربع سنوات. كان ناقص
يكتبها باسمى! اتخرجت من الأكاديمية. وفي يوم من الأيام دخلت
كابينة خمسة لأتحدث مع والدي لأطلب منه فلوس كالعادة مستغلًا
إحراجه مني وغير عابئ، أو بمعنى أدق متناسياً حالي المادية، وكان على
خلاف معى لأننى أنهيت دراستي ومازالت أحمله مصاريف معيشتى في
القاهرة وهو يريد مني العودة إلى بناها. وأنا لا أريد لأن النداهة ندهتني..
جهزت نفسى لمناقشة أعرف أنها ستكون حارة بيننا بسبب إنه عايزنى
أرجع بناها، المهم حطيت السماعة على ودنى المطر طقة وسمعت رنين

التلفون في السماعة ورد والدي على التليفون، ولكنني لم أسمع صوته هل سمعت تكبيره وهو يقول: «الله أكبر» فعرفت أنه يصلني ولكنه رفع السماعة لأنه يعرف أنني أنا المُتصل بسبب رنة الترنك الطويلة. خرج عن خشوعه ورفع السماعة وهو يصلني خوفاً من أن يظل التليفون يرن ولا أحد يجيب فأغلق الخط ولا أعاود الاتصال مرة أخرى.. انتظرت على السماعة حتى يفرغ من الصلاة فسمعت أثناء انتظاري مكالمة بجواري في كابينة أربعة بين شخصين، لم أسمع منها طبعاً إلا حديث الطرف الذي كان بجواري في كابينة أربعة، ووجدت نفسي أسرح معها متخيلًا ردود الطرف الثاني، وكانت المكالمة كالتالي:

كابينة أربعة: أنا قبضت تلميذ جنديه. مرتب الشهر.

الثاني: تلميذ جنديه؟؟ ليه! أنت موظف ولا رجل أعمال؟

كابينة أربعة: أنت بتريق؟ ده أنا مش عارف أجيب بيهم إيه.

الثاني: مش عارف ليه؟

كابينة أربعة: أنا أهو وأنت أهو.. تف على وشي لو عرفت تجيب بيهم حاجة.

الثاني: طب اهدى بس وقول لي.. أنت مصاريفك إيه؟

كابينة أربعة: مبدئياً ماكُلش لحمة لأنها بتجيبي نقرس، ولا جمبري لأنه بيعللي الكوليسترونول، وما بشربش سجاير لا مصرى ولا مستورد لأن التدخين ضار بالصحة، وما بشربش مية معدنية لأن مية الحنفية مستوردة والحمد لله.

الثاني: طب عايز عربية؟

كابينة أربعة: بحب المشي علشان كده مش عايز عربية ولا حتى عجلة.

الثاني: طب اركب أوبيس.

كابينة أربعة: أنت مابتفهمش؟ بقولك بحب المشي! ده غير إني مقاطع كل المنتجات الأجنبية علشان أنا متدين.

الثاني: طيب تحب تروح سينما؟

كابينة أربعة: بقولك متديسين.. وأصلاً كل الأفلام هايفة.

الثاني: خلاص.. روح مسرح.

كابينة أربعة: ما فيش غير مسرحيتين في السوق.. لأحمد آدم وسمير غانم.. وأنا ما بحبش الاثنين.

الثاني: خلاص خشن مسرحية عادل إمام.

كابينة أربعة: كل لما أروح أحجز مالاقيش مكان.

الثاني: طب مش تحتاج تكيف مثلًا في البيت؟

كابينة أربعة: التكيف بيكسر العضم.

الثاني: طب مراتك وعيالك مش عايزين حاجة؟

كابينة أربعة: هو حد فيهم يستجري يعوز حاجة.

الثاني: طيب مانت أهو اللي مش عايز حاجة بالفلوس.

كابينة أربعة: أنت هاتستهبل! مانا اللي قايلك تف على وشي لو
عرفت تشتري بيه حاجة!

وانتهت المكالمة.. وأنا سرحان في اللي سمعته. معقوله يكون في موظف بيأخذ تلتميت جنيه في الشهر؟ طب بيكتفوه ازاي؟ تلتميت جنيه موظف مرتب.. قصدي مرتب موظف.. أنا كمان أبويا موظف، معقوله ممكن يكون يقبض كده وأنا رايح جاي أطلب منه فلوس! بصراحة صعب عليا.. ثم جاء صوت والدي الدافئ الحنون فأخرجنني من تركيزي الذي شرد مع المكالمة المجاورة في كابينة أربعة.

قال لي: إزيك يابني وحشتني لاقيت نفسى بكذب وبقوله أنا اشتغلت يا بابا. وبألف جنيه في الشهر.. فرد وصوته كله فرحة وقال لي: بجد؟ ألف مبروك يا بني، الحمد لله الحمد لله. كان فرحان علشان أنا اشتغلت مش علشان هارحه من المصارييف.. سألني وقال لي: كنت عايز حاجة؟ قلت له لأن أنا بس كنت عايز أقولك حرماً، فقال لي جمعاً يا سيدي. قفلت السكة ولاقيت نفسى بسرح تاني لوحدي في كابينة خمسة، وعرفت ليه أبويا بيسيب نصيه في اللحمة اللي بتجيشه نقرس، وما بيحبس يجيب جمبري لأنه بيعلي الكوليسترول، ومبشر بش سجاير لأن التدخين ضار بالصحة وبيحب المشي مع إن رجليه وجعاً، ومقاطع كل المنتجات الأجنبية علشان غالية.. قصدي علشان متدين.. وفهمت السر ورا عدم جبه لأنـهـ آدم وسمير غانم مع إنه كان معجب بالقرموطي في سر الأرض.. ده غير قهقهته على سمير غانم في مسرحية «المتزوجون»! شكـتـ أن يكون اللي كان بيـتكلـمـ جـنـبـيـ فيـ كـابـيـنـةـ أـرـبـعـةـ هوـ أـبـوـيـاـ،ـ بـسـ مـسـتـحـيلـ

لأنني كنت سامع صوت تكبيره في الركوع والسجود. عرفت أن أبويا مرتبه على قده، ما يفرقش كتير عن الرجال اللي كان بيكلم جنبي.. طيب ازاي احنا عايشين؟ وياترى عايشين بالتلتميت جنيه ولا عايشين بالستر ولا عايشين ببركة دعاء الوالدين؟ في ناس بتبعن للتلتميت جنيه على أنهم «ستمت نص جنيه»، وناس تانية بتتصبر نفسها أكثر وبتبعن للتلتميت جنيه على أنهم «ألف ومتيين ربع جنيه»، ده غير بقى اللي شايفينهم «ثلاث تلاف عشرة صاغ»، وغيرهم شايفينهم «ست تلاف خمسة صاغ».. وفي بقى اللي شايفينهم «ثلاثين ألف قرش».

أنا مش عارف هي الناس طماعة ولا إيه!! لما يبقى في موظف مرتبه «ثلاثين ألف قرش» في الشهر.. عايز إيه تاني؟ أقولك حاجة ياللي بتاخذ تلتميت جنيه في الشهر لو حد سألك بتاخذ كام في الشهر، ابقى قوله ثلاثين ألف واسكت أو اقفل السمعة قبل ما تقول كلمة «قرش» لأنك مش هتعرف تكذب عليه وتبدل القرش بجنيه. أصل لو ليك في الكذب، كان بقى مرتبك فعلاً ثلاثين ألف جنيه.

الله يرحمك يا والدي.

السقيط (*)

اللي ليه نصيب في حاجة بياخددها. ليك نصيب تخسر مليون جنيه هاتخسرهم، ليك نصيب تكسبهم بعد ما خسرتهم هاتكسبهم. أنا كان نصيبي أخلل في الثانوية العامة. تلات سنين سقوط، كنت باقعد أعيط علشان بسقوط، بسقط ليه؟ ليه؟ هو أنا غبي؟ لأنّا مش غبي أنا عارف كويس إني مش غبي، أنا ذكي وذكي جداً كمان. طيب بسقط ليه بقى؟! قعدت أدور على السبب اللي بيخليني أسقط.. وبعد تفكير طويل، عرفت إيه السبب، أيوه عرفته، أنا بسقط علشان مابذكرش.. أيوه صبح.. علشان مابذاكرش ياااااااااه.. أخيراً عرفت السبب.. إيه الغباء ده؟! ده أنا غبي أوي.. إيه؟ غبي!! واحتترت تاني.. لحسن أكون بسقط علشان أنا غبي مش علشان ما بذاكرش. تلات سنين قاعد على مكتبي في أوّضتي ووشي في الحيطه بحاول أذاكر.. لما كرهت نفسي وكرهت المذاكرة وكرهت الحيطه اللي كنت واثق أنها لو دخلت الامتحان بدالي كانت هاتنجح. شكّيت إن جايزة يكون لون

(*) تم نشر هذه المقالة بتاريخ: ١٦ من ديسمبر ٢٠٠٩.

الحبيطة المدهونة أبيض مش مساعدني على التركيز.. فدهنوهالي أخضر، بس الأخضر حَسِّيني إني قاعد قدام سبورة الفصل، مش معقول هابقى الصبح وبالليل في الفصل، فكان بديل الأخضر هو الأصفر. الله على الأصفر وإشراقه في الأوضة، أية كده، حاسس إن الشمس مابتغيش من أوضتي.. بس لحد إمتى؟ الساعة بتبقى تمانية بالليل ولسة الأوضة في عز الضهر، وأنا الحقيقة بحب أذاكر بالليل.. لا.. لا.. الأصفر ده مش لوني! لاقيتها.. هو الأزرق، قشطة، خشن على الزرقات. وادهنت الأوضة أزرق. يا سيدى على الليل وسحره وجماله وهدوءه وتركيزه، ده من كتر إيحاءه كنت أحياناً أسمع دوشة عيال في الشارع فأطلع علشان أزعق لهم فاكتشف إننا الضهر مش بالليل. عشت شوية مع الأزرق لحد ما حسيت إن من كتر زرقات الأوضة بيكس عليا النوم واحنا لسة الضهر.. ماهو ليل بقى طول النهار.. طيب والحل؟! بيهألي بما إن الأصفر بيصحصح والأزرق بيسيم، أنا أديها وش أصفر في أزرق، وقد كان. الأصفر والأزرق اداني أخضر. يادي النيلة الخضرا.. سبورة تاني.. أنا عايز لون حماسي وسخن كده، يسخني على المذاكرة وماقلكوش بقى الأحمر عمل إيه.. كوابيس كوابيس رهيبة.. كنت بحلم إني في جهنم ويتعدب بسبب سقوطي المستمر. بعد الأحمر الحقيقة السنة كانت خلصت وسقطت طبعاً لأنني ضيعت السنة في دهان الأوضة.. وابتدىت السنة الجديدة بلون جديد خالص «الأسود» دهنت الأوضة أسود علشان تمشي مع الأيام السودة اللي أنا فيها دي، بس برضه غيرته مش بسبب إنه مش عاجبني لكن لأنه الأسود بيضيق الحاجات فحسست إن الأوضة اضيقـت جداً.. ده غير إنها أصلاً ضاقت من

دتر الدهان، وزي ما احنا عارفين إن الأسود بيضيق. عارفين طبعاً إن الأبيض بيُوسع. فأوسعت الأوضة تاني ورجعت زي ما كانت في الأول بلونها الأبيض زي ما أنا في المناهج أبيض.. طب أعمل إيه؟ نصبي إني مابحبش المذاكرة وبسقط.. ذاكرت في كل حته في البيت، في أوضتي وفي كل الأوض، حتى السطوح ذاكرت فوقه لاقيت نفسى من غير شعور بسبب المذاكرة وأجري ورا الفراخ. قلت طيب أجرب أروح أذاكر في النادي. خدت الكتب والورق وقعدت على ترابيزة في الشمس باصة على ملعب كرة القدم وكان في عيال بتلعب كورة والشيطان شاطر.. قلت لنفسي واضح إن نصبي ألعب كورة بس ضميري أبني.. قلت مغفولة يكون الشيطان شاطر وأنا مش شاطر وبسقط؟ لا.. إن كان هو شاطر فأنا لازم أكون أشطر منه وإن كان هو نجح إنه ما يدخلش الجنة أنا هانجح وأدخل الجامعة.

رحت قايم وقاعد على الكرسي اللي قدامي وبقى ضهرى لملاعب الكورة ولسة هابتدى مذاكرة جم شوية هوا طيروا الورق من على الترابيزة وقعدت أجري ورا الورق أمسكه.. يا ربى! يعني هو أنا مكتوب علياً أجري ورا الفراخ فوق السطح وورا الورق في النادي!

لميت كل الورق وكان فاضل ورقه واحدة مش لاقيها بصيت حواليه لاقيت الورقة الأخيرة في ملعب الكورة، رحت أجيبها ومديت إيديا علشان أمسكها جت الكورة ناحيتي ووقفت جنب الورقة والعيال كلها وقفوا وبصولي، كانوا مستنين الكورة علشان يكملا العـب، صعبوا علينا جداً فمسكت الكورة بإيدي اليمين ورحت رافعها في الهوا وشوطها حته دين شوطة ولا فؤاد المهندس.. شوطة في شوطة في هيد في دبل كيك والحمد لله غلبنا ثلاثة صفر.. ثلاثة صفر..

يُخرب بيت التلاتة على الصفر.. افتكرت الصفر في المية اللي جبته في تاني سنة سقوط، أنا أول واحد في مصر يجيئ صفر في المية في ثانوية عامة.. نصبيبي كده.. نجاح إيه ده اللي عايز ينفعه واحد زبي؟ واحد دهن أو ضته عشر مرات وجاب صفر في المية.. ده أنا كان ناقص أدهنها مرهم. الصفر ده ما يدخلنيش حتى السجن.. سجن إيه بس؟ أنا هافول على نفسي ولا إيه!! أيوه أنا لازم أخش السجن بالصفر ده.. تفرق إيه انت عن أي مجرم؟

صحيح السجن ما يدخلوش إلا القاتل.. طب ما انت قاتل.. قلت الفرص اللي كانت ممكن تكون قدامك لو كنت جبت مجموع. ما يدخلوش غير اللي بيسرق!! طب ما انت سرقت فرحة أبوك وأملك بنجاحك.

ما يدخلوش غير اللي اغتصب!! طب ما انت اغتصبت مكان واحد تاني كان هايكون قاعد على كرسيك في الفصل وجايزي يكون أحسن منك.

ما يدخلوش غير اللي بيعرق!! طب ما انت حرق تلات سنين من عمرك اللي ربنا ادهولك علشان يبقى ليك لازمة.

ما يدخلوش غير حد ظلم!! طب ما انت ظلمت نفسك.. ما يدخلوش غير المتظاهر!! طب ما انت اتظاهرت إنك كنت بتذاكر.

قلت لنفسي: كفاية كفاية.. وقلت لنفسي: طيب مش جايزي يكون نصبيبي إني أنجح بس أنا مفهم نفسي إن نصبيبي أسقط.

زي ما أنا نصيبي دلو قتي إني أقول إن نصيبي أنجح وأنا مفهم
نفسى إن نصيبي أسقط.. اخرس.. لا مش ها خرس وها جرب.. زي
ما ممكن تخسر مليون ممكן تكسب مليون لو كان ليك نصيبيك
تكسبهم.. تصدقونى لو قلتلكو لما عملت كده كان نصيبي أنجح..
أيوه نجحت.. هيبيه.. أخيراً نجحت.. نجحت بمجموع خمسة
وأربعين في المية.. أصلى كنت معفى من الفرنساوي علشان ما كتتش
باحده في السعودية لما كنت عايش هناك.. أنا أول واحد في مصر
برضه يجيء خمسة وأربعين في المية في ثانوية عامة وينجح.
صحيح أنا جايب خمسة وأربعين في المية.. بس توazi خمسين
في المية نصيبي كده، مش مهم نصيبي دلو قتي.. المهم تنسيقي..
مالاقتش ولا كلية ممكן تاخذ مجموعى، وبعدين يا نصيبي رايح
بيا على فين؟ لما قلت نصيبي السقوط سقطت، وأما قلت نصيبي
النجاح نجحت. يا ريتني قلت نصيبي أجيء تسعين في المية.. يا ترى
يا نصيبي هاتعمل إيه تاني فيا؟ مات واحد من عيلتنا.. نصيبيه كده..
الله يرحمه، ونزل نعيه في الجنان وأبوياب قال لي روح هات الأهرام
لما نشوف النعي مكتوب ازاي. اشتريت الجنان وقرأ أبويا النعي
ويكى، أصله كان صاحبه ويحبه وعزينا كلنا ويرضه أبويا بكى، ورحننا
الأربعين.. وأنا بحب السمك البلطي، نصيبي كده، وأمي بتعمله حلو
 جدا، نصيبيها كده، اشتريت أمي السمك وشوت اللي اتشوى وقلت
اللي اتكلى، نصيبي السمك كده، ورجع أبويا من الشغل لابس فانلته
المونتوجت النبيتي وشابل خمس ترفة أصل احنا خمسة ومحدش
بيأكل أكثر من رغيفه، نصيبيها كده، وجه وقت الغدا وفرشت جرنان
على السفرا لاقيته جرنان العزا وعلشان ما فكرش أبويا بعزيزه اللي

اختفى.. وده وقت غدا مش بكا.. قلبت صفحة الأسى اللي فيها العزا، وابتدينا الغدا.. برقت فجأة أمي على حاجة في الصفحة اللي قلبتها.. افتكرتها شافت العزا مع إن الصفحه قلبتها.. قلت يارب ما تتكلم ده احنا ما صدقنا إن الموضوع اتنسى، زاحت رغيفي اللي كان مغطي جزء من مربع أسود مكتوب جواه كلام بالأبيض وابتدىت تقرأ بصوت ساميته كلنا.. صوت ماما: إعلان: يعلن معهد الفنون المسرحية بالهرم عن قبول دفعات جديدة بمجموع يبدأ من خمسين بالمائة بأقسامه الثلاثة.. التمثيل والنقد والديكور.. وأنا ماكتتش بانجع إلا في امتحان قدرات الفنون والعمارة. ابتسمت ماما من حلاوة الأمل، وأبويها ابتسם ودعى ربنا بالشكر.. وأنا قررت الفاتحة على الميت اللي نصيبي معاه ابتدى.

غروق الشمس (*)

عم عفيفي.. مين عم عفيفي ده؟ عم عفيفي ده جز مجى كان عنده ماكينة خياطة جلود بتخيط جزم أو شنط أو أحزمة أو أي حاجة جلد.. وماكنش عنده دكانة، دكانته كانت الشارع كله والشارع اسمه «شارع الشعب». عم عفيفي كان بيتحرك مع ظل الشمس، مكان ما تلاقي ظل في الشارع تلاقيه قاعد ورا ماكته من صباحية ربنا لحد المغرب.. مالوش مكان محدد.. لما تحب تدور عليه دور على الظل هاتلاقيه، أصله مامعهوش تمن شمسية يقعد تحتيها ده يا دوب وفتر تمن الماكينة بالعافية. عم عفيفي شبه نجيب الريحاني في فيلم «لعبة الست»؛ غلبان ومناكف وتعشقه. الجزء والحزام والشنطة هما كل حياته، تديله الجزء علشان يخيطها فياخذها من إيدك من غير ما يوصلك.. كان بيعرف أنت مين من جزمنتك.. بني آدم من أنهى صنف.

لو الجزء كلاسيك ونضيفة يبقى أنت مدير أو موظف محترم.. فتلاقيه بيقولك يا بيه.

(*) تم نشر هذه المقالة بتاريخ: ٢٣ من ديسمبر ٢٠٠٩.

لو جز متک الشمآل مشقة من عند البوز يبقى عندك عربية والدبریاچ
مشققهالك فيقولك يا باشا.

ولو جز متک ميري يبقى أکيد التحية هاتكون تحت أمر سعادتك.

ولو جز متک من غير رباط يبقى أنت مابتحبس حد يقييك ففي
الغالب هايقولك سيبها وتعالي خدها وقت ما تحب علشان مش
هایبقى عايز يقييك بميعاد!

ولو جز متک ملونة يبقى أنت شخص مرح و بتحب الفرشة..
فمافيش مانع من نكتة تطلع منه.

ولو جز متک في نعلها آثار لطفي السجاير يبقى انت مُدخن فيعزم
عليك بسيجارة على ما يخلصلك!

أنا أعرف إن في ناس بتقرأ الفنجان وممكن تعرف هايحصلك إيه..
عم عفيفي كان بيقرأ الجزمة.. من جز متک كان يقيسك ويوزنك.. جزمة
مقاس تسعه وتلاتين يبقى أنت قصير أوزعه وطولك يا دوب مية وستين،
ولو خمسة وأربعين يبقى أنت طولك فوق المية خمسة وسبعين.. وأما
بقى لو مرکب فرشة في جز متک هايعرف إنك من أسرة فقيرة أو متوسطة
أو اقتصادية.. أو إن أبوك بخيل اداك جزمة أخوك الكبير الواسعة عليك
بعد ماضاقت عليه. عم عفيفي من جز متک ممكن يعرف في جييك كام
وهاتدفع كام ومش هايطلب لأنه عمره ما طلب. ولو الشغالة هي اللي
جايية الجزمة يبقى صاحبها أقرع ونرهي وخايف الناس تشوفه وهو
بيصلاح جز منه عند الجزمجي. عم عفيفي ده حكاية.. الناس حفظت
مكانه لما تبع للشمس وتعرف رامية ظل فين فيروحوا على الضلة

فتلاقيه قاعد وسط جزمه.. عم عفيفي بيغرب عن شارع «الشعب» مع غروب الشمس ويشرق مع شروقها.. ماحدش يعرف هو ساكن فين.. عم عفيفي كان متعلق راديو في الماكينة ما فيهوش غير محطتين: محطة القرآن الكريم محطة أم كلثوم.. وحافظ القرآن وكل أغاني أم كلثوم، والاتنين حافظين القرآن.. بس هي «كوكب الشرق» في العالم وهو «كوكب الشمس» في شارع «الشعب» بيسمع أم كلثوم وكأنها بتغليله، ومرة قال لي إنه نفسه يصلح جزمة أم كلثوم فقلت له: وهو إيه اللي هايبيوظ جزء الست أم كلثوم يا عم عفيفي؟ أكيد لو اقطعت هاترميها. قال لي: لا.. أم كلثوم لو كانت بترمي جزمتها لمجرد إنها انقطعت ما كانتش وصلت للناس بكلامها وصوتها وألحانها، أنا يابني مش بعرف حال الناس بس من جزمها، أنا كمان ممكن أعرف حال الجزم من ناسها، يعني أم كلثوم أو عبد الحليم لا يمكن يعملوا كده، بس انت عارف عبدالوهاب كمان لا يمكن يصلح جزمه. فقلت له: إسمعني؟ ما هو كمان واصل للناس زيهم؟ فقال لي لأنها عمرها ما هتقطع بس ممكن تدوب؛ اللي زي عبد الوهاب ممكن يعيش ميت سنة، أصله منظم فأكيد هايحافظ عليها. قلت له هي إيه؟ الجزمة ولا صحته؟ فقال لي: الاتنين.. اللي يحافظ على جزمه يحافظ على صحته.. واللي يحافظ على صحته يعيش كثير. عم عفيفي مالوش مالكة.. لا يمكن تعرف شخصيته.. ما يحبش حد يعرف هو إيه أو مين أو ليه، علشان كده عمره ما لبس جزمة.

أنا مرة وأنا صغير كنت يصلح جزمتني عنده، وجه راجل ومعاه ابنه الصغير، كان شايل جزمه البنية الصغيرة في إيده، وطلب أبو الولد من عم عفيفي إنه يصبغ له جزمة ابنه أسود.. عم عفيفي خد الجزمة

الصغيرة وبص فيها وقلبها من فوقها لتحتها من غير ما يخص للراجل،
بس الراجل حب يقول لعم عفيفي إيه السبب ورا تغير لون الجزمة
منبني لأسود.. وقال له: أصلهم في المدرسة طالبين الجزمة تبقى
سودا وأنا الحقيقة قلت أصبغها أرخص، هاتاخد كام؟ ما ردش عم
عفيفي وبص للواد الصغير وابتسم له.. وقال له: انت في سنة ستة
صح؟ الولد هز رأسه من فوق تحت (بمعنى أيوة) عم عفيفي بص
على جزمة أبو الواد فلاقاها من غير رباط فقال له: روح شوف وراك
إيه وتعالي وقت ما تحب. الراجل قال له: لا أنا هافضل معاك لحد
ما تخلصها، وهنا أدركت أن رؤية عم عفيفي للناس من خلال جزمهم
خبيت المرة دي.. صبغ عم عفيفي الجزمة أسود واداها للراجل
والراجل طلع الفلوس بس عم عفيفي مارضيش ياخدهم وقال له:
ابقى ادفعهم لما ترجع تصبغهابني تاني بعد المدرسة ما تخلص.
الراجل ابتسم لعم عفيفي ودعا له بالصحة والستر. مشي الراجل
ومعاه ابنه، بصلبي عم عفيفي وقال لي: الجزمة دي اتصبغت خمس
مرات قبل كده ودي السادسة، ساعتها عرفت عم عفيفي عرف ازاي
إن الولد في سنة ستة، وهنا أدركت إني جزمة وما بفهمش في الجزم
زي عم عفيفي.. ورجعت ثقتي في عم عفيفي ورؤيته للناس من
خلال جزمهم.

وبعد عشرين سنة.. كان عندي ميعاد مهم لازم أصالح له بدري..
ومع شروق الشمس صحيت ولبست هدوبي وصولاً لجزمتى الملونة
اللي من غير رباط، بس وأنا بلبسها اتقطعت.. فاتشاءمت.. لبستها
مقطوعة ونزلت وقلت أعدى أصلحها عند عم عفيفي قبل ما أروح
ميعادي، وكان بقا لي سنين جزمي ماتقطعتش. المهم رحت شارع

«الشعب» مشيت في الشارع لاقيته اختلف.. عمارات عالية وكلها جديدة.. دورت على عم عفيفي مالاقيتوش فافتكرت إنه بيقعد في الظل وبيتحرك مع الشمس، بصيت للشارع أدور على الظل فيه لاقيته ئله ظل وما فيهوش ولا نقطة شمس بسبب عماراته العالية اللي خنقت الشمس وحبستها فوق الأسطح بس شارع «الشعب» بقى كأنه في نص الليل مع إن وقتها كان عز الصبح! مشيت في الشارع أدور بين ظلاله الكئيبة على عم عفيفي.. انت فين يا عم عفيفي؟ جزمتي الملونة مقطوعة وأنا عايز أصلحها. دورت في كل مكان كان بيقى فيه ظل وكان بيقعد فيه عم عفيفي.. مالا قتلواش أثر.. عم عفيفي كان مصاحب الشمس، والعمارات طفت الشمس، بيقى أكيد عم عفيفي طفش من الشارع اللي طفت منه الشمس، طب راح فين؟ انجدني يا عم عفيفي، جزمتي، الملونة اتقطعت وأنا متشارم، خلاص ميعادي المهم فات ومش مهم الحقه بس عايز أصلح جزمتي، أنا مش عايز أليس غيرها أنا ماليش في الجزم السودا ولا البنبي ولا أم رباط، ده أنا كنت ناوي أديها لابني لما يكبر بس اوعى تفهم إني بخيل، لأ ده أنا من أسرة اقتصادية متوسطة فقيرة، أنا عايز أدي جزمتي لابني علشان عايزه يطلع زبي.. حر.. ما بيعبس القيوود.. مش انت اللي علمتني سر الجزم!! وصلت لآخر الشارع وآخر مكان كان بيقى فيه ظل وكانت الشمس خلاص فاضل لها ساعة وهاتغرب. من الشروق للغروب بدور على عم عفيفي ومش لاقيه، هو عم عفيفي فين؟ مش كان بيقى قاعد هنا في الوقت ده؟ جريت في الشارع وكان خلاص الشمس فاضل لها دقائق وتغرب، جريت وأنا بسابق غرويها، أصلها لو غربت مش هايقى في ظل وعم عفيفي ما بيقعدش إلا في الظل.. جريت..

جريت.. جريت.. وكل ما كنت بجري كان القطع اللي في جزمتي الملونة بيزيدي. كنت بقول مش مهم، لما أوصل مش عنده هايصلحهالي. ووصلت آخر الشارع وبصيت حواليا على آخر مكان فيه ضلة، بس الشمس كانت أسرع مني.. مشيت الشمس ومشي معها عم عفيفي.. بصيت على اسم الشارع علشان أتأكد إنه نفس الشارع فلاقيت اسم الشارع اتغير وبقى شارع «الظلال - الشعب سابقا»!

قميص أبيض - ١١١ (*)

من التاريخ ده ١١١ للتاريخ ده ٢٠١٠/١١ عدى ألفين
وعشر سنين، بعدد الألفين وعشرين سنين كل سنة وانتو طيبين.. السنة
بتيجي وبتعدي بحلوها ومرها، بنعيشها وبيعيشنا بوحشها وكويتها،
وحال السنين زي البني آدمين.. زي ما فيها الكويس والوحش.
والحلو والمر.. في من الناس برضه زيها.. مع بداية السنة الجديدة
قررت أكون أنا كمان جديد زيها. بس هاخد منها حلوها وأبعد عن
مرها، أعيش كويتها وأبعد عن وحشها، مع السنة الجديدة قررت
أكون حلو وكويس، في السنة الجديدة قررت أكون مثالي في كل
حاجة: في تصرفاتي.. في ردودي.. في أخلاقي، أكون الشخص
المثالي. صحيت وغسلت سفاني وفطرت وحلقت دقني ولمعت
جزمتى وعشان أبقى مثالي على الآخر لبست قميص أبيض مكوي
جداً. هنزل بقى الشارع أعيش في دور المثالي. فتحت باب شقتي
وضغطت على زرار الأسنانير علشان يطلع، وفضلت مستني.. إن

(*) تم نشر هذه المقالة بتاريخ: ٣٠ من ديسمبر ٢٠٠٩.

الأسانسير يطلع.. مابيطلعش! خمس دقائق.. عشر دقائق.. مش راضي يطلع.. فقررت مااعملش عقلبي بعقل الأسانسير، ونزلت له أنا. في الدور الأرضي لاقيت بابه مفتوح، وإيد حريمي طالعة منه، وواحد واقف وماسك الباب بإيده، ده مرتضى، جارنا في العمارة بس الإيد الحريمي ماعرفهاش. قربت من الأسانسير وعرفتها بعد ماشفت وشها، انشراح مرات مرتضى، واقفين يرغوا مع بعض قدام الأسانسير وكأنهم ماعندهممش شقة وطبعاً كان ممكن يكون ليار د فعل مش مثالي، بس لأنني النهارده مثالى، فقلت لهم بكل ود واحترام وجيرة:

«صباح الخير يا جماعة، أنا واقف بقالى عشر دقائق مستنى الأسانسير»، قامت انشراح قايلة لي: طب ما أنت نزلت على السلم أهه. ابتسمت ابتسامة بتحمل معنى «آه يا ولية يا بنت الـ...». اثبت إنت مثالى.. ثبت فعلا، ورحت مدיהם ضهرى وماشي. خرجت من باب العمارة متوجهها إلى الجراج، وكان فيه كوم زباله على ناصية الشارع، أصل فيه حد سرق صندوق الزباله من ييجي حوالي خمسة وعشرين سنة. اضطريت أفادى كوم الزباله. وأنا بافاديه بنصي التحتاني، رشقت في فرع شجرة مشوك بالنص الفوكانى فدخلت شوكه فيكتفي الشمال، ونزل دم بقى القميص.. طب أطلع أغير؟ مش عايز أقابل مرتضى وانشراح تانى لأنهم أكيد لسه بيرغوا عند الأسانسير، أصل الأسانسير عندنا بيجيب طراوة، وبعدين أغير ليه؟ ما هو أنا مش رايح حته أساسا! كملت طريقي ودخلت الجراج لاقيت عربىتي محشوره بين عربيتين «فور ويل» عاللين وعربىتي واطية.. شكىت إن العربيتين العاللين بيعملوا حاجة في عربىتي، أمال إيه اللي زانقها كده وسطهم؟ ماهي واطية وأنا عارفها. بس اكتشفت

لاني ظلمتها لأنها ماتحركتش من مكانها من ساعة ماركتتها، العربيتين العالين دول هما اللي ركنا جنبها وسايس الجراج هو اللي سامح بالمسخرة دي في الجراج. حاولت أدخل من بين العربيتين عشان أدخل عربتي، ما عرفتش.. أصل السايس لازق العربيتين في عربتي وكل عربية لازقة في باب. طب أنا أدخل ازاي؟ استغلت رُفعي وحاولت أدخل من الناحية اليمين، وفعلاً وصلت للباب، بعد ما مسحت جنب عربتي والعربة اللي جنبي بقميصي الأبيض، وبقى رمادي، بس الحمد لله الكلام كانت لسة بيضة لأنني كنت رافع إيدي لفوق، فبقى قميصي أبيض في رمادي.. وفشلت محاولاً لليدخول من باب السوق. قلت أجرب الباب الثاني جايز العحة تكون أوسع شوية، دخلت بين عربتي والعربة الثانية ووصلت للباب بعد ما مسحت الجنب الثاني لعربتي والعربة الثانية بقميصي الرمادي اللي بقى إسود.. بس الحمد لله الكلام لست بيضة.. وأنا لسه مثالى.. ولازم أبقى مثالى.. وصلت وبقى صدري قدام باب عربتي، وضهرت في باب العربة اللي جنبي وإيدي مرفوعة لفوق ولو حد بص من أي بلكونة هايتفكر حاجتين مالهومش تالت: يا إما أنا بعمل حاجة عيب في عربتي، أو العربة اللي ورايا بتعمل حاجة فيها! وتخيلوا بقى على آخر الزمن أبقى بتاع عربيات؛ إيدي مرفوعة لفوق، وأنا مزنوق وسط العربيتين، ومش عارف حتى أنزل إيدي أطلع المفتاح. خرجت زي ما دخلت.. بس الحمد لله لست أكمام القميص بيضة والقميص بقى إسود غامق.. قعدت ألف وأدور حوالين نفسي.. أعمل إيه بس يا رب؟ أصرخ بعلو صوتي في الجراج.. جاتلي فكرة إني أدخل العربية من فتحة السقف! أكيد

اللي اخترع فتحة السقف دي شاف يوم زyi اللي أنا شفته ده ولأن
فتحة السقف ممكن تفتح من المفتاح، رحت فاتح فتحة السقف
ورحت طالع فوق السقف ورحت مدلدل رجلي ونزلت بجسمي
وإيدي مرفوعة لفوق وكأني نازل في بير.. والحمد لله وأنا نازل
كمام القميص حكت في فتحة السقف، وأنا عمري ما فتحت فتحة
السقف لأنني باخاف من الناس اللي بتتف من الblkونات.. ما هو أنا
مش عاملها متتففة، فكل جوانبها معيبة تراب، فكمام القميص حكت
فيها وأنا نازل فبقت سودة.. كده يبقى فاضل وشي.. نفسي أعرف
مين الناس اللي ركنت كده لزق في عربتي؟ مفيش مخ؟ وأخيرا
ظهر السياس، وعايز يلمع العربية، لكن بعد إيه؟! المفروض يلمعني
أنا.. المهم خرجت بالعربية لاقيت السياس بيقول لي: كل سنة وإن
طيب يا بيه. أنا طبعاً عارف هو عايز إيه.. وبسبب اللي عمله فيا ده
استهبلت بالرغم من إن الاستهبال مش من المثالية، لكن استهبلت
وقال لي برضه: «كل سنة وإن طيب يا بيه».. فرحت مكمل استهبال
زيه وساييه وماشي وطبعاً بصيت في المرأة لاقيت شفافيه بتحرك،
ولما لاقاني باصص له راح راسم ابتسامة على وشه.. ودي كانت
أول مرة في حياتي أشوف واحد بيعمل حاجتين عكس بعض في
نفس الوقت: بيلعن سلسفين جدودي وهو بيضحكلي! حقيقي رائع
وحقير.. على فكرة أنا باديله مرتب شهري.. بس كل سنة وإن
طيب دي تقريباً حوافز. المهم خرجت من العجاج وطلعت على
أول شارعنا العمومي لاقيت ناس عايزه تعدى الشارع، فوقفت لهم
عشان يعدوا وكأنهم يا عيني أول مرة حد يقف لهم فكان كل اللي
يعدي من قدامي يبص علياً وهو مبتسم بعدم فهم، ويقول: «الحق

واحد راكب عربية وبيقف للناس عشان يعدوا». رد عليه اللي جنبه وقال له: «ده تلاقيه لسة جاي من برة أو لسة متعلم السوادة جديد أو أهبل». الثاني قال له: «طب الرجال واقف مش هانعدي ولا إيه؟». رد عليه وقال له: «استنى لما يتحرك وبعدين نعدي من قدامه، أنا ما أعرفش أعدي من قدام العربات وهي واقفة، ناقص تقول لي أعدي من على خطوط المشاة!». المهم وأنا واقف عدى من جنبي شاب ماسك رزمة ورق صغير وراح رامي ورقة في شباكي جت في عيني طرفتها، وقلت له: «الله يسامحك». وطبعاً ماسمعيش لأنه كان بيطرف عين اللي ورايا، ولو سة هابص على عيني في المرايا، وابتدى صوت الكلاكسات اللي ورايا يعلى أكثر وأكثر، ده غير الشتايم.. ما تطلع يابني آدم.. ما تتحرك يا حمار. اللي يعدي من جنبك ويروح تافف عليك، ويقول لك: يلعن أبو اللي ركبها لك. رحت طالع وراح أخينا معدي وأنا باتحرك لاقيت الشارع واقف بسبب واحد داخل في الممنوع وبيعand مع واحد جاي في الصبح. الغريب بقى إن اللي جاي في الممنوع هو اللي بيشوبح اللي جاي في الصبح! وقعدنا كده ربع ساعة، والمشكلة ماتحلتش وأنا واقف لا عارف أرجع الجراج ولا أخرج من الشارع. أنا ليه بيحصلني كده؟! ده أنا عايز أبقى مثالي.. ده جزاتي يعني؟! نزلت على السلم وقميصي أسود، واتف عليا، وسمعت شتيمتي بودني، واتطرفت عيني، كل ده ليه؟! عشان أنا مثالي.. أمال لو كنت مثالي جداً كان حصل لي إيه؟! رحت طافي العربية وراجع على البيت، وعديت من فوق كوم الزبالة، وعورت كتفي الثاني لأنني كنت بافادي الزبالة اللي اتسرق صندوقها، ولاقيت مرتضى وانشراح لستة واقفين، رحت

طالع على السلم ودخلت شقتى زي ما خرجت. خرجت بقميص أبيض ورجعت بيه أسود.. اكتشفت إن دور المثالى ده دور صعب قوي، عمري ما هاعرف أمثله حتى لحد آخر شارعنا.. مش لحد آخر السنة.. كل ألفين وعشرين سنه وانتو طيبين.

جرس الفسحة (*)

من الجائز جداً أن تكون سعادتك بالنسبة للآخرين مأساة. وللسعادة منابع مختلفة، وكل إنسان له منبئه الذي يستمد منه ما يسعده. فهناك من يسعدهم كثرة المال أو كمال الصحة، أو قوة التفود، أو الستر أو النعيم، أو خلقة الأولاد أو امتلاك العقارات، أو السفر أو الجنس، أو النجاح.. أو حتى لمجرد سماعهم أغنية تطربهم.. وآخرون يسعدهم رؤية الآخر سعيداً، وهو نوع من السعادة نادر الوجود. ورغم ندرته إلا أنك تجده بقوة وبوفرة في الوالدين.. لذلك لا تقل لهما «أف ولا تنهرهما»، وهناك سعادات أخرى مختلفة، فهو لا يجدون سعادتهم في الحقد، فترى حاقداً سعيداً بحقده، وآخر غالباً سعيداً باغله، وقاتلًا متلذذًا بقتله، وعاصيًا سعيداً بمعصيته، ومذلاً سعيداً بإذلاله، ومسوخياً تسعده مسوخته لنفسه أو ساديًا تسعده ساديته تجاه الآخرين، وهناك أيضاً سعادات يستمدوها الناس من تعاسة الآخرين. قرأت عنواناً لموضوع في

(*) تم نشر هذه المقالة بتاريخ: ٦ من يناير ٢٠١٠.

جريدة مصرية لم تسبق شقيقاتها من الجرائد في مسح الزجاج بالماء أو تلوثت ببقع زيت الطعمية في المحلات أو تغطية أحد الموتى في الشوارع. كانت هذه الجريدة أسعد حظا في مصيرها من زميلاتها، فقد كانت تنظر لي وأنا أفترشها أرضا لأصلني عليها مكيراً وراكعاً وساجداً في صلاة الجمعة في الشارع، ولكنها كانت أتعس حظاً من شقيقاتها بهذا الخبر الذي كتب فيها والذي حاولت أن لا أقرأه حتى لا أخرج عن تركيزي في الصلاة، ولكن صرخ الخبر كان أقوى من خشوعي، فقرأته:

«مدرس بإحدى المدارس الابتدائية يمسك طالباً واضعاً بيده
خلف ظهره ويجعل زميلاته الطالبات في الفصل يصفعونه
بالقلم على وجهه».

هذا العنوان الذي يعلو الموضوع حدد انطباعي المسبق عن الموضوع المكتوب أسفله أنه أكيد كوميدي، وذلك من صعوبة تصديقه أو أن يكون يحمل في فحواه أي جدية واقعية، ولكن للأسف بات انطباعي خاطئاً حزيناً بعد أن قرأته.. وجدته حقيقة مأساوية.. وأنا من فرط استحالة حدوثه ظننته كوميدياً! شخصيات هذه المأساة كانت مدرس وطالب في الابتدائي يدعى «حسن» وأبو الطالب «أبو حسن» وظابط. وكانت أماكن الحدث هي مدرسة وفصل وقسم شرطة ومتزل حسن. الموضوع تجسدت أحاديثه المأساوية من خلال شخصياته الدرامية الفاعلة والمفعول بها والشاهد على الحدث.

تحكي المأساة عن يوم أغبر من الأيام الغابرة اللي في المدارس وعن لحظة سوداء من اللحظات السوداء اللي في الفصول.. وعن

مدرس أسود من بعض المدرسين السود بتوع الأيام دي.. ومدرس يعني معلم بيعلم علم.. مش بيعلم على وشوش التلامذة بالأقلام.

تحكي المأساة عن يوم أغبر من الأيام الغابرة اللي في المدارس.. وعن لحظة سودة من اللحظات السودة اللي في الفصول.. وعن طالب؟ طالب بيتعلم علم.. مش بيتعلم على وشه بالأقلام.

تحكي المأساة عن يوم أغبر من الأيام الغابرة اللي في الأقسام.. وعن لحظة سودة من اللحظات السودة اللي في مكاتب الأقسام.. وعن ظابط.. وظابط من الظبط.. اللي بيضبط.. وهناك نوعان من الظبط.. ظابط يضبط الحال العدل.. وللأسف بيهميله.. وظابط بيضبط الحال المايل والحمد لله بيعدهله.

تحكي المأساة عن يوم أغبر من الأيام الغابرة اللي في البيوت.. وعن لحظة سودة من اللحظات السودة اللي في الغرف.. وعن أب.. أب كان قدوة، ومن المؤكد أنه أصبح في عين ابنه عبرة.

قررت أحط نفسي كل مرة مكان شخصية من شخصيات هذه المأساة الواقعية.. وسأبدأ بالمدرس.. كيف سأتخيل نفسي مكانه؟ لا بد وأن أعرف من هو وما هي أبعاده حتى أتمكن من تجسيد شخصيته، فوجدت نفسي لا أملك أية مشاعر أو أحاسيس، ولكني سأحصل على سعادتي اليوم في هذه المدرسة وهذا الفصل حتى ولو كانت على حساب طفل صغير. ماذا أفعل الآن؟ لا بد من إيجاد فكرة تُسعدني.. ما هي؟ ما هي؟ ها هي.. أنا هاجيب عيل من العيال دي وأخلني كل الفصل يضربه بالقلم على وشه.. وواااو.. إذن لا بد من اصطياد فريسة.. وفعلاً اصطدت الفريسة وجئتها لحد عندي وهي

مش مخونة اللي هايحصل فيها.. اصطدت لها خطأ تافها وعيطًا علشان ما حسش بأي ذنب، مسكت الطفل من إيديه جامد بعد ما خليته يحطهم ورا ضهره، وعلشان الضحك يبقى للركب هاخلي البنات بس هما اللي يضربوه.. وناديت على بنت تيجي تضربه بالقلم على وشه.. كان بيحاول يفلفص بس على مين ده أنا جامد أوي.. كل بنات الفصل ضربوه.. وضحكت ضحك.. بس الحلو ما يكملش.. اضطررت أسيه لأن جرس الفسحة رن.

ودلوقي هاتخيل نفسي مكان الطفل حسن. أنا دلوقي طفل رايع المدرسة علشان أتعلم. نده عليا الأستاذ وقال لي: تعالى أنت بتتكلم مع اللي جنبك ليه؟ قلت له: أنا ما تكلمتش! زعق وقال لي: «يعني أنا هاتبلّى عليك؟»، مسک إيدي بعد ما رحتله وخلی کل بنت تضربني على وشي وهي بتتص في عيني، وكنت كل ما أقفل عيني يقول لي: افتحها. حاولت أفك إيدي من إيده لكن هو كان أقوى مني بكثير. استسلمت للضرب بعد ما اتحايلت عليه كتير وأنا بعيط، بس هو كان أقوى في حكمه.. بعد ما استسلمت للضرب ما كنتش عايز حاجة غير إنه يسيبني بس أغمض عيني. البنات نظراتهم كانت بتوجعني أكثر من الضرب. مش عايز أشوف نظراتهم ليها وهمما بيضربوني، كانوا بيعملوا ده غصب عنهم. بنت واحدة اللي رفضت تضربني، قال لها هاوقفك بداله.. خافت تنكسر زبتي.. فضربتني.. وبصت لي وحركت شفائيها من غير ما تطلع صوت وقالت لي: غصب عنني. قلت في سري أنت فين يارب؟ فرن جرس الفسحة.

ودلوقي هاتخيل نفسي مكان الأب «أبو حسن» لاقيت نفسي

بصرخ لحد كبدي ما انشق، قلت: آآآآآآآآآآآآآآ.. آه يابني..
حضرته وبوست وشه اللي انضرب بعدد بناات الفصل. باصلي..
حسيت إنه كبر ألف سنة.. ابني اتكسر. شفت في عينه نظرة انكسار
وفي قلبه وجع، لسة بدرى عليه أوى.. نظرة انكسار مايحسهاش غير
عسكرى بلده اتهزم، نظرة لم تكن ستسكن عينيه أبداً في هذه المرحلة
المبكرة من عمره.. فالانكسار يأتي للكبار.. وهو طفل.. وابني. ما
أصعب أن يشعر الأب القدوة أنه لا يقوى على فعل شيء فيصبح عبرة.
ودلو قتي هاتخيل نفسى مكان الظابط اللي بيعمل محضر ضد
المدرس.. أنا الظابط.

س: ابنك اسمه إيه؟

ج: تلميذ في المدرسة.

س: عنده كام سنة؟

ج: امبارح كان عشرة والنهارده تم ألف.

س: بتهم مين؟

ج: بتهم الابتسامة لأنها فارقته، و بتهم البراءة لأنها سابتة، و بتهم الطفولة لأنها كبرته، و بتهم اللعب لأنه مات عنده، و بتهم العمى لأنه ماجلوش لما النظر آذاه، و بتهم الكلام لأنه سكت في حلقة، و بتهم نفسى لأنى خلفته، و بتهم ابني لأنه نزل حي من بطنه أمه، و بتهم قلبي لأنه حبه، و بتهم قلبه لأنه مش حجر، و بتهم أبوتى اللي خلتنى أحبه، و بتهم بنوته اللي خلته يشوفنى عاجز، و بتهم جرس المدرسة اللي مرنس من قبل أول قلم يلمس خد ابني، و بشكر ربنا إن الجرس رن

لما قال له: انت فين يارب؟ جرس الفسحة.. فسحة كل من فيها يلعب عدا هو.. رأيته قابعا في أحد أركان الفصل مغمضا عينيه ويبكي خائفا يرتعش، يسأل نفسه آلاف الأسئلة العجوزة العاجزة عن الإجابة.. كيف سأنسى؟ كيف سأكبر؟ كيف سأصبح عالما؟ كيف سأصبح ظابطا شجاعا؟ كيف سأصبح قاضيا عادلا؟ كيف سأصبح مهندسا أبني؟ كيف سأصبح دكتورا أعالجا؟ كيف سأصبح جنديا أدافع عن وطني؟ كيف سأصبح أبا فيحدث لابني ما حدث لي؟ كيف سأصبح طفلا؟ أتعلمون.. تمنيت أن يكون هذا المدرس عدوا إسرائيليا أسبق كل المصريين في قتله وأكون قاتلا سعيدا بقتلي له، حاقدا عليه سعيدا بحقدي تجاهه، مغلولا فرحا بغلي منه، أقتله وأصبح بطلا أو يقتلني فأصبح شهيدا.

أتعرفون.. سألني مرة مدرس في الفصل سؤالا ولم أعرف إجابته فتعصب المدرس وركل التختة التي كنت أجلس عليها بقدمه. وقتها شعرت بإحراج وخجل مرير أمام التلاميذ، تمنيت أن أموت ويدفنوني في التختة. لم أنسى حتى يومنا هذا نحافة هذا المدرس ولا لون بدنته «الرمادية المقلمة» ولا اسمه «يحيى» ولا مادته «الأحياء» ولا ترتيب الحصة في اليوم الدراسي «الحصة الرابعة» ولا موقع اليوم من الأسبوع «الثلاثاء»، لم أنسى وقد مر أكثر من ربع قرن.. ولم أنسى.. ولن أنسى.

لقد تخيلت نفسي ظابطاً ومدرساً وطفلًا وأباً، فكرحت خيالي الذي أذرف دموعي. أريد أن أسأل حسن: «تفتكر احنا ليه بنحبس الأسد يا حسن؟»، علشان نذله ونهينه ولا علشان بنخاف منه؟ أكيد

علشان بنخاف منه، والمدرس خاف منك، ولا ماكنش مسك إيدك
وحبسها ورا ظهرك وماخلتش تدافع عن نفسك. وحتى لو كان
المدرس مامسكتش إيدك.. أنا كنت واثق إنك ما كنتش هاتعمل
حاجة للي ضربوك.. عارف ليه؟ لأنهم بنات والراجل مايضر بش
بنت، الراجل يضرب راجل زيه.. بس للأسف الفصل ماكانش فيه
رجالة غيرك. أنت أسد يا حسن، حقيقي أسد، وانتهت الصلاة مع
نهاية قراءتي للموضوع. وجدت نفسي أنظر للجريدة التعيسة وأنا أقرأ
الشهاد وكأنني سمعتها تقول يا ليت كان مصيري بلّا بالماء أو بقعا
بالزيت أو تلطيخا بالدم، ليتنى نظفت زجاجا أو كنت قرطاسا لشوية
طعمية أو حتى غطاء لميت. وضاعت صلاتي كما ضاعت طفولة
حسن، ضاعت صلاة الجمعة ووقفت ولكنني سمعت تكبيرا؛ «الله
أكبر»، فسألت مصليا بجواري قبل أن يرفع يديه بجوار أذنه للتکبير:
ما هذا التکبير؟ لماذا يکبر الإمام؟ ألم تتهي صلاة الجمعة؟ فقال:
نعم.. دي صلاة جنازة. قلت له: على مين؟ قال لي: طفل صغير الله
يرحمه، کبر کبر. فکبرت.

سنة ١٩٠٠ حاجة و ٨٠ (*)

سنة ١٩٠٠ حاجة و ٨٠ كان عندي شوية سنين ما يتعدو ش
الخمستاشر، قررت أكتب مذكرا تي، وكان الغرض الرئيسي من
وراكتابتها إني أودي الناس كلها في داهية لما أنشرها. ما هي دي
كانت كل معلوماتي عن كتابة المذكرات، إن الكلام اللي مكتوب
جوهاها بيودي الناس اللي مكتوب عنهم في داهية، واللي بيكتبها
بيقتل في الآخر. علشان كده كنت هامضيها باسم واحد صاحب.
المهم.. بعد قرار كتابة المذكرات كان من الطبيعي إني أدور على
حاجة أكتب فيها، فاشترت تلات «تقلام»: «أحمر وأزرق وأسود»؛
الأحمر علشان أكتب فيه أسماء الناس اللي هاير وحوا في داهية
علشان تكون أساميهم واضحة لما البوليس يقلب في الأجندة؛
لأنه مش هايكون عنده وقت يقرأ كل اللي مكتوب فيها. والأزرق
أكتب فيه عماليهم الزرقة اللي هاير وحوا في داهية بسبب زرقاتها،
والأسود بقى هاكتب فيه نهايتهم السودة. وبعد ما اشتريت «التقلام

(*) تم نشر هذه المقالة بتاريخ: ١٣ من يناير ٢٠١٠.

الثلاثة» اللي هاكتب بيهم كان فاضل أشتري حاجة أكتب فيها، فكانت الأجندة «الخضراء». وصحيت الصبح يوم ١٩٠٠/١/١ حاجة و٨٠ بعد ما نمت بدرى قبلها بيوم عشان أصحى بدرى آخذ اليوم من أوله وأكتب قبل مايفوتني حاجة. جبت «التقاليم» اللي هاكتب فيها والأجندة اللي هاكتب فيها وفتحت الأجندة على أول صفحة، وبصيت للأقلام الثلاثة المحظوظين قدامي على المكتب.. احترت أمسك أنهى قلم، الأحمر ولا الأزرق ولا الأسود! مسكت الأحمر. طب أكتب اسم مين؟ ده لسه ما فيه حد عمل حاجة.. أنا الوحيد اللي عملت - إني صحيت من النوم - طب أكتب اسمى! مش معقول أبقى أول واحد أو ديه في داهية أنا وصحياني من النوم عادي، لا فيه فعل أزرق ولا نهاية سودة، بالعكس دي بداية يوم وبداية مذكرات.. فكان لازم آلاقي قلم بلون محاید أكتب بيها. ففتحت درج المكتب لاقيت قلم رصاص مبرى، مسكته وبصيت لأول صفحة وكتبت:

«بسم الله الرحمن الرحيم.. إنه يوم الجمعة الموافق ١٩٠٠/١/١ حاجة و٨٠ استيقظت من النوم في تمام الساعة العاشرة صباحاً حالكي أبدأ في كتابة مذكراتي ثم جلست على مكتبي ونظرت إلى الأقلام أمامي، الأحمر والأزرق والأسود، واحترت في اختيار واحد منهم ففتحت درج مكتبي، فوجدت قلماً «رصاص» فأمسكت به، وفتحت أول صفحة من الأجندة ونظرت لها ووجدت نفسي أكتب..

«بسم الله الرحمن الرحيم.. إنه يوم الجمعة الموافق ١٩٠٠/١/١ ١٨٠..» نهضت من النوم في تمام الساعة العاشرة صباحاً حالكي

أبدأ في كتابة مذكراتي ثم جلست على مكتبي ونظرت إلى الأقلام أمامي، الأحمر والأزرق والأسود، واحتارت في اختيار واحد منهم ففتحت درج مكتبي، فوجدت قلما «رصاص» فامسكت به، وفتحت أول صفحة من الأجندة ونظرت لها ووجدت نفسي أكتب..

بسم الله الرحمن الرحيم.. إنه يوم الجمعة الموافق ١٩٠٠/١/١ حاجة و٨٠ استيقظت من النوم... إيه ده؟ ده أنا باعید نفس الكلام تاني.. اكتشفت إن المذكرات لازم لها أحداث يا إما الأجندة هاتخلص وأنا لسة في مكانى.. والحدث الوحيد اللي عملته إني صحيت من النوم، وقعدت على المكتب وبصيت إلى أقلامي الأحمر والأزرق والأسود، واحتارت في اخت.. يادي النيلة أنا هاعيد نفس الكلام برضه! سبب القلم الرصاص، وقلت لازم يبقى في أحداث أتحط فيها وأكتب عنها وعنى.. وابتديت فعلا رحلة البحث عن الأحداث، رحلة ابتدت من وقتها الحد النهاردة، أحداث تشيلنى وأحداث تحطنى، أحداث قصيرة تفرحنى، وأحداث طويلة تكئنى.. مواقف حلوة بتبعدى بسرعة البرق ومواقف حقيرة زي الشلالات ما بتخلصش، لحظات تمر كأنها سنين، وسنين تفرط من عمرك كأنها ثوانى.. رحلة طويلة لم تنتهي حتى هذه اللحظة. رحلة طويلة خلصت فيها ورق لأجنادات كتير باللون كتير، إشي أجندات خضرا وغيرها حمرا ومن بعدיהם لبني وسودة ونبيتي تحفة ولا البنى! ولو شوفتوا بقى الزرقة.. تجنن.. كل الألوان.. مليت أجنادات لكل السنين من أول ١٩٠٠ حاجة وتمانين لحد النهاردة.. وفجأة مش عارف إيه اللي خلاني أجيب كل الأجنادات اللي كتبتها وقعدت أقلب وأقرأ بين أيامها الممتورين على صفحاتها اللي كانوا مبيضين وبقوا مزركين على محمرین. ابتدت بالأجندية «الصفراء»، ومش هاقولكو الأجندة

كانت بتاعت سنة كام؛ لأنني اكتشفت إن ترقيم السنين ما بيغيرش كلام
كان مكتوب بقلم رصاص ابتدى بسن رفيع وانتهى بخط تخين.

«الأجندة الصfra» سنة من السنين، صفحة ٥٦ مكتوب فيها:

«بسم الله الرحمن الرحيم.. مقهى صغير يجلس عليه بعض
المسنين كانوا يتتكلموا عن حنية وطيبة أيام زمان لما كان ما فيش
ولا دار للمسنين، لما كان ابن والبنت حنینين. عم متولي أب
قديم عنده من السنين يجي خمسة وسبعين، شفط شفطة من الشاي،
وقال لصديقه عم إبراهيم: إنت عارف يا إبراهيم الوحدة مخليانى
ميت بالحياة، نفسي خيري ابني يقول لي: تعالى أقعد معايا كام يوم.
عارف يا إبراهيم أنا مش هاروح بس نفسي يقولها. إبراهيم قال له:
ما تزعلاش خلاص فاضل شهر ولا اتنين ويفتحوا أول دار للمسنين..
يااااااه يا خيري».

«الأجندة الزرقا» صفحة ٦٧ مكتوب فيها:

«استغفر الله العظيم.. قالها الأستاذ جرجس لما قطعوا الشجرة
اللي كانت بتظلل على عربته التمانية وعشرين، أصلهم كانوا عايزين
يطلعوا بالدور العشرين، وخلات الأسمنت مش عارف يقف غير
في الحنة اليمين بين الممرتين اللي فيها شجرة الياسمين، فقطعوا
الشجرة وطيروا العصافير اللي كانوا فيها مععششين.. يااااااه يا شجرة
الياسمين».

الأجندة «الحمرا» صفحة ٧٣.. مكتوب فيها:

«حسبي الله ونعم الوكيل.. قالها شاب أسمه صعيدي لما شاف

بنتين ببنطلونين محزقين من ضهرهم ماشيين، سبقهم بخطوته علشان
يغض العين. شاف وشوشهم لقاهم شايين بشنبين.. متبتيين.. راح
ماخرا خطوطه عشان مايسوفش وشهم اللعين وقال لنفسه ياريتني
ما سبقتهم، وفضلت فاكرهم بنتين متحزقين.. ياااااه يا عين».

الأجنة «المحمحي» صفحة ٨٢ .. مكتوب فيها:

«لا حول ولا قوة إلا بالله.. لإمتى هانفضل ساكتين؟ ولا هو يعني
علشان ليه كرش سمين يقوم يعمل اللي عايذه ويأخذ حقنا ويخرج
منها صاغ سليم. أمال فين السين والجيم؟ ولا الحرفين دول مخلوقين
للسكات والجحيم؟ فين قانون العدل يا محترمين؟ ارحمونا من
أبو كرش سمين، ده دخل القسم وخرج منه زي الشيرة م العجين.
إن كان هو بنى آدم طب ما إحنا كمان بنى آدمين ومخلوقين زيه من
طين ولا دي كمان هاتغيروها يا واصلين.. يااااااه يا ساكتين».

الأجنة «الفحلقي» صفحة ٩٥ .. مكتوب فيها:

«أعوذ بالله.. ده أنت لو كافري يا أخي هاتكون أحن من كده.. دول
ولاد أختك اليتامى المحتاجين، واكل فلوسهم وعامل نفسك عليهم
وصي وأمين.. وانت حرامي وبيقول ولا الضالين آمين، وأنا لسه
سامعك بودني لخامس مرة بتسب الدين.. يااااااه يا دين».

الأجنة «الفزدقى» .. صفحة ١٠٣ .. مكتوب فيها:

«واحنا فايتين على الحدود مستمررين في الصعود اختفى النيل
الجميل من تحتنا، والمدن والريف وأول عمرنا، وابتدى شيء ينجرح
جوه القلوب.. وابتدينا أسئلة مالهاش ردود.. نمناع الشباك نخبي

دمعة فرت متنا.. يا سلاااام على فرقة الأصدقاء.. صحيح.. فين النيل والريف؟ فين عمرنا؟ فين ردود الأسئلة؟ لإمتى هاتفضل تفر الدموع متنا.. ياااااه.. الأصدقاء».

الأجندة «البندقي» صفحة ١٠٧ .. مكتوب فيها:

«بجنـيه عـيش.. بـجنـيه فـول.. بـجنـيه طـعمـيه.. بـجنـيه جـبـنة «أـريـش».. وربع جـنـيه شـاي.. وربع زـيت لـلـفـول.. ومش مـهم المـلح.. مـرـ الأـيـام غـانـينا عـنـه.. ومش مـهم الشـطـة.. كـفـاـيـه حـرـقـة الفـقـر مـلـهـلـبـانا.. وربع جـنـيه سـيجـارـتين؛ وـاحـدـة الصـبـح وـالـتـانـيـة بـالـلـيل فـي الـبـلـكـونـة.. يـبـقـى كـدـه كـامـ فيـيـ اليوم ياـعـبـدـ الرـازـق؟ أـربـعـة جـنـيه خـمـسـة وـسـبـعين قـرـش.. قولـ خـمـسـة جـنـيه بـالـعـلاـج وـالـعـلـام وـالـفـسـح.. اـضـرـب بـقـى فـيـ تـلـات طـقـات.. يـعـنـي خـمـسـتـاشـرـ جـنـيه فـيـ الـيـوـم ياـعـبـدـ الرـازـق.. فـيـ تـلـاتـين.. يـعـنـي رـبـعـمـيه وـخـمـسـين جـنـيه فـيـ الشـهـر ياـعـبـدـ الرـازـق.. كـتـيرـ؟! طـبـ اـحـسـبـ عـلـى طـقـتين كـدـه.. يـبـقـى تـلـتـمـيـتـ جـنـيه فـيـ الشـهـر ياـعـبـدـ الرـازـق.. طـبـ لوـ طـقـةـ؟! يـبـقـى مـيـه وـخـمـسـين فـيـ الشـهـر ياـعـبـدـ الرـازـق.. طـبـ ماـفـيـشـ حاجـهـ أـقـلـ منـ طـقـهـ؟! فـيـهـ.. إـنـكـ تـطـقـ تـمـوتـ ياـعـبـدـ الرـازـق.. ياااااه.. أـخـيـراـ اـتـحلـتـ».

الأجندة «البنفسجي» صفحة ١٠٩ .. مكتوب فيها:

«إـنـا لـلـه وـإـنـا إـلـيـه رـاجـعـون.. مـاتـ وـهـوـ بـيـشـرـب.. كـانـ بـيـشـرـبـ مـيـه وـشـرقـ مـاتـ.. حـدـ يـصـدـقـ.. دـهـ كـانـ بـصـحـتـه وـعـافـيـتـه.. كـانـ زـيـ الفلـ طـولـ بـعـرـضـ.. إـيـهـ اللـيـ شـرـقـهـ وـمـوـنـهـ؟ أـكـيدـ حـدـ جـابـ فـيـ سـيـرـتـهـ فـشـرقـ مـاتـ.. حـدـ زـيـ مـينـ؟ أـيـ حـدـ بـيـكـرـهـ.. هـوـ فـيـ حـدـ بـيـكـرـهـ؟ ياااااه.. كـتـيرـ».

لاقيت في أجناداتي أسامي كتير محمرین وألافات السطور مزرقين
ومافيش ولا نهاية من النهایات المسودين. الأقلام «الحمر» في درج
مكتبي كتير فاضيين، والأقلام الزرقة أنا بيهم مبيضين.. أما القلم
الأسود اليتيم اللي من سنة حاجة وثمانين.. زي ما هو.. لا كتب حرف
ولا كلمة ولا جملة على أي حد من اللي أساميهم محمرین وأفعالهم
مزرقين.. مع الزمن اتمسح الكلام اللي مكتوب بالرصاص وفضلت
الأسامي الحمر على ورق الأجندة متفرقين.. وسطور زرقة متجمعين
زي كتل الدم في الجسم الأبيض محبوسين.. أما النهایات السودة
ماتكتبش.. أكتبها ازاي إذا لم تذكرها السنين.. وأخر أجناداتي كانت
الأجندة اليمبى أم سوستة بتاعة سنة ٢٠٠٠ و٩.. حطتها فوق الرف مع
إخواتها القدام الملونين.. وأبدأ سنة ٢٠٠٠ و١ ببسم الله الرحمن الرحيم..
وأجندة جديدة وقلمين تانين.. أحمر وأزرق مليانين.

حُسْل أَبِيض (*)

ما أحلى اللقاء وما أصعب الفراق! كان لقائي به لأول مرة مرحًا ومبهجاً، لا يقل مرحًا عن ابتسامته المشرقة التي تُظهر بياض أسنانه ولا يقل بهجةً عن تلك البهجة التي تنبعث من قلبه، قلبه الذي باتت دقاته تضعف تدريجياً حتى توقف عن كل شيء.. عن الحياة أولاً والبهجة ثانياً، والطيبة والتسامح والإيمان، ولك أن تخيل ما كان يملأ قلبه المتوقف هذا حتى تاسعاً وعشراً.. توقف قلبه غادرًا بالحياة ومغادرًا منها. توقف قلبه ملوحاً وموداعاً لكل الأيام التي لن يعيشها.. أيام لو كانت طيبته تنبض فيها بدلاً من قلبه لبلغ من العمر أرذله. كان لقائي به في مكتبي مرحًا ومبهجاً. سأله الساعي: ماذا تشرب؟ فقال: قهوة مطبوطة.. وقبل أن ينصرف الساعي لاحقه بـ«لو سمحت»، فتوقف، فقال له: في كباية مش في فنجان، وحاول تحافظ على الوش، وعلى نار هادبة وحياتك. عرفت إنه كييف قهوة فقلت للساعي إذن اعملها من البن بتاعي. وقبل أن ينصرف الساعي أوقفته بـ: «بقول لك إيه»

(*) تم نشر هذه المقالة بتاريخ: ٢٠ من يناير ٢٠١٠.

اعملني أنا كمان قهوة. فقال هو للساعي: «اعملها له من البن بتاعي». فضحك وضحك الساعي. كنت قد انتهيت توا من شرب فنجان قهوة، ولكن طريقة طلبه للفهوة شجعني أن أشرب معه فنجاناً آخر. قهوته كانت مطبوعة بكلامه وملابسها وشخصيته التي ظهرت من أول لقاء لي به. وقهوتي أشربها زيادة كالترحيب الذي رحب به، ليس لأنني أعرفه ولكن لأنني شعرت أنني أعرفه. جلسنا سوياً نتحدث عن الفن والحياة. حتى لي كيف كان يحب التمثيل من صغره، كان حُلماً بالنسبة له.. ولكنه كان كابوساً بالنسبة لوالده. كان رافضاً وغير مؤيد لحلم ابنه الذي لم يكن قد ولد بعد. وكبر الابن وظل الحلم قابعاً داخله في انتظار أن يُولد، وُلد الحلم أخيراً وهو جالس معه. ولد حلمه عندما عرف أنه سيقوم بتمثيل دور في الفيلم الجديد. كان حلمه ضاحكاً مثله، مبتسمًا مثله، نظرت له فوجده يبدو كالطفل المحبوب الذي خرج إلى حديقة شاسعة. لم أر من قبل رجالاً في مثل سنه يبدو كالأطفال هكذا. لو لم أكن متأكداً أنه يجيد الكلام والمشي لشككت أنني أجلس بصحبة طفل يشرب القهوة! حتى لي عن حلمه الصغير الذي ولد لتوه. قال لي إنه «يحب التمثيل وكان يريد أن يصبح ممثلاً»، وفي الغالب دائمًا ما تقترن الكلمة «مشهور» بـ«ممثل».. ولكنه قال ممثلاً فقط. لم يكن يطمح في الشهرة ولكنه كان يطمح في التمثيل فقط.. كان سيمثل دوراً مع الراحل أحمد زكي في أيام الشباب ولكن والده رفض كما كان رافضاً لحلمه. كان يبحث تارة ويستقر تارة عن فرصة يمكن أن يُولد حلمه على يديها ولكنها كانت لا تأتي وإن أتت فإنها لن تنتظر حتى يغير والده رأيه من الرفض للموافقة.. فترحل.. زهد الحلم بداخله ولكنه لم يتركه ويرحل، ولم يتمت ولم يتبدل بحلم آخر. كمن وسكت

بداخله حتى ولد بعد أن أصبح صاحبه في الثامنة والخمسين من عمره. أخذ يقلب فنجانه ثم شرب آخر رشفة فيه ثم وضعه أمامه وقال لي: «أنا مش هايمثل».. فاجأني بقوله هذا الذي لو كنت صبرت لحظات لوفرت تلك المفاجأة لشيء آخر يستحق المفاجأة بقدر ما تستحقها هذه العبارة التي فاجأني بها. في تلك اللحظات التي لم أصبرها نظرت له وأنا حيران وقلت لنفسي: «مش هايمثل» بعد كل هذه الحكايات عن حلمه، ماذا يقول هذا الرجل؟ هل أتي إلى هنا لشرب القهوة فقط ويغادر؟ إذن لماذا أخذ السيناريو وأضعاع وقته في قراءته؟ لماذا عشمنا بأنك ستمثل دور والدي في الفيلم، وزاد العشم عندما وجدته يشبهني كأنه والدي وأنا ابنه أو بمعنى أدق أنا الذي أشبهه.. «مش هايمثل ليه؟»، هل ما زال والده على قيد الحياة ويريد أن يأخذ رأيه؟ أم ربما أخذ رأيه قبل أن يحضر إلى هنا ولم يوافق.. ولكنه أتي ليعتذر.. ولكنني أصبح الآن كبير الدرجة تجعله يفعل ما يريد وفي أي وقت يريد.. أم أنه ينفذ وصية والده في أن لا يمثل أبدا حتى بعد مماته؟ عندما وجدت نفسي قد غرقت في بحر من الاستفهامات التي من الواضح أنني لن أجده لها طوق نجاة أو منقذًا سوى أن أسأله هو شخصيا و مباشرة.. فسألته: يعني إيه مش هايمثل؟ قال لي: «يعني إن شاء الله هاكون طبيعي جداً في دور الأب.. أصل أنا أب وولادي في مثل عمرك؛ وهذا سيجعلني طبيعيا في الدور؛ لذلك فأناأشعر أنني لن أمثل». قلت لنفسي: حمدا لله أن تفكيري وأسئلتي واستفهاماتي لم تكن مسموعة وإلا قد اعتذر عن الدور والفيلم بسبب تسرعي وغبائي. فتحت جملته تلك التي فاجأتني باباً جديداً للحديث عن أولاده.. هؤلاء الذي كان وجودهم في حياته سبباً أساسياً أنه لن يمثل.. أو بمعنى أوضح حتى لا يقع أحد فيما وقعت فيه، أنه سيكون

طبعيًّا في دور الأب. وقد كان.. كان أباً حقيقياً في التمثيل وخارجـه.. أحبـيت هذا الرجل أقلـ بكثيرـ مما أحبـني.. واحترـمه أكثرـ بكثيرـ من حبه ليـ. انتهـى الفـيلـم الذي كان سـيـباـ في ولـادـة حـلـمهـ. كان دائمـ النـصـحـ ليـ كـالـأـصـدـقـاءـ المـقـرـبـينـ، كان صـدـيقـيـ الكـبـيرـ، وكان دائمـ ما يـسـتـشـيرـنيـ فيما يـعـرضـ عـلـيهـ من أدـوـارـ فـشـعـرـتـ أـنـنيـ أـبـوهـ الصـغـيرـ.. أـبـوهـ الـذـيـ لمـ يـرـفـضـ حـلـمهـ. قالـ ليـ يومـاـ: «نـادـينـيـ باـسـميـ وـلاـ تـسـبـقـهـ بـالـقـابـ». فـقـلـتـ لهـ: «لوـ كانـ ذـلـكـ سـيـزـيدـ منـ صـدـاقـتـناـ فـلـيـسـ لـدـيـ أـيـ مـانـعـ، وإنـ كـنـتـ تـرـيـدـ ذـلـكـ حتـىـ لاـ تـبـدـوـ كـبـيرـاـ فـيـ السـنـ فـلـيـسـ لـدـيـ مـانـعـ أـيـضاـ». وـلـكـنـهـ قـالـ ليـ: «لاـ هـذـهـ وـلـاـ تـلـكـ؛ فـأـنـاـ أـرـيدـ أـنـ أـنـادـيـكـ باـسـمـكـ بـدـوـنـ الـقـابـ وـلـكـنـيـ لاـ أـسـطـيعـ فـعـلـهـاـ طـالـمـاـ أـنـتـ تـنـادـيـنـيـ بـالـأـسـتـاذـ». فـقـلـتـ لهـ: «مـنـ هـذـهـ اللـحـظـةـ أـنـتـ لـيـسـ بـأـسـتـاذـ وـلـاـ أـنـاـ كـذـلـكـ». وـلـكـنـيـ سـأـلـتـهـ عـنـ السـبـبـ وـالـمـغـزـيـ وـرـاءـ طـلـبـهـ هـذـاـ، فـقـالـ ليـ: «هـذـاـ سـيـسـاعـدـنـيـ أـكـثـرـ عـلـىـ أـنـ أـبـدـوـ طـبـيـعـيـاـ فـيـ تـجـسـيدـ دـورـ أـبـوكـ.. فـأـنـاـ لـاـ أـنـادـيـ اـبـنـيـ بـ«يـاـ أـسـتـاذـ»ـ أـبـدـاـ مـهـماـ حـصـلـ». فـقـلـتـ لهـ: هلـ تـشـتـمـ اـبـنـكـ أـحـيـائـاـ؟ـ فـقـالـ ليـ: طـبعـاـ.. أـشـتـمـهـ جـدـاـ وـهـزاـراـ. فـقـلـتـ لهـ: إذـنـ لـوـ شـعـرـتـ أـنـنيـ اـبـنـكـ فـعـلـاـ وـنـحـنـ نـمـثـلـ أـمـامـ الـكـامـيـرـاـ فـلـتـقـلـ لـيـ مـاـ تـقـولـهـ لـابـنـكـ جـدـاـ كـانـ أوـ هـزاـراـ. وـبـدـأـنـاـ التـصـوـيرـ وـأـنـهـيـنـاهـ وـجـسـدـ دـورـ الـأـبـ بـإـتـقـانـ. وـلـمـ يـنـادـيـ إـلـاـ بـ«يـاـ أـسـتـاذـ»ـ، وـلـمـ يـسـمـحـ لـيـ أـنـ أـنـادـيـهـ إـلـاـ بـاسـمـهـ.. مـحـمـودـ الـفـيـشاـويـ.. الـأـسـتـاذـ مـحـمـودـ الـفـيـشاـويـ.. صـدـيقـيـ الـكـبـيرـ.. هـذـاـ أـسـمـرـ الطـوـيلـ النـحـيلـ الـمـرـحـ الضـاحـكـ الـراـحلـ. رـحـلـ قـبـلـ أـنـ يـكـبـرـ حـلـمهـ. قـابـلـتـهـ أـولـ مـرـةـ بـشـوـشـاـ مـرـحـاـ يـحـبـ النـاسـ وـالـحـيـاةـ وـقـابـلـتـهـ آخـرـ مـرـةـ فـرـأـيـتـهـ أـكـثـرـ مـرـحـاـ وـحـبـاـ لـلـحـيـاةـ.. وـلـاـ أـعـرـفـ لـمـاـذاـ قـالـ لـيـ: «لـاـ تـجـعـلـ شـيـئـاـ يـضـايـقـكـ؛ إـنـ الـحـيـاةـ لـاـ تـسـتـاهـلـ». أـعـطـانـيـ بـرـطـمانـاـ مـنـ الـعـسلـ الـأـيـضـ وـرـحـلـ.. وـكـانـ هـذـاـ آخـرـ يـوـمـ رـأـيـتـهـ وـسـمـعـتـ صـوـتـهـ،

، اليوم التالي فتحت تليفوني فوصلتني رسالة منه كان قد أرسلها قبل م الذي رأيته بيوم واحد. قرأت الرسالة فوجدت بها كالأتي : «عزيزي اذ أحمد.. أنا جايلك بكرة التصوير وجاييلك معايا برطمان عسل س لأن أكيد البرطمان اللي عندك زمانه خلص».

يحزنني كثيراً أنني أتحدث عنه بلفظ «كان» .. ولكنها مشيئه خالقه ذه هي الحياة. وهكذا يكون بعض من يملئونها؛ أشخاص يحدرونك غدرها فتغدر هي بهم، يطلبون منك أن تُقبل عليها وتبتعد هي عنهم. الإنسان لم أكتب عنه لأنه ممثل مشهور أو نجم لامع.. لم يكن بما مر موقاً.. لم يكن سياسياً أو عالماً مثابراً، لكنه كان إنساناً.. إنساناً هوراً بابتسمته، لاماً بحبه للآخرين، مرموقاً بطبعاته، مثابراً في صبره على حلمه، ظل سنينا طويلاً يتظر ولادته.. وعندما ولد تركه ورحل.. ات الحلم معه وهو ما زال رضيعاً.. محمود الفيشاوي.. الله يرحمه.. اتحة عليه وعلى حلمه.

كان نفسي أطلع عربجي (*)

يا ترى عمرك اتمنيت تطلع عربجي؟ أنا اتمنيت وكنت فاكر أن كل الورق المطلوب علشان الواحد يبقى عربجي ورقة تثبت أن الواحد بيعرف يسوق حصان أو حمار، بس أنا كان طموحي أناي أبقى بسوق حنطور مش كارو. كنت معجباً جداً بشكل الحنطور وخطوطه الانسيابية ولو نه ودناديشه والكلالكس بتاعه اللي كان بيضربه العربجي برجله. يا سلام على شكل العربجي وهو متربع على عرش الحنطور كده وناسك كرباجه في إيده ولا فتوات الحرافيش. حبيت أوبي الحنطور والعربجي لحد ما ابتديت أسمع جُمل من ناس كان وجود لفظ العربجي فيها لا يدل على أنه حاجة لطيفة، زي مثلاً: «بلاش شغل العربجية ده»، أو: «انت شكلك قليل الأدب وعربجي» أو: «ماتصاحبش الواد ده لحسن شكله كده عربجي»، أو: «انت إيه.. عربجي؟».. ولا جملة سمعتها على العربجي كانت بتبشر بالخير أو تشجع إني أطلعه. ردود الناس خلتني أسأل نفسي كتير هو العربجي

(*) تم نشر هذه المقالة بتاريخ: ٢٧ من يناير ٢٠١٠.

وظيفة ولا شتيمة؟ ولو هي شتيمة زي يا كلب ويا حمار ويا صايع وكده، يبقى الرجال اللي بيسوق الحنطور ده بيشتغل إيه!! اسم شغلاته إيه!! ولما إجابتني دائمًا كانت بتقول إنه «عربجي» قلت أسائل حد غيري، بس غيرت السؤال من «هو العربجي وظيفة ولا شتيمة؟» لـ «هو العربجي ده حلو ولا وحش؟». كلها كانت ردوداً وإجابات مش مقنعة بالمرة.. ناس قالولي طبعاً مش حلو علشان طول النهار بيقى قاعد في الشارع.. أمال يقعد فين؟ في جروبي؟ واللي يقول وحش طبعاً لأنه قليل الأدب وبيشتم. طب وهو مين ما بيشتمنش؟ ما كله بيشتمن، وبغض النظر عن الجملة التربوية اللي هاكتبها دلوقتي إن الشتيمة شيء سيء وقبيح بس موجودة وبحصل. في سواقين ميكروباص بيشتمنوا وسواقين تاكسيات بيشتمنوا وميكانيكية وسباكيين ونقاشين بيشتمنوا ودكاترة ومهندسين بيشتمنوا وأعضاء مجلس شعب بيشتمنوا وزراً بيشتمنوا وأبهات وأمهات بيشتمنوا! ولا الشتيمة بقى ليهاناس وناس؟ ناس تشتم فتبقى الشتيمة طالعة من بقهم زي العسل ودمهم خفيف أويء، وناس تشتم تبقى شتيمتهم وحشة وقولالات الأدب. مش عارف أنا محير نفسي ليه!! ما أسائل صاحب الشأن.. سألت عربجي وقلت له: هو انت بيشتغل إيه لو سمحت؟ قال لي: أنا خريج آداب بس حالياً عربجي. قولت له: هي العربجة بتاخذ آداب؟ قال لي: وتجارة وعلوم وحقوق وزراعة، بتاخذ كله.. أي حد خريج أي كلية ممكن بيشتغل عربجي عادي المهم يبقى عنده حصان أو حمار.

موضوع العربجي ده كان شاغل تفكيري من زمان أويء، من صغرى تقريباً، لما كنت بركب الحنطور سواء كنت راكب أو متشعبط

ورا. لدرجة إنه لما كان حد من الضيوف بيسألني: نفسك تطلع إيه؟ كنت برد بمنتهى الطموح والسعادة وأقول لهم: نفسي أطلع عربجي، وكان كل اللي حواليها يضحكونا، وكانت أمي بتصلني بصمة.. كانت كبيرة على إني أفهمها، بس كان معناها بيوصلي. نظرتها كانت بتقول: «إيه اللي أنت بتقوله ده؟!». أنا ماكتتش حاسس إني بقول حاجة عيب. هو أنا مثلاً قلت نفسي أطلع حمار؟ أنا بقول عربجي.. ماكتتش عارف أمي بتصلني كده ليه! وماكتتش فاهم الناس اللي حواليها ضحكوا عليه. هو العرجي ماله!! وخش في إيه؟ وبعدين هو لو وخش ليه أمي كانت بتسيبني أقعد جنبه في الحنطور وإحنا رايحين لجذتي يوم الخميس؟ ولما كنا بنروح الهرم كنت بشوف الأجانب واقفين بيتصوروا جنب أبوالهول والأهرامات والعرجي.. يكونش الأجانب فاهمين قيمة العرجي واحنا لأ!! لا مش جايز.. ده أكيد.. لأنني عمري ما شفت واحد مصربي بيتصور جنب عربجي. كنت هاموت وأعرف أمي زغرتي ليه! والناس ضحكوا عليه! هي المشكلة فيها ولا في العرجي؟ حبيت ألعب اللعبة تاني مع ضيوف تانيين بس المرة دي قررت ما يتزغليش.. فغيرت الوظيفة.. وسألني ضيف من نوع الضيوف البایخين اللي وهو بيأسألك يلعبلك في شعرك وينحكشهولك وانت بقالك ساعة بتسبب فيه وبتلزقه بالفازلين، وفي الغالب بيكون سؤاله أبوخ منه.. مش بسبب نوع السؤال تحديداً، ولكن بسبب تكراره.. ولأن في الغالب الضيف ما بيبيقاش عنده حاجة يقولها لك فيقول السؤال التقليدي الممل: وأنت نفسك لما تكبر تطلع إيه يا حبيبي؟ بصيت لكل الضيوف القاعدين وأنا مراقب ترقبهم للنطق بأمنيتي وكأنهم هايسمعوا حاجة

جديدة.. مع إن كل العيال في السن ده بيقولوا يا إما دكتور زي بابا يا إما مهندس زي عموم، يا إما ظابط علشان أقبض على بابا.. قصدي ع الحرامية! المهم بصيت لهم وأنا كلي سعادة وحب وأمل.. بصيت لهم وأنا مبتسم وفاتح بُقى من الضرس اليمين لحد الناب الشمالي، قولتها بصوت عالي وبالفم المليان: يا جماعة أنا.. أنا.. أنا عايز أطلع.. أطلع.. مهندس.. الضيوف انتبهولي يا دوب في الزمن اللي قولت فيه الكلمة.. بصوالي مع ميم المهندس ولدوا وشوشهم مع انتهاءي من سين المهندس.. وعاااااادي جدا.. كل واحد كمل اللي بيعمله. اللي بيشرب حاجة ساقعة شرب واللي بيحط سكر للشاي كمل حططان واللي بياكل بياكل ولا كأني قلت حاجة. ولا ماما زغرتلي ولا الضيوف ضحكوا، فاتأكدت إن العربي عنده حضور وكاريزيما أكثر من المهندس بآلاف المرات. واللي حصل ده كان دافع قوي إني أفضل مصرًا على رغبتي في الطلوع زي ما أنا عايز، وكان كل ما حد يسألني: نفسك تطلع إيه يا حمادة؟ أقول له: عربي، فيضحكوا وماما تزغرلي.. والعربي يكبر في نظري أكثر وأكثر وماما تزغر والضيوف مهمما يتغيروا برضه بيضحكوا والعربي بيعلى ويعلى. وأما ابتدى مستوىيا يتراجع في الدراسة مسكتني أمري وقالت لي وهي بتزعق: «لحد إمتى هتفضل بليد كده؟ لازم تذاكر ولا مستقبلك هايضبع وتترمي في الشارع. أنت إيه نفسك تصبيع وتبقى عربي؟»، وهنا كان مربط الفرس.. سبت كل الهيصة اللي حاصلة دي.. قولتها.. أيوووووووه.. ماله بقى العربي؟ بقالي سنين طولة عايز أعرف ماله العربي؟ فهميني! وبعد شوية صمت ونظرات اللي كان ناقصهم شوية مزيكا سبنس.. بصت لي وقالت

لي: أنت عايز تجتنبي صح؟ امشي من قدامي الساعاتي.. قصدي
الساعة دي.. دخلت الأوضة وبرضه ما عرفتش إيه الوحش في
العربيجي.. يا جماعة لو حد يعرف يقول لي.. هو العيب فينا ولا في
العربيجي؟ ليه الناس الضيوف ضحکوا علينا لما قلت نفسي أطلع
عربجي؟ ليه ماما زغرتلني لما قولتلها نفسي أطلع عربيجي؟ إيه
اللي ضايفهم.. في إيه في العربيجي يضايق؟ ليه ما حدش عايزني
أطلع عربيجي؟ حد يرد علينا! يا أخونا يا ناس يا خالق.. يا عالم.. يا
هو وو.. هو.. هو.. هـ.. (تهيدة) واضح إن ما فيش إجابة.. وبرضه
ما عرفتش ليه ما حدش عايزني أطلع عربيجي، مش جايز العربيجي
هو اللي مش عايز يطلع زيني؟!

ما تيجوا نقرأ الفاتحة (*)

شاهدت ماتش مصر والجزائر الذي بدأ بقراءة الفاتحة بين اللعيبة المصريين وانتهى بفوز مصر على الجزائر أربعة صفر. واعذروني فلن أتحدث عنه. وشاهدت ماتش مصر وغانا الذي بدأ بقراءة الفاتحة أيضاً بين اللعيبة المصريين وانتهى بفوز مصر على غانا واحد صفر. واعذروني لن أتحدث عنه. لقد شاهدت ماتش آخر لم يشاهده أحد غيري، ماتش لم تقرأ فيه الفاتحة، وهو ما سأتحدث عنه.. جميعنا يعرف أنه لكي تكون هناك مباراة حاسمة فلا بد أن يكون هناك فريقان يلعبان، وعندما تنتهي المباراة فلا بد وأن يكون أحد الفريقين فائزاً، وبالتالي يكون الآخر خاسراً، والأقوى هو من يفوز والأضعف هو من يخسر. وكلنا نعرف نتيجة الماتشين اللذين لن أتحدث عنهما ليس لعدم أهميتهما بل على العكس، فهما حدثان يستحقان أن يدخلان موسوعة جينس للأرقام القياسية، ولكنني سأتحدث عن ماتش آخر أشعر أنه أهم بكثير من ماتش مصر والجزائر ومصر وغانا. سأتحدث عن ماتش حدث ورأيته

(*) تم نشر هذه المقالة بتاريخ: ٣ من فبراير ٢٠١٠.

بعد الماتشين - مصر والجزائر ومصر وغانا، ماتش كان بين مصر ومصر.. مصر كانت هي الفريق الأول فيه وكانت هي أيضا الفريق الآخر.. إحداهما فائزة والأخرى خاسرة.. ماتش مصر ومصر الذي أريد الحديث عنه لم يحدث على أرض الملعب، لم يحدث فوق المستطيل الأخضر، بل كانت الشوارع والحرارات والكافيهات والمقاهي والبيوت والأسطح والكفور والنجوع والحدائق والمقابر والشبابيك والبلكونات هي أرض الملعب، وكان المصريون فيه هم اللعيبة.. وكان العالم بقاراته وأقطاره هم المتفرجين. شاهدت ماتشًا كان بين دولة ونفسها، نفس الدولة تلاعب نفسها، مصر بتلاعب مصر، بلد ضد نفسها. لاعبوها هم أهلها ولا وجود للحكم، فلتكن أنت الحكم. يا ترى هاتمنى مين يغلب؟ هاتدعني لمين بالنصر؟ مصر اللي بتحبها ولا مصر اللي برضه بتحبها؟ شاهدت الماتش الذي كانت النتيجة فيه بالتأكيد لصالح مصر، ولكن أي مصر؟ فازت مصر فيه على مصر بثمانين مليون جون مصري. هناك تمانين مليون لاعب مصرى أحرزوا أهدافهم التمانين مليون في أنفسهم. حسيت بعد ماتش مصر وغانا إننا مش مصر واحدة إحنا مصرین، مصر الفايزه الفرحانة الضاحكة المتلائمة، ومصر الحزينة الصامتة في الشوارع والحرارات المظلمة.. مصر الباكيه التي تنظر إلى فرحة المصريين من خلف شيشان الشبابيك والبلكونات المغلقة، مصر المكسوفة التي انهزمت من مصر المحروسة، شعب مصر الفائز وشعب مصر الخاسر. سألت نفسي يا ترى أنا من أنهى مصر فيهم؟ الفايزه الفرحانة المحروسة، ولا المغلوبة الحزينة المكسورة؟ من أنهى شعب فيهم؟ أنا اللي فزت ولا أنا اللي اتغلبت؟ تصدق إن أنا من الاثنين؟ من المصريين.. أنا غلبت واتغلبت في نفس الوقت.

عمرك شفت حد يبقى غالب ومغلوب في نفس الماتش؟ عمرك سمعت عن ظالم ومظلوم في نفس القضية؟ فرحت وصرخت وهيصت ورقشت وسجدت مع مصر اللي فرحت. شفت الشوارع مليانة بالمصريين الفرحانيين بالفوز والنصر العظيم. شفت سعادة ماشتهاش قبل كده. شفت شعب بيموت في تراب مصر، بيعبد مصر، بيعشق مصر، بيرفع علم مصر. حناجر مصرية مبحوحة من قوة وعلو واستمرار الهتاف بحب مصر، لا أعتقد أن فيه شعب في العالم كله بيحب بلده زي المصريين.. ولا ما كانش قال: «مصر هي أمي».. لم يكن في الشارع مكان لقدم.. ولا لإيد.. لو راسك هرشتك مش هتلaci مكان فاضي ترفع إيدك علشان تهرش.. إيه الزحمة اللي في الشوارع دي؟ إيه الحب ده؟ إيه الدموع والقشعريرة دي؟ إيه اللي بتعمله كلمة مصر فينا ده؟ الله عليكوا يا مصريين وعلى حلاوتكو، حلاوتكو اللي بيزيدي حلاوتها مرار صبركوف بقت حلاوة حلوة بزيادة.. وزى ما شفت شوارعها مليانة شفتها برضه قبل ما تتملى، ومش عارف ليه تخيلتها بعد ما فاضيت بعد المولد ما انقض. عارفين شفت إيه في شوارعها وفي وشوش ناسها؟ شفت مصر الثانية، مصر اللي اتهزمت من مصر الأولانية، مصر اللي كانت مستخبية ورا الشبابيك، مصر الفايزه مشيت ومصر المهزومة فضلت، مصر اللي كل واحد فيها في حاله ومالوش دعوه باللي بيحصل ولا كأننا كنا واقفين جنب بعض من يومين ثلاثة في نفس الشارع وعلى نفس الرصيف. أنا ماسك طرف علم وهو الطرف الثاني. أنا بقول مصر مصر وهو بيرد بتحيا مصر. شفت واحد بيزعقلني علشان يا دوب ساند على عربته، مع إنه كان من يومين ثلاثة ماسك إيدي علشان ما قعش من على سقف نفس

عربته، شفت مصر اللي سحابتها سودة، شفت مصر اللي بتسأل مصرلينها ألف سؤال.. انتو ليه مانزلتوش تهیصوا في الشوارع لما نجيب محفوظ وزويل خدوا جاية نوبيل؟ ليه ماتظاهرتوش لما نجيب محفوظ اتعرض لمحاولة قتل؟ ليه ماشفتكوش على الطريق وتمثال رمسيس بيتحرك في شوارع القاهرة في موكب شهد العالم كله؟ ليه ماتظاهرتوش لما اضطهدوا فاروق حسني في اليونيسكو؟ مصر بتسأل مصرلينها ليه منزلتوش الشوارع تفرحوا إن عندنا أذكي طفل في العالم؟ قاعدين في بيتكوليه وانتو عندكوكل يوم ميت فرح تملوا به الشوارع فرحة؟ وكل ساعة ميت مصيبة تعترضوا عليها.. انتو فين؟ ده انتو صوتي اللي بصرخ بيها وضحكتي اللي بعيبيها عن حضارتي.. انتو المنصة والمنبر اللي بتكلم منه.. انتو سكانى وأهالى اللي من غيركم أبقى مهجورة.. انتو ليه سايبني وعايشين لنفسكم؟ ده أنا انتو وانتو أنا.. انتو فين يا مصرليني؟ فين فرحتكم وحزنك فين باقي الحاجات؟ ده لو نفس عدد المشجعين اللي في الشارع راحوا الانتخابات الرئاسية هايختاروا اللي هما عايزينه وحابين يبقى رئيسهم وزعيمهم.. مصر المهزومة بسؤالها عنكم بتقولكم إن خيتها تقيلة.. مصر الجوانية المستخبطة.. بتقولكم أنا اتغلبت منكم.. مع إني فزت بيكم.. ازاي أبقى غالبة ومغلوبة في نفس الوقت؟ انتو حيرتوني.. اللي هزمها ونجحها نفس ناسها.. ناسها اللي جابوا كل الأجوان وما جابوش ولا جون.. انتو خلتووني مصرین مش مصر واحدة.. ده أنا بقالى سبع تلاف سنة أم واحدة مش أمين.. أنا مصر اللي بتعطيط لأن مصر الفايزه بتغظني وبتطلل علي لسانها.. أنا مصر اللي استخبت من الخجل والكسوف لأنها خسرت في ماتش خلتووني ألعب فيه مع نفسي.. أنا مصر الأم اللي مارضتش

أعكنت عليكو فرحتكو وأسمعوكو صوت هزيمتي.. انتوليه فرقتوا
بيبني وبيبني.. ليه بتفرحو المصر ومصر الثانية لأ؟ انتوليه عايشين
مصريين مش مصر واحدة؟ ليه مع إني بلد واحدة؟ ليه بنتغلب من
نفسنا؟ ليه لما احنا بنعرف نغلب نفسنا ليه بنفوز علينا في حاجات
وحاجات تانية لأ!! ده احنا نفس الناس.. نفس المصريين وتفس
المصر.

صدقوني أنا زبي زيكيو.. كل واحد فيكو جواه اتنين.. كل ماقربوا
من بعض كل ما بقى أقوى.. ليه خلتوني مصر الغالية ومصر المغلوبة؟
ماتمز جوا المصريين.. خلوني مصر واحدة.. مصر الكسبانة.. ماتيجوا
مانلاعيش نفسنا تاني.. نبقى مصرى واحد بمصر واحدة.. بلد مش
اتنين.. ماتيجوا ناخد بالنا إن الطرف الخسان في ماتش مصرتنا
برضه مصر.. ماتيجوا نفرح مصر الحزينة ونضمها لمصر الفرحة..
ماتيجوا نفرحها معانا.. ماتيجوا نبقى كلنا الحضري وأحمد حسن
وناخد جايزه أحسن المصريين.. ماتيجوا نبقى متعب وزيدان ومحمدي
والشافعي وجدو.. ماتيجوا كلنا نبقى حسن شحاته.. دول حداشر
واحد بس فرحا تمانين مليون.. تخيلوا بقى لو كانوا التمانين مليون
زي الحداشر دول هايفرحوا كام مليون لسة هايتولدوا.. ماتيجوا نفرح
المستقبل بولاده.. ماتيجوا نخطط حلو ونلعب أحلى.. ماتيجوا نفرح
بفوز مصر واحدة.. نفرح بكل حاجة.. نفرح بوقفتنا مع بعض وجنب
بعض وفي ظهر بعض.. ماتيجوا مانخافش ونشوط في الجون..
نباصي ونرفع ونناول بعض.. المزنوق يباصي للفاضي.. ماتيجوا
ندافع حتى لو هانمومت.. ماتيجوا نقلل من الأفسيت والتسلل..
ماتيجوا نكتب من غير وقت ضائع ولا ضربات جزاء.. ماتيجوا
نبدأ الماتش.. ماتيجوا نقرأ الفاتحة.

عيد ميلادي (*)

سؤال.. تفتكر يوم «عيد ميلادك» يبقى عمرك كده زاد سنة ولا نقص سنة؟ السؤال ده سأله لنفسي: يوم عيد ميلادي.. يا ترى أنا كده عمري زاد سنة ولا نقص سنة؟ طيب ليه اليوم اللي أنا اتولدت فيه يبقى عيد؟ ليه عيد؟ ومين اللي حدد إذا كان عيد ولا مش عيد؟ بني آدم اتولد في أي يوم من أيام السنة.. إيه العيد في كده؟ إنك اتولدت!! أهلا وسهلا يا سيد.. واحد اتولد.. حاجة عادية جدا.. زي كل الناس اللي اتولدت على الكورة الأرضية من يوم ربنا ما خلقها وخلقنا.. وهو لو يوم عيد.. اشمعنى ليك انت؟ المفروض إنه يكون يوم عيد لأبوك وأمك اللي بالنسبة لهم أكيد هايقولوا فرحانين ومزقطتين بيتك وبخلفتك، وخصوصاً لو كان بقالهم كتير مستنيين إن ربنا يأذن بتكونين حضرتك.. وعلى فكرة مش بالضوري يبقوا فرحانين أو ي.. يعني في حالة لو كان مرتبهم نص نص ممكן يبقوا فرحانين نص نص برضه.. والفرحة هاتقل عن النص لو كنت انت

(*) تم نشر هذه المقالة بتاريخ: ١٠ من فبراير ٢٠١٠.

العيل الخامس ولا السادس في ترتيب إخوات حضرتك.. وياعالم
هاتبقى أنت آخر العنقود فهاتلع ولا العنقود هايكون لسه ماتقفلش
وفاضله عيل ولا عيلين كمان علشان يتقول.. وممكن مايكونوش
فرحانين بيكم خالص وخبر بداية وجودك يكون سبب في خناقة كبيرة
بين أبوك وأمك اللي كل واحد فيهم هايحاول يبرأ نفسه من سبب
حدوثك اللي مش وقته خالص لأنهم لسه مش مستعدين لمصاريف
خلفة سيادتك.. وممش بعيد أبوك يجبر أمك تنزلتك وماتجيش أصلا..
ومين عارف.. ده ممكن أمك تنزلتك من غير ماتقول لأبوك.. بس أنا
هافترض بقى إن أبوك وأمك ميسورين الحال ومستنينك بفارغ الصبر
وإنك فعلاً اتولدت وجيت ونورت البيت.. وطبعاً أكيد هاتولد في
شهر عادي من شهور السنة وفي يوم من الأيام العادية المعروفة بتاعة
الأسبوع اللي كل ما هايهل علينا هاتقول النهارده عيد ميلادي.. عيد
ليه؟ المفروض الواحد يقول النهارده يوم ميلادي.. أو ذكرى يوم
ميلادي.. أو يا جماعة أنا اتولدت في يوم زي النهاردة.. وخلاص..
ولو عايز تحتفل بذكرى ميلادك يبقى قول النهاردة أنا هاحتفل بذكرى
يوم ميلادي مش «بعيد ميلادي».. إيه البارانويا دي؟ مين اللي حدد
إن اليوم اللي حضرتك اتولدت فيه عيد؟ أنت مين أصلاً؟ واحد
عادي.. إنسان مولود من كذا سنة.. عملت إيه مهم في حياتك علشان
تخلي يوم ميلادك عيد تحتفل بيه انت وأهلك وأصحابك.. وحتى
لو قلت أنا هاحتفل بيوم ميلادي مش عيد ميلادي.. تحتفل بيه ليه
من أساسه؟ حصل إيه يعني لما اتولدت؟ أكيد كنت بتعطيه وصوتك
مزاج ومش عارف تقولنا انت بتعطيه ليه، وأبوك وأمك مش عارفين
يفهموك ولا يناموا منك وبتعملها على روحك أو على رجل أي حد

من اللي شايلينك، وريحتك وحشة وبتريل وبتقشر وبتكرع في
وش أي حد.. ودائما فارفهم ومشتت تفكيرهم ومخللي عينهم وسط
راسهم لتقع ولا تخبط.. ونائم وسطهم ومشاركتهم في سريرهم
لا عارفين يتقلبوا ولا يناموا ولا حتى يحضنوها بعض.. وإن نمت
على سرير لواحدك هاتاخد مخدتين.. واحده يمينك والثانية شمالك
علشان ماتقعش وانت نائم.. ناقص يحجروك بحجررين.. ده غير بقى
السخونية والخصبة والإسهال والتطعيم والجفاف والتسنين.. صحيح
خلفتك نعمة من عند ربنا نشكره عليها آلاف المرات والمرات..
بس بصراحة تربيتك مقرفة ومتعبة.. وفي الآخر تضحك عليهم
بضحكه طفولية تنسيهم كل القرف اللي عملته فيهم وشافوه منك..
وخصوصا أمك اللي بالرغم من كل اللي شافته وشافاه ولسه هاتشوافه
منك ماتستحملش الهوا عليك.. آهي هي دي اللي المفترض بيقى
ليها عيد صحيح زي عيد الأم فعلا.. عيد واضح وصريح ومفهوم
أسبابه.. عيد بتحفل فيه بالأم العظيمة اللي ربتك وشالتك وسهرت
عليك وحملت فيك تسع شهور بتقلب وتتوسع ونفسها تغم عليها
بسبيب إن حضرتك مضايقها في بطنهها تسع شهور.. كتك القرف يا
أخي.. عارف يعني إيه تسع شهور.. يعني ٢٧٠ يوم.. انت تقدر
تشيل قزازة ميه في إيدك مش في بطنك لمدة يوم واحد.. تفضل
قائم قاعد خارج داخل صاحي نايم بيها؟ أتحداك.. ده انت من
أول ساعة ياهاتشر بها ياهاتكبها في أقرب حوض وتطوح القزازة
في أقرب صفيحة زباله.. لو انت شايف إنك ضروري تتحفل بيوم
ذكرى ميلادك يبقى تعالى نرجع الحق لصحابه.. يبقى من باب أولى
إن أبوك وأمك هما اللي يحتفلوا بيها مش انت.. يحتفلوا بالذكرى

العظيمة اللي ربنا اداهم فيها نعمة اسمها الخلفة.. وأنا أقصد الخلفة كخلفة في حد ذاتها.. يعني مش شرط تكون انت النعمة دي.. مين عارف ما انت ممكن تكون نعمة عليهم وتدو خهم سبع دوختات ما بين مصاريف وتعليم وعلاج وهدوم وأكل.. وممكن جدا في الآخر تبقى فاشل وصايع وضايع لانافع فيك تعليم ولا دروس.. وتقول لي أحتفل بعيد ميلادي! كاك نيلة.. واللي يجتنبك بقى إنه في يوم عيد ميلادك العظيم ده كمان يجيولك هدايا.. على إيه؟ الهدايا دي كلها المفروض يجيوها للراجل والست اللي صرفوا عليك دم قلوبهم.. هما اللي ياخدوا الهدايا كنوع من أنواع التعويض المعنوي عن اللي شافوه منك.. وتعويض مادي على اللي صرفوه عليك.. يبقى هما اللي بيستروا اليوم ده مش انت.. انت المفروض يوم عيد ميلادك ده تقضيه اعتذار عن اللي انت عملته فيهم.. تبوس إيديهم ورجلיהם ودماغهم وتقول لهم: سامحوني واوعوا تزعلوا مني؛ أنا وقتها كنت عيل ومش فاهم حاجة.. المفروض تسهر طول الليل تدعني ربنا إنهم ينسوا ويسامحوك.. مش تقول لي عيد ميلادي.. ياراجل روح.

ولو عايز يبقى ليك عيد ليوم ميلادك تحتفل بيه وتهيص وترقص وتزغرط حتى.. يبقى في حالة واحدة.. يوم مانقول الحمد لله إنك اتولدت للدنيا وللبشرية علشان اللي انت عملته فيها وليها أفادها.. ساعتها ابقى اعمل ميت عيد ليوم ميلادك يوم مانقول الحمد لله إنك اتولدت، لأن لو ما كانش ده حصل ما كانش زمان عندنا أول واحد يطلع القمر مصري.. مثلا.. لما نقول الحمد لله إنك اتولدت ولا ما كانش هايبيقي عندنا أول واحد اخترع القنبلة الذرية.. مثلا.. يوم ما نقول الحمد لله إنك اتولدت لأنك سند لأبوك وأمك.. يوم مانقول

الحمد لله إنك أعظم وأهم دكتور مصرى في العالم.. لما الحالة دي تتحقق نقول الحمد لله إن حضرتك اتولدت.. ساعتها اعمل ألف عيد ليوم ميلادك.. احتفل بيه لما تبقى حاجة مفيدة ومهمة.. ساعتها قول بعلو صوتك هو ده اليوم اللي اتولدت فيه.. ساعتها مش هاتحتاج إنك انت اللي تقول.. لأن غيرك هما اللي هايفتقروه ويحتفلوا بيها.. ساعتها هاتعرف إذا كان عمرك زاد سنة ولا نقص سنة.. يوم ذكري ميلادك ابقي فكر قبل ماتطفي الشمع انت عملت إيه في السنة اللي فاتت.. لو لاقيت عماليك بيضة وإيجابية ابقي زود شمعة على شمع سينيك اللي انت حاططهم في تورته عمرك.. نص كبايتك هايبيقي مليان.. هاتعرف إن عمرك زاد سنة مفيدة.. وساعتها هاتفكر في يوم ميلادك الجاي وإنه ازاي بيقى عيد ميلاد مش يوم ميلاد.. يوم تزود فيه شمعة.. أما بقى لو لاقيت نفسك مش مفيد ولا مهم ولا ليك لازمة وعماليك سلبية وسودة.. علطول شيل من شمع سينيك شمعة.. نقص من عمرك سنة عدت من غير ماتعمل فيها أي حاجة مهمة.. وساعتها لازم تعرف إن عمرك نقص سنة، وكل سنة هاينقص سنة.. اعرف إنك عايش لورا مش لقدم.. اعرف إنه كتك نيلة فعلا عليك وعلى شمعك وعلى تورتك.. اعرف إنك لا تمتلك من الكباية إلا النص الفاضي.. وإياك تهوب أو تبص على النص المليان.. عارف ليه؟ لأنه بتاع واحد بيحتفل بعيد ميلاده ومتش كته نيلة زيـك.. كتك نيلة.

جواب (*)

أمي الحبيبة.. تحية طيبة وبعد.. أرسل لك خطابي هذا من خارج حدودك الدافئة.. أرسل لك خطابي هذا من إسبانيا.. من برشلونة تحديدا.. ودي أول مرة في حياتي آجي هنا، وأحب أطمئنك إنني كويسي وصحتي كويسة وكل حاجة حلوة حواليا، ما عدا الظروف اللي باكتب لك فيها الجواب ده. الجو هنا برد جدا جدا وأنا قاعد دلوقتي على إحدى القهاوي الإسبانية البرشلونية.. قصدي الكافيـهـات الإـسـبـانـيةـ أصلـهـمـ هـنـاـ مـاعـنـدـهـمـشـ قـهـاوـيـ،ـ وـتـقـرـيـبـاـ أـنـاـ المـجـنـونـ الـوـحـيدـ الـلـيـ قـاعـدـ بـرـةـ الـكـافـيـهـ مشـ جـوـةـ وـمـكـلـفـتـ نـفـسـيـ وـلـابـسـ تـلـتـمـيـتـ حاجـةـ أـهـمـهـمـ طـبـعـاـ الـكـلـسـوـنـ الصـوـفـ الـمـصـرـيـ الصـعـيـدـيـ الأـصـيـلـ الـلـيـ بـيـحـمـيـ منـ بـرـدـ بـلـادـ بـرـةـ،ـ دـهـ غـيرـ الفـانـلـةـ الـحـمـلـاتـ وـالـغـيـرـ حـمـلـاتـ وـالـبـلـوـفـرـ وـالـجـاـكـتـ وـالـكـوـفـيـةـ وـالـشـرـابـ الصـوـفـ التـقـيلـ الـلـيـ مـخـلـيـ الـجـزـمـةـ ضـيـقةـ عـلـىـ رـجـلـيـ،ـ بـسـ أـعـمـلـ إـيـهـ لـوـ مـاعـمـلـتـشـ كـدـهـ هـانـشـفـ مـنـ الـبـرـدـ.ـ وـطـبـعـاـ لـاـ غـنـىـ عـنـ الـجـوـاتـيـ الـلـيـ اـضـطـرـيـتـ لـلـأـسـفـ أـقـلـعـهـ عـلـشـانـ أـعـرـفـ أـكـتـبـ

(*) تم نشر هذه المقالة بتاريخ: ١٧ من فبراير ٢٠١٠.

على اللاب توب، وكل ما اكتب كلمتين ثلاثة ألبسه شوية علشان أرجع
أدفي إيدي قبل ما صوابعي تقع من البرد.. وأرجع أقلعه تاني علشان
أكمل كتابة لحد ما هايجيلي انفصام في الشخصية.. ده غير صراعي مع
بطارية اللاب توب اللي فاضلها نص ساعة وتخلاص.. أصللي نسيت
أشحنها قبل ما أنزل من الفندق.. علشان كده مضطر أفكر بسرعة في
اللي هاكتب.. لأن المفروض أبعت الجواب ده بالكتير دلو قتي حالا
عن طريق الإنترن特 من خلال الإيميل.. ولو سألتني ليه ما حترمتش
نفسى وحميتها من البرد الرهيب ده وقعدت أكتب في الفندق حاتكون
إجابتني مش عارف.. أنا قولت أجرب وأنزل أكتب في الشارع.. صحيح
جنبي دفاعة بس الحقيقة بتدفعي نفسها، مش عاملة أي حاجة خالص.
جايزة اللي مصبرني على البرد إني باكتب الجواب ده.. الناس قدامي
رايحة جایة اللي شايل شنطة واللي ماسك في إيده عيل، واللي ساحب
وراه كلب، وكلهم متتكلفتين زبي.. فنجان القهوة بيبرد قبل ما الجرسون
يحطه قدامي.. أمي الحبيبة، أحب أقول لك إني شفت حاجات كتير
هنا شبه اللي عندنا.. شفت بيوت وعمارات على الطراز الإسلامي
والعربي.. أكلت أكلة عبارة عن طبق كده فيه شوية رز على جمبري
على سمك على شوية حاجات مش مفهومة وكلها معجونة في قلب
بعض وجوه بعض.. شكلها يقرف بس طعمها حلو قوي.. الأكلة دي
اسمها «باييا» ولما سألت عن سر الاسم قالوا لي إنه اسم أصله عربي
معنى «البقية» والسبب في تسمية الأكلة بالاسم ده إنه مقصود بيها
بوافي الأكل.. وبعد ما اطمانت إنه مش بوافي أكل حد تاني من اللي
قاعدin جنبي في المطعم كملت أكل.. ثانية واحدة هاطلب قهوة تاني
بدل اللي بردت.. (مررت خمس دقائق) معلش أتأخرت؟ أصل التفاصيم

كان صعب شويه مع الجرسون.. بحاول أفهمه أنا عايز إيه وهو مش فاهم.. فكان الحل إني أشاور له على الفنجان اللي برد وأقول له واحد تاني بلغة الخُرس والحمد لله فهم وراح يجيب قهوة تانية. واضح إنه أخرس. عايز أقول لك إنه بالرغم من إن الجو برد جداً لكن الهوا نضيف ونبي لدرجة إني جالي حساسية من الأكسجين النظيف. كمان في حاجة مضيقاني شوية لاقيتها في الفندق. وأنا بقلب في قنوات التلفزيون امبارح قبل ما أنام مالاقتش ولا قناة عربية.. مش عارف ليه!! مع إن قناة الجزيرة القطرية موجودة. شكيرت إن قطر مش دولة عربية بس أتأكدت لما لاقيت المذيع بيتكلم عربي زينا.. مش عارف ليه قنواتنا العربية مش موجودة في إسبانيا.. شفت كمان حاجة غريبة جداً، عارفة شفت إيه؟! شفت عَجل كتير قوي مركون على الرصيف، كله شكل واحد ومقفل بقفل كده من عند الجادون.. وطبعاً سألت إيه العَجل ده؟ هو في حد بيأجر هنا؟ قالوا لي لا. فسألت أمال بتاع مين؟ قالوا لي بتاع الحكومة، عاملاه للمواطنين باشتراك شهري أربعين يورو في السنة.. يعني حوالي ثلاثة يورو ونص في الشهر.. وفايدة العَجل ده إن أي واحد مشترك فيه يحط الكارت بتاعه والقفل يتفتح ويأخذ العجلة يروح بيها مشواره وبعدين يسرقها، قصدي يركنها في أقرب موقف للعجل جنبه.. وطبعاً العجل ده في كل شارع من شوارع برشلونة. والمشروع ده الحكومة عملته علشان تقليل من كمية التلوث اللي مش موجود أصلاً.. بيستهبلوا. الغريب بقى يا أمي إنه فعلاً ماحدش بيسرق العَجل.. ماحدش فكر يأخذ عَجلة ويأجرها أو يفككها ويبيعها في وكالة البلح بتاعت إسبانيا.. لفت نظري كمان إن الناس كلها بتمشي بسرعة.. حتى اللي بيتمشوا بيتمشوا بسرعة..

الناس هنا بتقدر الوقت وكأنه أهم من الأكل والشرب.. ثانية واحدة علشان القهوجي.. قصدي الجرسون جايب القهوة وجاي. (مررت خمس دقائق) معلش أتأخرت.. أصل الجرسون جاب القهوة باللبن وأنا طلبتها من غير لبن.. وطبعاً هاشربها باللبن لأنني مستحيل أعرف أفهمه.. ده فهم إني عايز قهوة بالعافية.. المهم.. صادف وجودي هنا عيد الفلانتين؛ عيد الحب.. اكتشفت إن احنا في مصر بنحتفل بعيد الحب ده أكثر من الحب نفسه.. بنحتفل بيه أكثر من الأوليين بكثير.. إلا ماشفتش وردة واحدة حمرا في إيد واحد أو واحدة.. واضح إن الحب عند الناس دي في القلب مش في الورد الأحمر والهدوم الحمرا بس.. أمري الحبيبة.. باركيلي مش وأنا ماشي على الرصيف ماشفتش زيالة خالص.. وكمان بعدّي الشارع من على خطوط المشاه.. أنا بردان.. بس مش مهم.. أمري الحبيبة أنا مش فاهم الناس ولا الناس فاهماني بس مبسوط.. أمري الحبيبة كان نفسي تكوني معايا علشان تشوفي وتترجي بنفسك.. لو كان ينفع أجيب العاجات الحلوة اللي هنا معايا عندك كنت جبتها، بس مش هاينفع علشان دي حاجاتهم مش حاجاتنا، بتاعتهم مش بتاعتنا، بس لما أرجع أنا ممكن أحكي لك عن كل اللي شفته وأفرجك كل الصور اللي صورتها.. هافرجك صور الشوارع والبيوت النظيفة.. هاصور لك صورة للسماء والسحب علشان تشوفي الجو هنا عامل ازاي.. هاصور لك ضحكة الجرسون اللي طلعت عينه ومش متضايق مني.. هاصور لك ناس جايز يكونوا مش مؤمنين خالص بس مؤمنين جداً.. هاصور لك نفسى وماستغربيش لو لاقتي شكلي مختلف عنهم، لأنني هابقى متضايق ومتحسن ومغلول؛ لأنني هابقى أناي وبقول اشمعنى احنا!

أمي الحبيبة وحشتيني بالرغم إني مابقليش أسبوع هنا.
أمي الحبيبة بحبك أكثر من أمريكا وإسبانيا وفرنسا وإنجلترا
والصين واليابان وكل بلاد الدنيا.

أمي الحبيبة نفسى أسألك سؤال حتى لو ما عندكيش جواب بس
هاسأله: هو ليه الحلو ما يكملاش يا أمي؟
هو ليه احنا عندنا بنلاقى العضم في الكرشة؟

الناس هنا عاديin زينا، عندهم إيدين ورجلين وعينين ومنا خير
ومخ، وبياكلوا وبيشربوا زينا، وبالرغم من كده حاسس إنهم مختلفين
عننا..

أمي الحبيبة.. البطاريه خلاص خلصت.

مجرد سؤال (*)

مجرد سؤال: لماذا قال الشاعر: «ألا ليت الشباب يعود يوما.. فأخبره بما فعل المشيب»؟ ولم يقل: «ألا ليت الطفولة تعود يوما»؟ لماذا الشباب وليس الطفولة؟ هل لأنه من في سن الشباب سيكون إدراكه واستيعابه بما فعل المشيب بصاحبها أكثر من فهم وإدراك من هو في سن الطفولة؟ مع أن الأطفال دلوقتي بيفهموا كل حاجة. هل ياترى في سبب آخر لتفضيل مرحلة الشباب عن مرحلة الطفولة؟ برغم أنني أسمع كثيرا من الناس يقولون إن أجمل أيام هي أيام الطفولة، ويتمسكون أن يعودوا أطفالا مرة أخرى من جديد.. طبعا أنا مش هاعرف هل هناك سبب آخر غير ذلك لأن المعنى في بطن الشاعر. ودي إجابة كنت دائما بآجوابها في امتحان العربي لما يجي سؤال عن قصيدة بيقول: «ما معنى البيت؟»، فكانت الإجابة طبعا: المعنى في بطن الشاعر.. وكنت طبعا باسقط؛ لأن المعنى كان في كتاب الوزارة مش في بطن الشاعر.. ولأن أنا لم يعبر بي بعد قطار

(*) تم نشر هذه المقالة بتاريخ: ٢٤ من فبراير ٢٠١٠.

العمر من محطة الشباب لكي أشعر بما يحمله هذا الشطر الشعري من أحاسيس قالها الشاعر بعد أن قضى مرحلة شبابه؛ لذلك قررت أن أفكر فيها من منطلق كونها مقوله مجردة من الأحاسيس التي لن أستطيع أن أشعر بها الآن.. وربما أفهمها عندما أبلغ الستين ويبقى رأسي بالشعر الأبيض، ده لو ما صبغيتش.. ولكن ما سأفكر فيه الآن هو لماذا تم تفضيل الشباب عن الطفولة؟! ولن أفكر من وجهة نظر الشاعر ولكن من وجهة نظري الشخصية، أي أني سأفكر لو كنت أنا فرضا.. فرضا.. فرضا.. لا سمح الله قد قلت هذا البيت بنفس النص الذي قال له الشاعر الكبير.. طبعاً لو كنت أنا اللي قلته أكيد ما كتتش هاسقط في العربي.. بس خلونا نفترض مجازاً أو بجاحه إن أنا اللي قلته.. إذن أكيد هايكون هناك سبب أني اختار مرحلة الشباب عوضاً عن مرحلة الطفولة.. وسيكون المعنى وقتها ليس في بطن الشاعر ولكن في بطني أنا، ما أنا اللي قايل بقى، وكل واحد أدرى باللي في بطنه. فلنبدأ بالتفكير، وفكروا معايا لو كتتواشلة قاعددين مع بعض.. اشمعنى الشباب مش الطفولة.. جايز علشان الشباب يعني القوة والإدراك والوضوح.. طيب ما الطفولة برضه يعني البراءة واللعب والمرح وعدم تحمل المسؤولية بدون مساءلة. في حد ما يتمناش يرجع طفل تاني ويلعب ويتنطط؟ المرحلتين فيما حاجات حلوة.. قعدت أفكـر ليه لو كنت أنا اللي كتب البيت الشعري ده كنت هاقول ألا ليـت الشباب مش الطفـولة؟! بقى أكيد في حاجة في مرحلة الطفـولة خلـتني مش عـايز أرجع طفل تاني.. مالاقـتش قدامي غيرـ إني أـفكـر وأـحاـول أـحلـلـ ليـهـ أناـ قـلـتـ كـدهـ؟ـ ليـهـ؟ـ ليـهـ مشـ عـاـيزـ أـرجـعـ طـفـلـ؟ـ مشـ عـارـفـ..ـ لـاقـيـتـ إـنـ مـافـيشـ مـفرـ

من إني أحاول أفتكر طفولتي، جايز لما أفتكرها ألاقي فيها حاجة ترشدني لسبب كتابتي البيت مستخدما لفظ الشباب مش الطفولة. وفعلا ضلمنت الأوضة وعملت كل الحاجات اللي تخليني أفتكر.. فافتكرت يادوب وأنا في ستة ابتدائي.. ودي مرحلة الغلاسة مش الطفولة.. افتكرت بقى النكت اللي الواحد كان بيقولها وسط أهله ويحرجهم بيها قدام الضيوف من كتر بواختها وماحدش بيضحك غيري. وإن حد ضحك من اللي قاعدين بيقى بيعفي وراء ضحكته لفظ ماعتقدرش إنك تحب تسمعه. المهم بعدده كله ماافتكرتش برضه. قلت طيب ماأشوف صوري وأنا صغير جايز تفكري بحاجة. وفعلا طلعت كل صوري وأنا صغير، وياريتني ماطلعتهم! لاقيت صورة وأنا باكل مكرونة وملحوس بُقى صلصة، وصورة وأنا فاتح بُقى وباعيط، وصورة وأنا لابس إيشارب أمي، صور تخليلك تكره طفولتك، مش تكرهها بس، دي تخليلك تندم إنك اتولدت أساسا. مالاقيتش أمل في الصور يرشدني لإنجذبة سؤالي. فقدت الأمل وفتحت النور وقطعت الصور ورن التليفون وردت: آلو مين؟ أيوه أنا محسن ابن خالتك. محسن لسه مختلف جديد، ولد اسمه آدم، وكان لازم أروح أبارك له. قلت له حاضر يا محسن هاعدي عليكو بليل. جبت هدية لأدم ابن محسن ابن خالي ورحت له. وكان البيت في الأول ما فيهوش ناس كتير بس ابتدوا يزيدوا. المهم دخلت وبصيت على ابنه آدم اللي نايم جنب أمه عفاف مرات محسن ابن خالي، ولسه هالاعبه وأقوله بيس بيس بيس. عايز أقول لكو إن أنا تقربيا افتكرت طفولتي. آدم فكري بطفولتي، وأول حاجة افتكرتها نور جامد، وكنت شايف كل حاجة بالمشغل، وكان في واحد قاعد يهوشني بإيده قدام عيني، ولما

بربشت من الخوف بطل يهوشني، بس ضربني على «اللي لا مؤاخذة»
أنا مش فاهم حاجة! جايزة ضربني علشان بربشت؟ مش عارف، راح
ضاربني تاني، ولأنني ماكتتش بعرف اتكلم رحت معيط. واللي حرق
دمي إني أول ما عيطة راح ضاحك، وأمي كمان ضحكت، وأبويها
ضحك، وكل الموجودين ضحكوا! وأنا مش ناسيها لهم لحد دلوقتي.
بعد كده لفوني في قماشة بيضة وحطوني جنب أمي.. وجت بنت
لابسة بالطوط طوط وقعدت تلاعني، وبعدين خدتنى من جنب أمي
ومشيته بيا في طرفة طويلة. خفت وعيطة وفجأة البنت الجميلة
اللطيفة اتحولت وكشرت وقعدت ترجمي وتهزني وتقول لي: هش
هش.. مافهمتش أهش ليه؟ هو أنا دبانة؟ طب والله ما أنا هاشش!
ابتدىت تشتم وتقول لي آخرس بقى.. اسكت.. وبعدين دخلت بيا
أووضة كده مكتوب عليها «حضّانة».. وحطتنى في درج بلاستيك
زي درج التلاجة كده.. فضلت نايم في الدرج ده كام يوم كده الناس
تيجي تبعن عليا وتمشي.. كان ناقص بس يرمولي فول سوداني..
وبعد كده روحنا البيت وأمي غيرت هدومنها فعرفت إن ده بيتنا لأن
أكيد أمي مش هاتغير هدومنها عند الجيران.. وكان البيت فيه ناس
مش كتير بس ابتدوا يزيدوا شوية بشوية.. وكل شوية ألاقي واحد
جه بضم في وشي وراح مصفر لي.. وكأننا أصحاب.. وتيجي واحدة
تبصلي وتقعد تعمل أصوات غريبة.. ادع ادع ادع.. اكرر ركرر ركرر..
إيه الناس دي؟! أول مرة يشوفوا عيل.. وبعدين هو مين اللي عيل
بالظبط؟ أنا ولا هما.. داغير بقى اللي يقول لي: «ياختي كميلة انتي»..
ياختي ليه؟ هي أمي مش قايلة لهم إنها مخلفة راجل! وليه كميلة؟
ما هي طول عمرها جميلة بالجيم.. ناس عيال صحيح.. ده غير بقى

إن كل واحد وواحدة من دول أول ما يوصل عندي يقوم دا باب إيده
تحت مخدتي وسايب فلوس.. ما بقتش فاهم.. هما بيلموما تبرعات
عليا ولا إيه!! وبعدين جه واحد قعد يرفعني لفوق كده ويعمل نفسه
هایسيني وكأني هاقع ويمسكنني تاني في آخر لحظة.. إيه يا عم
انت هزار الكبار ده؟ هو أنا قدك.. جه بقى عيل صغير كده وراح
باصلي بتمعن وكأنه بيشهه عليا وفجأة راح لاسعني حته قلم على
قفايا وجاري.. راحت أمي أخيرا وبعد صمت طويل راحت مزعقة..
وبقيت هاموت وأعرف مين ابن الكلب ده اللي ضربني على قفايا
ده.. ولما ماما قالت له كده تضرب أخوك يا حبيبي.. عرفت حاجتين
في وقت واحد: إن اللي لسعني بالقفاء أخرىا، وإن اللي شتمته أبويا..
وفجأة فقت من سرحاني وأنا باصص لأدم ابن محسن ابن خالتي
على صوت إيد بترقع على قفا «آدم» ابن محسن ابن خالتي.. وأمه
عفاف بتزعق فيه وبتقوله كده تضرب أخوك يا كريم! رحت ضاحك
وممبل على آدم وقابل له في ودنه: الله يكون في عونك.. فعلاً ألا
ليت الشباب يعود يوما. و ساعتها عرفت المعنى اللي في بطن الشاعر،
وليه قال: ألا ليت الشباب، وليس الطفولة.. ألا ليت الشباب يعود
يوما.. فأخبره بما فعل الناس بي وأنا طفل».

شكراً للمخرج القدير شريف عرفة لأنّه هو من أوّل من بثّ فكرة
هذا المقال.

وقت إضافي (*)

البني آدم بياكل وبيشرب وبينام ويقضى حاجته في الحمام. آه نسيت.. وبيشتعل. طقت في دماغي أحسب حسبة كده عن البني آدم.. كام سنة بينماها من عمره؟ الوقت اللي بيستهلكه في الشرب والأكل يطلع كام سنة؟ بيقعد في الحمام كام سنة؟ وبيشتعل كام ساعة؟ قصدي كام سنة! هاحسبها على متوسط عمر البني آدم العادي اللي تقريرياً بيكون عمره في حدود.. نقول إيه؟ سبعين سنة مثلاً.. من أول مايتولد لحد مايموت. نبتدئها من أول ما العيل بيولد. من خبرتي التي لم تتعذر السبع سنوات في عالم الأبوة والتي اكتسبتها كأب، عرفت أن العيل لما بيولد بينمام أربع ساعات ويصحا أربع ساعات.. ولما يصحا الأم بس هي اللي بتصحًا معاه، وأنا بأفضل نائم طبعاً. أو بمعنى أدق بصحا لمدة ثانية مع أول عيادة للعيل وارجع أنام تاني أول ما أحط المخدة على رأسي تاني. أصل أنا كمان خبرة في النوم. كنا بنقول إن العيل في أول ست شهور بينما

(*) تم نشر هذه المقالة بتاريخ: ٣ من مارس ٢٠١٠.

أربع ساعات ويصحا أربع ساعات. يعني بينما حوالى اتناشر ساعة في اليوم ويصحا اتناشر ساعة، وده لمدة ست شهور. يعني تلات شهور صحيان وزيهم نوم، ولما العيل بيعدي السنت شهور دول بيقى خلاص، زي زي الكبار بينما تمن ساعات في اليوم. نضرب بقى التمن ساعات دول في تسعه وستين سنة ونص يطلعوا تقريبا.. في الشهر ٢٤٠ ساعة، يعني في السنة ٢٨٨٠ ساعة، يعني في المدة كلها تقريبا ١٩٨٧٢٠ ساعة نوم، زائد النوم اللي في السنت شهور اللي فاضلين بيقى الإجمالي ٢٠٠١٦٠ ساعة في عمره كله! لو قسمناهم على أربعة وعشرين هانعرف عدد الأيام اللي بينما فيها البني آدم من أول ما يتولد لحد ما ينام للأبد.. يكون الإجمالي ٨٣٤٠ يوم. نقسمهم بقى على تلتمية خمسة وستين يوم يطلع ٢٢,٨٤٩٣١٥ سنة.. ده من غير حساب اليوم الواحد والتلاتين من كل شهر، يعني بالبلدي كده نقول حوالى تلاتة وعشرين سنة. تلاتة وعشرين سنة نوم! ده في حالة لو كنت بتناشم تمن ساعات في اليوم. شوف بقى لو بتناشم عشرة أو اتناشر ساعة.. تلاتة وعشرين سنة نوم بس من غير أكل وشرب وتواليت! نشوف بقى وقت الأكل.. لو بتاكل في اليوم تلات مرات والمرة تستغرق حوالى مثلثاً عشرين دقيقة، يعني ساعة في اليوم.. يعني في الشهر ٣٠ ساعة، يعني في السنة ٣٦٠ ساعة، يعني في السبعين سنة ٢٥٢٠٠ ساعة، يعني ١٠٥٠ يوم، يعني حوالى سنتين وتمن شهور.. قول تلاتة لو كنت مفجوع شوية.. تلات سنين أكل! نخش بقى على التواليت.. والتواليت نوعين: مية وطينة.. وكل حاجة ولها وقتها طبعا.. الإسهال السريع غير الإمساك الشنيع.. هانقول مثلثاً نص ساعة في اليوم للمية والطينة مع بعض.. يعني

إجمالي سبعين سنة يطلع حوالي سنة ونص من عمرنا بنعمل فيهم
تواليت.. سنة ونص تواليت.

أما بالنسبة للشغل بقى.. فممكן نقول لو مثلاً بتشتغل ٦ ساعات
في اليوم، يعني في الشهر ١٨٠ ساعة، يعني في السنة ٢,١٦٠ ساعة،
ولأن طبعاً ماحدش بيشتغل أول مايتولد ولا حتى أول مايخرج من
الجامعة، فأكيد مش هانضرب في سبعين سنة. ممكן نضرب في
ثلاثين سنة، يبقى المجموع ٦٤,٨٠٠ ساعة.. يعني ٢٧٠٠ يوم،
يعني ٣٩٧٢,٧، قول تمن سنين. تمن سنين شغل لو كنت هاتعيش
سبعين سنة! يعني إجمالي الأكل والشغل والنوم والتواالت يطلع
تقريباً خمسة وثلاثين سنة وخمس شهور.. خمسة وثلاثين سنة
للأكل والحمام والنوم والشغل.. تفتكروا الخمسة والتلاتين سنة
الفاضلين ممكן يكفووا بقية الحاجات اللي أنا ماحسبتهاش؟ زي
السنين اللي بنقعد فيها على القهوة والسنين اللي بنلعب فيها بلاي
ستيشن، والسنين اللي بتتعلم فيها من غير ما نستفيد من اللي بتعلمها،
والسنين اللي بنم فيها على خلق الله، وسنين بتضيع في الخناق،
وسنين بنقفها في البلكونات، وسنين بندور فيها على أماكن لركن
العربيات، وسنين الطوابير، وسنين بتقنع فيها الأغبياء، ده غير سنين
الوقوف في الإشارات العادية أو أمام كاميرات.. وسنين السُّكَّات
والسرحان.. وسنين في الحقد وسنين في الحزن، وسنين في الكآبة
والغم وسنين المسلسلات والبرامج والريمونات والفضائيات..
و سنين التفخيد على الشزلونجات، وسنين مجاملات وسهرات
وأحزاب وسياسات، وسنين في المحاكم وحنقات وتحكمات
وحكومات، وسنين في الأقسام والمستشفيات، وسنين لاتخاذ

القرارات وهجرات ووداعات وسلامات، وسنين دموع وأحضان في المطارات.. وسنين نط وجري ورا الأتوبيسات والميكروباصات، وسنين في علاج الميكروباط دروس خصوصية وقعاد على سلام الكليات وشيشة وكافيهات.. ومدين صحي ومدين مات.. وأفراح وعزى، وصلوات ودعوات.. وسرقة ونهب وفلان خدوكت والثاني ما بيقولش غير هات.. طب ليه الدوخة الحسابية دي؟! ماتيجي نحسب الحاجات دي على يوم واحد بس.. يعني تمن ساعات نوم.. ست ساعات شغل.. ساعة أكل.. ونص ساعة توايليت.. ساعة إلا ربع مسلسل.. وبالإعلانات يبقى ساعة ونص.. ده لو كنت متابع مسلسل واحد.. نص ساعة تقليب في زرائر الريموت على ما تقرر اللي انت عايز تشووفه.. ساعة على الأقل على ما توصل الشغل.. وزيها وانت راجع.. طبعاً الحسبة دي لو كنت بتشتغل يوم الجمعة والشوارع فاضية.. بس خلينا نقول ساعة رايح وساعة راجع مجازاً.. طبعاً ده من غير الإشارات، ولا هابقى خيالي.. ومعاك نص جبنة.. قصدي نص ساعة فرجة على خلق الله في الإشارات.. ونص ساعة بتدور على ركناً.. ونقول ربع نمية وربع حقد وربع سرحان وربع تفخيد في الشغل.. وخمس دقائق في كل صلاة سواء كنت مسلم أو مسيحي.. يعني خمسة وعشرين دقيقة عبادة.. قول نص ساعة بتتفكر فيهم ربنا.. وعنديك يا سيدى ساعة ترفيه.. بلاي استيشن بقى أو قعدة على القهوة أو بولة استميشن.. يا خبر.. أنا نسيت الموبايلات.. ربع ميسدات مثلاً.. وساعة استقبال وإرسال.. وربع استهبال وهزار.. وربع حموم لو بتستحمى كل يوم.. ماتيجوا نحسب كده.. علشان مادوشكوش بحسابات.. أنا هاحسب وأقولكو الإجمالي علطول.. ولو مش

واثقين فيا ابقو احسبوا ورايا.. الإجمالي يا سيدى طلع: ٤٥ , ٢٤
أربعة وعشرين ساعة وخمسة وأربعين دقيقة.. خمسة وأربعين دقيقة
زيادة على الساعات اللي خلقها ربنا في اليوم الطبيعي.. يعني يومنا
مش مكفي.. يانهار احسوس.. أمال هانلاقي إمته وفيين وقت للفكر
والإبداع؟ وقت للتأمل؟ وقت للسعادة والفرح والقعاد مع العيال؟
وقت لزيارة الأهل وصلة الرحم؟

واضح إننا محتاجين وقت إضافي يا جماعة.

عصيدة عصاء (*)

محтар أكتب عن إيه! لا أنا مش محтар أكتب عن إيه. أنا محтар أكتب إيه أساسا!! مافيش في دماغي أي حاجة أكتب عنها. حاسس إن دماغي عاملة زي ما تكون أنبوبة غاز قاطعة النفس وما فيهاش ولا نقطه غاز. قلبتها يمين وشمال ونيمتها على جنبها وعلى ظهرها وبطنه جايز ألاقي فيها شوية كلام مكتونين في القعر يعملوا لي حتى سطر ولا سطرين يساعدونني في اللي هاكتبه واللي أنا لسة لحد دلوقتي مش عارف هو إيه. أصعب حاجة إن الواحد دماغه تبقى عاملة زي الأنبوبة كده تتفاجئ بأنها فاضية بدون تمهيد أو أي سابق إنذار.. يابختهم اللي عندهم غاز طبيعي.

أكتب عن إيه؟ بس.. لاقيتها.. أنا هاكتب شعر، أو هاجرب أكتب شعر! بس يا ترى أي نوع من أنواع الشعر؟ عامي ولا حُر ولا جاهلي؟ أنا أكتب شعر حُر علشان أبقى حر ومش متقييد ومرحّج كده وفاكك، وكل اللي ييجي في دماغي الفاضية دي أكتبه. أنا هاكتب قصيدة.. أو

(*) تم نشر هذه المقالة بتاريخ: ١٠ من مارس ٢٠١٠.

بمعنى أكثر صراحة هاكتب عصيدة! وأتمنى أن لا يقرأ هذه العصيدة أي شخص له علاقة بالشعر من قريب أو من بعيد حتى لا يتأنى من الحرية المطلقة والمجربة من كل بحور الشعر أو مدارسه أو قوافيه أو تفعيلاته التي سوف أبتعد عنها كابتعادي عن المطبات الصناعية في الشوارع؛ ليس لأنني سأسلك مدرسة جديدة في الشعر، ولكن لجهلي بها. أعتذر كل الاعتذار عما سيقدر مني وما سأرتكبه في حق الشعر والشعراء. أعتذر لأحمد شوقي وحافظ إبراهيم وجبران خليل جبران وأبو العلاء المعري وصلاح عبد الصبور والأبنودي وسيد حجاب وأمل دنقل وصلاح جاهين وبهاء جاهين وبهاء الدين محمد وأيمن بهجت قمر وإسلام خليل وبلحة العربي وزقلة المدب! أعتذر لكل إنسان ليس فقط يكتب أو يقرأ الشعر بل حتى لو كان يادوب يكتب اسمه. أعتذر للكلام عن اغتصابي له وإخراجي له من تراصه فوق السطور بشكل طبيعي إلى محاولة انتهاك حقوقه ولبي حروفه حتى أنظمها بشكل زجلي أو حتى نثري.. أعتذر له عن هذا النثر الذي سأنشر مفرداته وأهدر نقاطه.. ومن المؤكد أنه كان سيأبى أن تنشر.. وأعتذر أيضاً للكلمات التي سأخذ بها وأوهمها أنني سأصنع منها شعراً عظيماً متناسقاً منظوماً ولن يكون إلا شعراً يشعرها بحجم الكذبة التي سأكذبها عليها.. ولو حاولت الحروف أن تتملص من القلم هرباً من عشوائية شعرى أو سذاجة أو ركاكة معانيه سأغلق عليها القلم حتى لا تهرب. وبالرغم من اعترافي الكامل بجريمي الشعري التي سأرتكبها في حق الشعر والشعراء والأدب والأدباء، واعترافي أن ما سأقوم به نوع من أنواع قلة الأدب.. وبالرغم من أنني ما زالت أمامي الفرصة للتراجع أو أمحو كل الأدلة التي ستدينني بأن

لا أرسل هذه المقالة لكي لا تنشر وأرسل غيرها.. ولكتني لن أكذب عليكم وأخبركم أن الوقت أصبح ضيقاً على كتابة مقالة أخرى. بالكاف أصبح الوقت ضيقاً ولكتني لا أملك غيرها جاهزاً للنشر.. لقد بدأت كلامي معًا قائلًا إنني أشعر بأن رأسي أشبه بأنبوبة غاز فارغة.. ولكتني وجدتها مليئة وأرجوكم أن تتونحوا الحذر حتى لا تنفجر في وجهكم أثناء قراءة هذا الشعر الغازي الخانق.. وإليكم هذه العصيدة العمصاء التي وإن دلت على أي معانٍ فستكون معانٍ غير مقصودة وربما مقصودة بدون قصد.. ولتكن هذا هو اسم العصيدة «مقصودة بدون قصد» فلنبدأ التلخيص.. عفوا.. محاولات التأليف:

مقصودة بدون قصد
مرصودة كل الرصد
مكتوبة عن عدم
عمرها من زمن مد
مبحورة من غير بح
مدبوحة من غير سح
منقوطة من غير نقط
مغلوطة من غير غلط
صعبان عليا حالك اللي اتقلب
مسكين بجد تاريخك اللي اكتأب
ميمك مالت من تقل همها
نشيدك اتبدل بكلام غمها
صادك صياد مشهور بالأسر
روحك راحت في لحظة غدر

رأوك راقدة بلا قومة
 مش سامع عليكي لا صويته ولا زوومه
 علمنك ما بيرفرش
 هواكي مابيطيرش
 صعبان عليا حالك اللي اتقلب
 مسكين بجد تاربخك اللي اكتأب
 شايك ليه خشب وقهوتك بقت سادة؟!
 عيشك بقى حطب وملحك زاد بزيادة
 أهلك؟ مافتكرش.. دول غلابة وطينهم يابس
 ضحاكم مدفون في وشهم اليائس
 مال عيالك كده كبروا قبل أوانهم بكثير
 وأما سألنا عن السبب.. حلقولنا إن هو ده التغيير
 العجز في وشوش شبابك بقع
 والبكاء في عيون عواجيزة ببرطع
 زمنك مارد بوشن بارد منك مابيتكسفش
 تميليه مهمما تميليه مابيتكسرش
 صعبان عليا حالك اللي اتقلب
 مسكين بجد تاربخك اللي اكتأب
 يا خسارة ماضيك اللي اتكتب
 خيرك ضاع وغيرك كسب
 واللي بحبك عاش كسبان مات بعد ما اتغلب
 جمالك بقى بس.. اسم
 اتنقل من اسم لاسم

لسانك فقد النطق

صراخك مرار في البق

نهارك من سكانك خاف واستخبي ورا السور

ليلك من سرائك كره نفسه وبصلنته بقى مضرور

العمى فيما بقى نعمة البصر.. والحكم بينما بالظلم انتشر

شبابك العجز بقى فخرهم.. ومن حقهم

أصل بعد التحرير عن انتحال شخصية همهم اتسجن حلمهم

الخرس بقى صوت الجرس.. والحمار ركب الفرس

صعبان عليا حالك اللي اتقلب

مسكين بعد تاربخك اللي اكتأب

الإيد خايفه من السلام

والبطن ما بيشعهاش الكلام

والدفى في البرد عمره ما ينام

الشفاء للمرض بقى زي حب الملاك للشيطان

الفقر من كتر فقره اتقلب بلطجة

مليون ترمي في سهرة.. وعند الفقير البريزه معصليحة

الجهل في الفصول عشش.. والمخ في دماغ العيال مشمش

الكبد تلف من كل حته والطحال راكب له جلدة

القلب عايزله زقة والمعده حيطانها لازقة

سرطان هد الجنة.. كبير صغير مش فارقة

تبرعات تبرعات.. حسابات وحسابات

صرف أدوية بالألافات.. وإن مامعكش.. في بيتكو تبات

وإن عيطة يبقى خلاص زيك زي إلى قبلك فات ومات

يأتدفع ياتمشي من سُكات
وإن ادأك فرصة هايسقاها بصلّي على النبي عليه أفضل الصلوات
عليه الصلاة والسلام.. فرصتي لحد فين؟
النهاردة الاثنين.. معاك لحد التلات

يأتدفع ياتبع عيالك أو اكفر بمصيبة رينا كتبهالك
انتخابات انتخابات.. هَتِيفَة وملوجستات
الصوت بوجبة والتزوير وظيفة واجبة
يُفْطِرُ وألوان بالزوفة

هتافات وأغاني معزوفة
أحزاب قديمة وأحزاب لكل يوم
أحزاب هاتيفه وأحزاب تموت في النوم

حزب واصي وحزب وعد
حزب للأمير وحزب للوغد

حزب يبني والثاني اللي اتبني يهد
حزب واحد وحزب اللي فيه ما يتعد

حزب لأ في عين الثاني أية
وإن نجح لأ تبقى بقدرة قادر لأ أية

صعبان عليا حالك اللي اتقلب
مسكين بعد تاربخك اللي اكتأب

عارف لما تشوف الصبح بيطلع.. وانت قاعد
لما تلاقي قلبك بيدق وانت بارد

أو تنام وانت شارد.. وتجري وانت واقف.. وتبكي وانت ساكت
عارف لما عينيك تشوف جوة ناس.. وتحس بإحساس

عارف لما تبقى كل حاجة غلط صح.. وكل حلال حرام
المية تبقى نار والنار تبقى مطر
عارف لما تسكت وجواك مليان كلام
وتتكلم وانت مش طايق الكلام
تشوف الكدب من العينين باظظر
وإن اتكلمت هاتبقى عينيك بتشوف مش زي ما انت باصص..
تمشي مش زي ما انت رايح
تمنى تموت وانت عايش
أو تعيش بس مش على الهاشم
لما تحس إنك نصين لحاجة واحدة بس مش بتوع بعض
نص برق والثاني رعد
لما الأوتار تعور السمسمية
والدم يبقى فيه
صعبان عليا حالك اللي اتقلب
مسكين بجد تاريخت اللي اكتب
شوية حرفة وحرفجية.. شاطرين.. بس في الفورياجية
عارف ولا مش عارف؟!
تفتكر في كام واحد عارف إنه مش عارف؟!
و كام واحد عارف إنه عارف؟!
و كام واحد مش عارف إنه مش عارف؟!
و كام واحد مش عارف إنه عارف؟!
أهم حاجة إن سمير صبري عارف إنه سكر حلوة الدنيا سكر
صعبان عليا حالك اللي اتقلب

مسكين بعد تاریخك اللي اكتأب
 احنا جواكي مسافرين وشوقنا للرجوع مكابر
 لا جوعنا شبع ولا حزننا فرح ولا مرضنا خف
 الجوع أفندي اتجوز ست الحزن وبكفن مرضهم اتلف
 أنا بس عايز حد يفهمنا.. هو احنا مفروضين عليكو ولا حاجة؟!
 ربنا يكفيكوا شر مرض الحاجة
 عارفة إيه اللي موتنا؟ الحاجة
 الحاجة أصعب حاجة
 الحاجة لحرف وسط الكلمة مش عايزه تكمل
 الحاجة لصوت ميت جوة حلق مش عايز يطلع
 الحاجة لروح زهقانة من صاحبها ومش عارفة تطلع
 الحاجة لودن مرة تسمع
 الحاجة لقلب نفسه يخشع
 الحاجه لضمير مايكونش للغلط مُقنع
 ربنا يكفيانا ويكفيك شر الحاجة
 قول لنا نمشي لو مش عايزنا في حاجة
 انتهت العصيدة

أعترف لكم أنني أحببت الشعر وكتابته، ولن تكون هذه هي
 المرة الأخيرة لكتابة عصائد شعرية، وأتمنى أن لا تكون هذه هي
 المرة الأخيرة التي تشترون فيها الجريدة.. وأخيرا وليس آخرًا وقدر
 اعتذاري المسبق عن ما كتبته بقدر تأكدي البالغ العاقل الحر بأنني
 شعرت بكل كلمة كتبتها في «عصيدة بدون قصد».

في النهاية أدعوا الله أن لا يخرج وحي الإبداع والتأليف الخاص
بتأليف الروايات من بيت إبراهيم عيسى أبداً حتى يظل هكذا متفرغاً
لتأليف الروايات.. فينشر مقالتي في الصفحة الأخيرة.. وربنا يكفينا
دفء النشر في الصفحات الجوانية.

أبطال البطالة (*)

«مطلوب موظف».. «مطلوب موظفة».. كتير مننا زمان قروا العباره دي وخصوصا على فتارين المحلات. راحت فين العباره دي دلوقتني.. اختفت! مع إن المحلات لسه زي ما هي موجودة. دلوقتني العباره اتحولت لـ «مطلوب وظيفة خالية» الشغل بقى مشكله.. مابقاش في شغل.. ولأن الناس مش لاقية شغل.. ابتدوا يشتغلوا بعض.. ده حتى بقى مصطلح دلوقتني.. تلاقي واحد بيقول على واحد تاني «ده اشتغالة»!

نفسى أعرف إيه مشكلة «مشكلة البطالة».. أصل البطالة دي مشكلة هي نفسها عندها مشكلة.. فده معناه إن احنا لازم نحل المشكلة اللي عند مشكلة البطالة وبعدين نحل مشكلة البطالة نفسها.. أنا تقريبا تهت وتهتوكم معايا.. أنا آسف مش هاعمل كده تاني.. أنا بشوف الناس اللي عندهم بطالة عايشين في بطولة.. كونهم مستحملين البطالة ده في حد ذاته عمل بطولي.. ولو تأملنا كلمة «بطالة» و«بطولة»..

(*) تم نشر هذه المقالة بتاريخ: ١٧ من مارس ٢٠١٠.

هاتلاقي إن الفرق بينهم حرف.. شيل الألف وحط واو.. هاتتحول الكلمة بسهولة من بطالة لبطولة.. طب فين المشكله بقى؟ ما حلها سهل جدا اهو.. الكلمة اتحولت في لمح البصر من بطالة لبطولة.. ولو في حد في حالة بطالة وعايز يبقى في حالة بطولة يشيل ده من ده يرتاح ده عن ده.. وعجبني.. العاطلين بقوا كتير.. أوي.. ولو دورت عليهم هاتلاقيهم في أماكن كتير.. هاتلاقيهم قاعدين على القهاوي بيترجوا على اللي رايح واللي جاي.. واللي مامعهوش حق كباية الشاي هاتلاقيه واقف على الناصية. العاطلين هاتلاقيهم قاعدين على منتديات الإنترت بيحاولوا يضيعوا وقتهم قال يعني في حاجة مفيدة. العاطلين هاتلاقيهم سر حانين في أسقف غرفهم ليلاً متخلين أشكالاً لأحلامهم في تلك الأشكال التي صنعها تodashir البياض بفعل الزمن فتهاوت وظهر من خلفها خرسانة السقف المسلحة التي أصبحت أضعف بكثير من خرسانة هذا الزمن المسلح بكل قوانين الهبل. لقد لانت الخرسانة السقفية بأحلام ساكني غرفها ولم تلن تلك الخرسانة الزمنية ولم يفكر حتى سيخ واحد فيها بأن يلين. تشدق الطلعاء وسقط عليهم بأحلامهم التي لم تتعذر حدود سقفهم. سقطت عليهم وهم يرسمون واقعاً خيالياً هشاً بخطوط شقوقه، فهذا خط يرسم زوجة وأخر يميل وينحدر بقوة مع هذا الشق العمودي فيرسم وظيفة، وأخر يرسم متزلاً بحديقة صغيرة، وشقّاً يرسم ولا دابينات ولدوا من صلب شق آخر.. وهذا شق صغير يولد بين الشقوق ويرسم أملاً في تحقيق الشقوق إلى واقع.. ولكن يا أسفاه ما هي إلا شقوق.. ولن تبدو غير ذلك مهما كانت عظمة تخيلهم. عاطلون يقرأون أحلامهم من شقوق أسف غرفهم والتي لا تختلف كثيراً عن قراءة خطوط القهوة في

فنجان بين أصابع دجال أو دجالة من دجالين هذا الزمان الأهلب..
أحلام كثيرة يقرأونها ولا يعيشونها إلا في السقف.. ويا خوفي أن
يأس خيالهم ويضمر فيتحول إلى شقوق ترسم قبورا.

أعتقد أنه لكي يتم حل مشكلة البطالة لا بد وأن تتوفر ثلاثة عناصر..
اثنان غير هامين بالمرة، وثالثهم أهمهم، لو لم يتحقق وجوده فلا
أهمية لسابقيه من العناصر. أول هذه العناصر هو وجود عاطل يريد
العمل.. وما أكثرهم.

ثاني هذه العناصر هو وجود عمل لكي يعمل به هذا العاطل.
ثالث عنصر وأهمهما كما سبق القول هو وجود واسطة تؤهل هذا
العاطل للعمل بحيث يمكن أن يخطف الوظيفة من آلاف العاطلين
آمثاله. ولو توفرت هذه العناصر الثلاثة يمكن حل مشكلة البطالة
لأي عاطل. طيب اللي ماعندوش واسطة يعمل إيه؟ سهلة.. يدور
على واسطة يجيب بيهها واسطة. ولو ماعندوش ممكن يجرب يحل
مشكلة البطالة لنفسه. والحقيقة أنا جت في دماغي فكرة عبطة بس
هاقولها لك وياريت ما تقولوش على عبطة. لو أنت مثلا جبت ميت
سنارة وحطتهم في النيل.. انت مش هاتجipp ميت سنارة ولا حاجة..
أنا بضرب مثل.. تفتكر مافيش ولا سنارة من المية دول ممكن تغمز؟
أشك. جائز مافيش ولا سنارة هاتغمز في أول ساعة أو ثاني ساعة،
بس أكيد ممكن تغمز حتى ولو مش في نفس اليوم خالص.

طيب على غرار المثل السابق لو جبت ورقة بيضة أو مسطرة.. على
حسب لو كنت بتحب السطور أو البياض أكثر.. اللي يريحك.. وكتبت
على الورقة دي اسمك وسنك وعنوانك، اكتب فيها أنا شاب مصرى

اسمي فلان الفلاني، نفسي أشتغل ومستعد أشتغل من غير مرتب أول تلات شهور وبين قوسين اكتب لهم «جريوني». اكتب لهم إن كل اللي انت عايزة مصاريف المواصلات وعلبة سجائر لو كنت بشرب. وقول لهم يسلّموك علبة السجائر مفتوحة علشان مايشكوش إنك ممكن تكون مابتدخنش وعايز العلبة تبيعها، أو كل ماتعوز سيجارة هما يدولك، وطبعاً ماتنساش تكتب رقم بطاقةك، ويarityt يبقى الرقم القومي لأنه طالع موضعه جداً دلوقي، ومعلش اكتب كمان شهادة التخرج وسنة التخرج اختياري، جايز تنفع، وصور الورقة دي بعدد السنانير اللي انت مش حاططهم في النيل أصلاً.. وجمع أكبر عدد من العنوانين؛ عنوانين لشركات و محلات ومطاعم وقرى سياحية... اللي تلاقيه قدامك، وابت لهم الطلب و خليك رخم. تفكّر لو بعت لميت عنوان ما فيه ولا عنوان من دول ممكن يغمز؟ أشك. ولو ماغمزش بعت لغيرهم تاني وتالت. لازم يبقى عندك أمل وإصرار ورخامة. أنا أعرف ناس كتير سبب شغلكم رخامتهم. المهم يكون عندك أمل. ولو حصل واستغلت بالطريقة اللي من غير مرتب دي.. اقتل نفسك وأثبت وجودك وحب الشغل كأنك بتاخذ خمس تلاف جنيه في الشهر. انسى الفلوس ولو أول تلات شهور بس. تفكّر لما صاحب الشغل يلاقي واحد مش هايأخذ مرتب ويستغل بذمة وضمير زيك كده مش هايتمسك بييك؟! ده أكيد عمره ما هايفكّر يفرط فيك أبداً.. و ساعتها بقى.. تلعب الدنيا.. تطلب مرتب حلو يا حلوا.. يا إما تسيبله الشغل أبو بلاش ده وتمشي. ساعتها هايديلك مرتب يا إما هايقول في ستين داهية. وده معناه إنك لازم تمشي وتخلى عن رخامتك لأنه راجل أرخم منك، ورخم على رخم مايرولش. و ساعتها يبقى ماقدامكش

بقى غير الطريقة التقليدية.. اللي هي.. إنك تبص للشهادة بتاعتك؛
شهادة الجامعة اللي سعادتك متخرج منها، وتركتها على جنب وتفكير
ازاي تستغل حاجة مالهاش أي علاقة بالشهادة. صدقني ياما ناس كتيرة
اشغلوا شغلانات مالهاش أي علاقة بدراستهم. اللي خريج حقوق
وبيشتغل في السياحة، واللي خريج تجارة بيشتغل في المقاولات.
واللي خريج آداب وبيشتغل طيار، قصدي في المطار. صحيح كل دول
اشغلوا عن طريق الواسطة بس أكيد في أمل. المهم تركن الشهادة على
جنب وتمسك جرناال الأهرام مثلاً وتفلبي صفحة الوظائف الخالية،
ولما تزهق ممكن تاخد استراحة وتقرأ كام خبر في صفحة الرياضة
 ولو مالكش في الرياضة وأنا أشك، يبقى اقتل الجرناال وريح عينك
شوية من الخط الصغير اللي مكتوب بيه باب الوظائف الخالية وارجع
تاني دور جايز تلاقي وظيفة.. ولو إني أشك، بس جايز.. ولو مالاقتش
جرب في جرناال تاني. صحيح إنك ممكن تلاقي نفس الوظائف اللي
في الجرناال الثاني هي هي اللي في الأولاني، بس جايز تلاقي وظيفة
مش مشابهة.. ولو إني أشك، بس عموماً أنا عايزك تتفاعل من موضوع
الشك ده؛ لأنك طالما إنك بتشك إذن أنت موجود! ولو شكيت إنك
موجود ممكن تتأكد من صفحة الوفيات وأتمنى إنك ماتلاقيش اسمك
فيها.. ولو إني أشك.

زغروطة وحشة (*)

أنا عارف إن كلمة «زغروطة» بتكتب بالدال مش بالطاء؛ يعني «زغرودة». بس أنا حابب أكتبها «زغروطة» بدون ما ابقى مُخرب للغة العربية. بس أنا حاسس إن الطه مناسبة أكتر لمعنى الكلمة. يعني تخيل لو انت في خطوبة ولا في فرح ولا حتى في ظهور، وسمعت واحدة راحت مزغرطة زغروطة حلوة وحيثت تعرف مين اللي زغرطت دي، بذمتك الأحلى إنك تقول: مين اللي زغرطت؟ ولا مين اللي زغردت؟ ده مش بعيد لو جوزها سمعك بتقول على مراته «زغردت» ممكن يطاهرك بدل العيل اللي بيظاهر! أو تخيل لو نجحت بعد ما سهرت الليالي في المذاكرة ومققت عينيك في الكتب وشرب شاي وقهوة ودروس خصوصية وجبت مجموع كبير جداً وراجع البيت فرحان إنك هاتدخل طِب وتبقى دكتور.. ووسط ده كله مامتك تقولك والله لانا مزغردا لك. راحت الفرحة.. والمجموع الكبير نقص النص.. وكلية الطب بالنسبة لك بقت معهد كمبوسكو. مرة سمعت صوت

(*) تم نشر هذه المقالة بتاريخ: ٢٤ من مارس ٢٠١٠.

زغروطة في المطار.. سمعتها من غير ما اشوف مين اللي مزغرطها..
صوتها كان وحش أوبي وبایخ. الأهم بالنسبة لي كان السؤال اللي
هو ياترى اللي بتزغرط في المطار دي بتزغرط ليه؟ حد وصل من
الحج؟ بس ده ما فيه حج في ينایر.. جايز حد نجح!! طب اللي
نجح ده نتيجته متعلقة في المطار مثلا وجاي يشوفها؟ ولا واحدة
حامل في التاسع كانت مسافرة أو راجعة وجالها الطلاق وولدت!!
بس أكيد لو واحدة جالها الطلاق وهاتولد في المطار أهلها هايطلبوا
الإسعاف أوقع من إنهم يقعدوا يزغرطوا في صالة السفر.. تخمين
خطئ.. طب إيه؟ إيه سبب الزغروطة الوحشة اللي رنت في مطارنا
دي؟! صوت الزغروطة اللي مالهاش صاحب دي كان بيقرب مني
كل شوية لحد ما أخيرا لاقيت مجموعة ناس كده ووسطهم عروسة
لابسة فستان فرح أبيض أو حش من الزغروطة.. وفي رقبتها شبكة
الماظ ذوقها بشع.. لاقيت الناس دول ملفوفين حوالين العروسة
وكان ناقص يعملوا دائرة ويرقصوا حولها ويعنولها ياطالعة الطيارة
ياماشالله عليها. إيه اللي جاب العروسة دي المطار بفستان فرحة؟
جايز اتلخبطوا بين المطار والفندق اللي جنب المطار. كل ده مش
مشكلة، مش مشكلة إن العروسة بيترغط لها في المطار ولا إنها جاية
تتجوز في صالة ثلاثة، المشكلة مش في فستان الفرح أم ديل طويل
أو حش من فستانه ده، المشكلة هاتركب بيها الطيارة ازاي؟ هاتعدى بيها
من بوابة الكشف بتاعة المعادن اللي علطول بتصفر دي ازاي؟ هاتطلع
بيها سلم الطيارة ازاي؟ هاتعدى بيها على الكرسي ازاي؟ هاتأكل ازاي؟
لو حبت تروح الحمام هاتروح ازاي؟! وازاي.. وازاي.. وازاي..
ازيات كتير قوي خلتني أهنج! معقوله في عروسة تسافر بفستان فرح

أكبر من الطيارة! ده فستان عايز طيارة لوحده. ده الواحد بيقى في
الطيارة عايز يقلع كل هدومه من الزهر. طيب لو الطيارة وقعت في
المحيط وجاتلنا فرق الإنقاذ ينقذونا ولقوا عروسة بفستان أبيض
بتعمق وسط المحيط، إيه المنظر الغريب ده؟ أكيد هايتفتكر وها عروسة
المحيط ومش بعيد يسيبوها علشان المحيط مايبيقاش من غير عروسة.
الله يكون في عون المحيط وفي عون عريسك. آه صحيح هو فين؟
ولأن العريس لازم بيقى لابس بدلة فدورت عليه بعينيا بس مالاقتش
أي بدل ملبوسة.. فين العريس؟ جايز يكون مش لابس بدلة.. وليه
مش واقف جنبها وساييها واقفة لوحدها وسط الدايرة. فجأة ظهر
راجل لابس شورت ووقف جنبها وهو بيضحك وبمسقطاوي..
فضولي إني أحدد ده العريس ولا لأنساني آخذ بالي إن الراجل ده
ياباني.. عريس ياباني.. ياسلاااام.. صحيح كل واحد بيلاقى نصه
التاني حتى لو كان ياباني.. الحقيقة أنا ماكتتش عارف هو ياباني
ولا صيني.. أصلهم قطعية واحدة.. ارتحت بعد ما شفت العريس
الياباني.. بس ارتياحي ده راح مع ضربة فلاش من كاميرا صغيرة كانت
في إيد واحدة يابانية قصيرة بشورت برضه واقفة بتتصور العروسة مع
الراجل الياباني ده. الراجل طلع جوز اليابانية. أية كده صح، الياباني
لليابانية، لأنه لو كان الياباني ده هو جوز العروسة دي أكيد ماكتتش
اليابان وصلت للي هي فيه دلوقتي. طلعوا اتنين سياح يابانيين كانوا
يتتصورا مع العروسة علشان يرجعوا اليابان يسيحو لنا بالصور! طيب
والعريس المصري بقى إمتى هايبان؟ اظهر وبان عليك اليابان.. لم
يظهر العريس المصري. فضولي اللي هايو ديني في داهية خلانى
أتخفى ورا شنطة وأقرب منهم أكثر وأحاول أسمع أي حاجة تقتل

فضولي. سمعت السيدة الفرحانة اللي كانت بتزغرط زغاريطة وحشة بتتكلم مع سيدة زعلانة ماكانتش بتزغرط خالص. الزعلانة قالت للفرحانة: «مش كان محمود ابني أولى بعزة بنتك؟ أهو على الأقل كنتوا عارفيه وحافظييه ومربيييه وابن خالتها وجارها وكان زميلها في الكلية والشغل». الفرحانة قالت لها وهي باصة على عزة بنتها: «كله قسمة ونصيب يا اختي». الزعلانة قالت لها: «والقسمة والنصيب يقولوا انکو تجوزوها الواحد ماتعرف فهوش؟ افرضي طلع متجوز؟»، الفرحانة قالت لها: «الشرع حلل له أربعة».. قامت الزعلانة قايلة لها: «ده انتو حتى ماتعرفوش شكله». الفرحانة ماسكتتش وقالت لها: «مين قالك ما هو بعت لنا صورة حلوة قوي!». الزعلانة بزعـل ملـيان فـقدان أـمل قـالت لها: «أنا مش مـصدقة إنـك تـجوزـي بـنتـك لـواحد بـتوـكـيل لـا تـعرـفـها وـلاـ يـعـرـفـها وـلاـ شـافـهـا وـلاـ سـفـرـهـا كـدـهـ كـأنـها كـرـتونـةـ وـلاـ شـنـطـةـ!». الفرـحانـة بـفـرـحـ مـلـيانـ مـصـلـحةـ وـجـهـلـ قـالتـ لهاـ: «هيـ هـاتـعـوزـ إـيهـ تـانيـ أـكـترـ منـ كـدـهـ؟ دـهـ بـعـتـلـهاـ مـهـرـهاـ مـتـينـ وـخـمـسـينـ أـلـفـ جـنـيـهـ، دـهـ غـيرـ الشـبـكـةـ التـحـفـةـ الليـ فيـ رـقـبـتهاـ، وـلاـ فـسـتـانـ الفـرـحـ الليـ هـايـاـكـلـ منـهـ حـتـةـ، دـهـ كـمـانـ تـلـاقـيـهـ بـشـيءـ وـشـويـاتـ!». الزـعلاـنـةـ بـزـعـلـ صـادـقـ قـالتـ لهاـ: «الـحـاجـاتـ دـيـ فـرـحتـكـوـ اـنـتـوـ.. بـصـيـ عـلـىـ بـنـتـكـ كـدـهـ، شـكـلـهـاـ مـبـسـطـ؟!»، بـصـتـ الفـرـحانـةـ وـبـصـيـتـ مـعاـهـاـ، اـحـناـ الـاتـنـيـنـ مـبـتـسـمـيـنـ، وـفـضـلـتـ الفـرـحانـةـ مـبـتـسـمـةـ وـأـنـاـ رـاحـتـ اـبـتـسـامـتـيـ، الليـ شـفـتـهـ عـلـىـ وـشـ عـزـةـ زـعـلـ وـحـزـنـ كـبـيرـ مـاـخـدـتـشـ بـالـيـ مـنـهـ. أـصـلـيـ كـنـتـ مـشـغـولـ بـفـسـتـانـهاـ أـبـوـ ذـوقـ وـحـشـ اللـيـ مـاـكـانـشـ عـنـدـهاـ حـقـ اختـيـارـهـ، اـتـشـغـلتـ بـشـبـكـتـهاـ اللـيـ أـكـيدـ خـنـقاـهـاـ دـلـوقـتـيـ وـالـلـيـ مـالـهـاـشـ ذـنبـ فـيـ قـبـحـهاـ. عـزـةـ مـاـبـتـضـحـكـشـ وـشـهاـ جـامـدـ كـأـنـهـ بـلـاسـتـيـكـ.. عـيـنـيـهـاـ

ثابتة كأنها عمياء.. باصمة على لوحة مواعيد الطيارات.. لسانها مستخبي
جوة بقها وبيدعني إنه يارب الطيارة ماتطلع.. عزة مقهورة زي أم
محمد وأكتر.. ما صدقتش اللي سمعته بوداني.. عروسة متجوزة
بتوكيل وهاتشحن على جوزها، جوزها اللي الحاجة الوحيدة اللي
شافتها فيه صورة أمها بتقول إنها حلوة أوي وأنا لا يمكن أصدقها..
ولا كنت صدقت إن فستانها ها يأكل منها حنة، وشبكتها تحفة زي
ما قالـت. عرفت عريـس الغفلة من غير ما أعرفه ولا أشوفـه، بـس عـرفـه
من ذـوقـه، فـستان وـحـش وـشـبـكة أوـحـشـ. عـزـةـ كانت باـصـةـ نـاحـيـةـ بـابـ
الـدـخـولـ بـتـشـبـ على طـرـاطـيفـ صـوـابـعـهاـ تـخـطـفـ نـظـرـةـ منـ بـيـنـ زـحامـ
الـنـاسـ بـتـمـيلـ يـمـينـ وـشـمـالـ بـنـظـرـةـ نـفـسـهـاـ تـكـمـلـ لـحدـ الـبـابـ القـزاـزـ، الـبـابـ
الـقـزاـزـ الـليـ كانـ وـاقـفـ وـرـاهـ مـحـمـودـ.. مـحـمـودـ اـبـنـ خـالـتهاـ وـزـمـيلـهاـ
وـحـبـبـهاـ.. مـحـمـودـ الـليـ كانـ نـفـسـهـ يـتـجـوزـهاـ.. مـحـمـودـ اـبـنـ أمـ مـحـمـودـ
الـزـعـلـانـةـ.. عـرـفـهـ منـ غـيرـ ماـ أـعـرـفـهـ.. عـرـفـهـ منـ دـمـوعـهـ.. وـلـوـ كانـ كـلـ
الـدـعـاـ بـيـسـتـجـابـ ماـ كـانـشـ جـهـ مـيـعادـ الإـعـلـانـ عنـ إـقـلاـعـ الطـيـارـةـ الـليـ
رنـ فيـ سـمـاعـاتـ المـطـارـ وـكـأـنـهـ حـكـمـ إـعدـامـ مـحـمـودـ وـعـزـةـ.. بـصـ فيـ
عـيـنـيهـ أـكـترـ ماـ كـانـ بـيـبـصـ.. عـيـطـ أـكـترـ ماـ كـانـ بـيـعـطـ.. حـاـوـلـ يـمـنـعـ دـمـوعـهـ
الـليـ فـضـحـتـ حـبـهـ وـسـطـ شـيـالـيـنـ المـطـارـ.. بـسـ مـاـعـرـفـشـ.. مـاـعـرـفـشـ
يـمـنـعـهاـ وـمـاـعـرـفـشـ أـنـاـ كـمـانـ.

مكرونة باشاميل (*)

ما هي الحقيقة؟

أتحدث عن الحقيقة ككلمة ولست أقصد حقيقة شيء بعينه. وربما أقصد أننا الآن في زمن لا بد وأن تمتلك فيه قدرات خاصة لتعرف من يخبرك الحقيقة ومن يخدعك، قدرات تفوق قدرات محقق مخضرم في جهاز أمن الدولة. ما أشهر جملة نسمعها دائمًا تقول: «الحقيقة أنا مش عارف أقولك إيه والله»، يجب أن تعرف بعدها أن من قالها لن يقول لك الحقيقة أبداً. سوف يضم حاجبيه ويقطبهما ليصبحا حاجبا واحدا أشبه بسطر أسود فوق عينيه فيصبح وجهها لا يعبر أبداً عن الحقيقة. لقد أصبح العثور على الحقيقة كالعثور على سمكة تائهة في المحيط أو كالنعش على ماء شلال. وإن حدث ووجدت هذه السمكة المستحيلة أو تمكنت من النعش على هذا الماء المتحرك، عندئذ يصبح قولها أشبه بالاعتراف بجريمة وكأنها تمس الشرف. إذا وجدت نفسك تتهرب من قول الحقيقة إذن فهناك أمران: إما

(*) تم نشر هذه المقالة بتاريخ: ٣١ من مارس ٢٠١٠.

أنك لا تعرفها وتخاف من ظهورك كجاهل وأنك تفضل نعتك بلفظ المفتى العارف بالحقائق على أن يُنظر لك نظرة تحمل في طياتها اتهاماً يكون مُكتملاً إذا تحولت هذه النظرة إلى كلام يصف صمتك وعدم معرفتك بالحقيقة بأنك جاهل، فتجد نفسك خائفاً من الجهل فتقرر أن تحوله إلى تأليف متقن وتصبح كاذباً أفالاً مُفتياً مؤلفاً للحقيقة لم تكن موجودة أبداً إلا في وحي خيالك اللحظي الذي ستشكره آلاف المرات لإنقاذهك من جهل كاد أن يلتصرق بك! ويأخوفي أن تُتقن كذبك ويكون لسانك راقصاً محترفاً للرقص بحروف الكلام فيرقص مع إفتائك رقصة بارعه تُفتح على أثرها الأفواه وتُدلل الشفاه من إيقاعتها الوهمية، فيصدقك هذا المسكين السائل عن الحقيقة. أما الأمر الثاني الذي كنت قد قاربت على نسيانه وهو أنك تعرف الحقيقة وتعرف أين تسكن ولكنك لا تعرف طريق الشجاعة للوصول إليها والبوج بها، ويصبح خوفك لهذا سبباً في تكاثر الفساد، وتتوالي الأيام والسنين التي ستجعل من هذه الحقيقة التي لا يعرفها غيرك سراً.. تموت ويموت معك ويظهر من بعدك من لا يعرفها فيؤلفها مثلما فعلت أنت.

تنوع الحقائق وتخالف.. تُكتب وتمحى، تُذكر وتنسى، تختفي وقتما لا تريدها أن تدينك وتظهر وقتما تريدها أن تنقذك، تتبدل وتتحول بناء على صفقاتك ورغباتك ونزواتك. أنت تريد الحقيقة لك وليس كما يجب أن تكون. ربما اقتربت مما أريد الوصول إليه. وربما بعدت كل البعد. ما الذي يغير الحقائق؟ المال وال الحاجة إليه؟ السلطة ورغبة الوصول إليها؟ هل الخجل من الحقائق يغير الحقائق؟ وأنا مالي، لا تنخدع في أن ما سوف أتحدث عنه عالم

من الحقائق المتوازية وكيفية تغيرها أو فساد مغيريها. لا لا لا.. لا تنخدع في أن السطور القادمة صراغ لاندثار الحقيقة وغرقها في قاع محيطنا المظلم.

لا لا لا.. لا تتوهم أني سأتحدث عن الحقيقة التي غابت وتشكلت بكل الألوان التي أقسم إنها ألوان جميلة ورائعة وتسر من يراها ولكنها ألوان لا ثبت ولا تلتتصق بأي شيء.

لن أتحدث عن الحقيقة الأشبه بشجرة بلا جذور يحملها من يريد أن يخدوك ويضعها أمامك ولا مانع من كتبة صغيرة تجلس عليها وتضع قدمًا على قدم وتنظل بظل الفروع المهيمنة للخقراء التي إن أمرها الخالق أن تُظهر ما في جوفها لتبدل إلى نيران تقذف أشواكاً تحرقك أنت بقدميك بالكتبة التي تجلس عليها.

لا تظن أبداً أني سأتحدث عن الحقيقة الخضراء الشاسعة التي تراها من الشباك وأنت تركب القطار متوجهًا غرباً أو جنوباً، أو يساراً أو يميناً، تنظر إليها باسمًا مشرقاً فرحاً بهذا الكم الأخضر الساكن الذي لا يتحرك بكل ما فيه من طيور وعصافير بدت كخيالات المائة، خيالات ثابتة صامتة بغربانها السوداء التي تقف على أكتافها. ربما لو أمعنت النظر قليلاً فيما تنظر إليه أيها الراكب ستدرك أن ما تراه مرسوم على زجاج شباكك.. إن حاولت فتحه - ولن تستطيع - فلن ترى إلا سواد الليل، ولن تسمع إلا صوت وقوف القطار الذي لم يتحرك بك فلانكة واحدة من البداية.

إياك أن تعبث بك أفكارك المتفائلة التي لا تقوى على الخروج من جمجمة دماغك بأنني سأتحدث عن الحقيقة التي نعرفها ولا نعرف

بها ونغمـس رءوسنا في التراب كالنعمـام كلما ظهرت في الأفق حتى
تعبر في سلام دون أن نحتك بها.. ونقـسم بعدها إنـنا لم نعرفها ولم
نرـها فلـقد كانت رءوسنا في التراب. ولـن يهم وقتـها إنـ كانت رءوسنا
وـضـعت أمـوضـعنـاـهاـنـحـنـبـأـنـفـسـنـاـ. فالـجـبـنـوـاحـدـمـهـماـاـخـتـلـفـتـدـرـوـيـهـ.

أـسـأـلـكـأـنـتـقـرـأـالـمـعـودـتـيـنـبـالـلـهـعـلـيـكـحـتـىـتـبـعـدـهـهـذـاـالـشـيـطـانـ
الـلـعـينـالـرـجـيمـالـذـيـيـمـكـنـأـنـيـوـسـوـسـفـيـنـفـسـكـبـأـنـيـرـبـماـسـوـفـ
أـتـحـدـثـعـنـغـيـابـالـحـقـيقـةـالـمـسـتـمـرـمـنـمـدـرـسـةـالـأـخـلـاقـالـحـمـيـدةـ
حـتـىـتـمـفـصـلـهـاـنـهـائـيـاـلـتـصـبـحـمـنـمـنـازـلـهـمـ.

حـذـارـكـلـالـحـذـرـمـنـأـنـتـظـنـولـوـلـلـحـظـةـأـنـيـسـأـكـتـبـسـطـرـاـوـاحـدـاـ
يـتـحـدـثـعـنـتـنـوـيـمـالـمـغـنـاطـيـسـيـالـمـسـيـطـرـعـلـىـعـقـولـنـاـوـيـحـرـزـكـلـيـوـمـ
هـدـفـاـفـيـالـزـمـالـكـ..ـيـفـتـحـبـاـبـالـدـوـرـيـالـعـامـوـيـسـدـلـبـدـلـاـمـنـهـسـتـارـاـ
عـلـىـالـفـسـادـ.

لـاـتـتـوـهـمـأـبـداـأـنـيـسـأـكـوـنـهـذـاـفـارـسـالـهـمـاـمـالـذـيـيـقـفـفـيـ
الـمـيـدـاـنـفـاتـحـاـصـدـرـهـصـارـخـاـبـمـاـخـفـيـمـنـالـكـلـامـوـيـسـأـلـعـنـ
الـحـقـيقـةـ..ـحـقـيقـةـالـأـيـديـالـخـفـيـةـالـطـائـلـةـالـتـيـتـلـعـبـالـشـطـرـنـجـ
بـكـلـمـنـفـيـالـمـيـدـاـنـ.

لـاـتـخـيـلـأـنـتـمـتـمـتـيـالـسـرـيـةـفـيـالـصـلـاـةـدـعـاءـعـلـىـأـحـدـ..ـأـنـاـلـاـ
أـدـعـعـعـلـىـأـحـدـ،ـلـاـعـلـىـمـسـئـولـكـانـغـيرـمـسـئـولـ،ـوـلـاـعـلـىـكـبـيرـبـدـاـمـنـ
فـرـطـكـبـرـهـصـغـيـرـاـكـالـذـبـابـةـ.ـتـمـتـمـتـيـمـاـهـيـإـلـاـتـسـيـحـوـحـسـبـنـةـ،ـأـسـبـعـ
لـلـهـشـأـنـكـلـمـخـلـوقـاتـ،ـوـأـحـسـبـنـلـلـهـمـثـلـكـلـمـخـسـبـنـينـ.

لـنـأـتـحـدـثـعـنـأـيـشـيـءـمـنـهـذـهـأـلـأـشـيـاءـوـلـكـنـيـسـأـتـحـدـثـعـنـ

عامل الدليفرى الذى جاء يطرق بابي حاملا علبة كرتونية يستقر
بداخلها دائرة من العجين المكسو ببعض الجبن والخضراوات. هذا
العامل البسيط الذى استنشق أنفه تراب الطريق الدائرى كله، وامتلاء
صدره بلفحات البرد، ورجم كشيطان المزدلفة من الحجارة المتطايرة
من عربات النقل، جاء حتى يُشعـع جوعـي أملـا في بعض الـبـقـشـيشـ.
فتحـتـ الـبـابـ فـوـجـدـتـهـ مـبـتـسـماـ وـكـأـنـهـ مـسـتـيقـظـ منـ حـلـمـ مـلـوـنـ بـأـلـونـ
بـحـرـ جـُزـرـ الـمـالـدـيـفـ..ـ حـلـمـ مـرـصـعـ بـذـهـبـ أـشـعـةـ الشـمـسـ المـنـعـكـسـةـ
عـلـىـ رـمـالـ الشـاطـئـ النـاعـمـةـ.ـ كـانـ يـنـقـصـهـ أـنـ يـتـمـطـعـ أـمـامـيـ بـعـزـمـ ماـ فـيـ
دـرـاعـاتـهـ مـنـ قـوـةـ.ـ نـظـرـ لـيـ وـزـادـتـ اـبـسـامـتـهـ إـشـرـاقـاـ وـتـحـدـثـتـ كـلـ مـلـامـحـ
وـجـهـهـ عـنـ هـذـهـ مـفـاجـأـةـ السـعـيـدـةـ فـيـ هـذـاـ اللـقـاءـ الـمـبـرـمـ بـيـنـنـاـ وـالـغـيرـ
مـقـصـودـ..ـ لـقـاءـ صـنـعـهـ أـورـدرـ لـبـيـتـرـاـ سـمـولـ لـاـ تـسـتـحـقـ عـنـاءـ الـمـشـوارـ
مـنـ الـمـحـلـ حـتـىـ بـيـتـيـ.ـ أـخـبـرـنـيـ بـأـنـ قـلـبـهـ يـمـتـلـئـ بـإـعـجـابـهـ بـهـذـاـ الفـيلـمـ
الـأـخـيرـ،ـ وـاسـتـرـدـ حـدـيـثـهـ عـنـ الفـيلـمـ القـبـلـ الـأـخـيرـ وـكـمـ كـانـ جـمـيـلاـ..ـ
أـمـاـ بـقـىـ الفـيلـمـ الـلـيـ هوـ كـانـ فـيـهـ حـضـرـتـكـ عـلـىـ النـخـلـةـ دـهـ حـكـاـيـةـ!ـ لـمـ
يـتـرـكـ فـيـلـمـاـ إـلـاـ وـأـشـادـ بـهـ،ـ وـلـكـيـ أـقـطـعـ الـحـدـيـثـ مـدـدـتـ يـدـيـ وـأـخـذـتـ
مـنـهـ مـاـ يـحـمـلـ زـائـداـ عـلـيـهـ وـرـقـةـ الـحـسـابـ الـمـتـهـالـكـةـ مـنـ عـوـافـلـ التـعـرـيـةـ
الـتـيـ تـعـرـضـتـ لـهـ فـيـ الطـرـيقـ.ـ تـوـارـيـتـ عـنـهـ لـلـحـظـاتـ آـتـيـاـ بـالـحـسـابـ فـيـ
يـدـ وـفـيـ الـأـخـرـىـ مـاـ نـوـيـتـ إـعـطـاءـهـ لـهـ مـنـ بـقـشـيشـ.ـ أـخـذـ الـحـسـابـ وـبـقـيـ
أـنـ يـطـمـئـنـ عـلـىـ بـقـشـيشـهـ،ـ وـهـنـاـ قـفـزـتـ الـحـقـيـقـةـ فـيـ ذـهـنـيـ مـرـةـ أـخـرـىـ..ـ
هـلـ مـاـ قـالـهـ لـيـ هـذـاـ بـسـيـطـ مـنـ إـعـجـابـهـ بـكـلـ أـفـلامـيـ هـيـ الـحـقـيـقـةـ؟ـ أـمـ أـنـ
بـقـشـيشـهـ الـذـيـ يـنـامـ بـيـدـيـ الـيـسـرـىـ يـمـكـنـ أـنـ يـجـعـلـ الـكـارـهـ مـحـباـ وـيـحـولـ
الـشـرـيفـ لـحـرـامـيـ وـالـشـجـاعـ لـجـبـانـ وـبـسـيـطـ لـحـوـيـطـ؟ـ فـلـنـعـرـفـ..ـ أـخـبـرـتـهـ
أـنـ يـقـولـ لـيـ الـحـقـيـقـةـ..ـ هـلـ كـلـ مـاـ قـالـهـ لـيـ مـنـ قـلـبـهـ فـعـلـاـ أـمـ أـنـ يـجـاـمـلـنـيـ؟ـ

قطع كلامه نهاية سؤالي مؤكداً أن ما قاله ما هو إلا الحقيقة. أخبرته أنه لو قال الحقيقة سأعطيه من البقشيش الضعف. نظر للبقشيش الذي تضاعف في لحظة وابتسم ابتسامة لم أفهمها.. ثم تلجلج قليلاً ولكن اللجلجة راحت بعد أن خطف نظرة أخرى للبقشيش المضاعف وقال: «هو يعني الفيلم الأخير بس هو اللي ماعجينيش أوي».

بدون أن أتحدث ضاعت البقشيش إلى تلات أضعاف. لم يتلجلج وقال: «وبرضه عارف حضرتك المشهد بتاع النخلة ده كان ساذج شوية ما ضحكتنيش خالص». وخوفاً أن أغضب لا حقني قائلاً: «بس ولادي ضحكوا جامد». ضاعت البقشيش ولم ينظر له ولكنه عرف من حركة يدي، وبسرعة أسرع من التي أخبرني بها بإعجابه قال: «والله هو حضرتك بصراحة الأفلام بتاعتكم مش قد كده يعني، أنا أصلي...». وقبل أن يكمل ضاعت البقشيش.. فقال: «أنا أصلي مش غاوي سيليمما خالص». ضاعت البقشيش، فقال: «أنا مش عارف أنت بتمثل ليه أصلاً». ضاعت البقشيش فانتهى حواره بـ«أنا بصراحة لا بحبك ولا بحب أفلامك».. وكان فاضل يستمني بالأب والأم. أعطيته البقشيش فابتسم من جديد وكأنني أفتح الباب لأول مرة. ورحل وهو يلوح لي ناظراً للبقشيش ويدعو لي متماماً في سره.. ولم أسمع الدعاء.. هل كان دعاء لي.. أم علىَّ!

سأتحدث عن أول يوم لهذا الطباخ الجديد الذي أتى إلينا بعد عناء وبحث وتدوير طويل عن طباخ. أيقظني صوته العالي، ذهبت له بعد أن قررت أن أذبح له القطة من أول يوم شغل حتى لا يعيد

الكَّرَّةِ. أَخْبَرَتْهُ بِحَزْمٍ وَبِصُوتٍ أَجْشَ لمْ يُسْتِيقِظْ بَعْدَ مِنْ حَنْجَرَتِي: «لَوْ عَايِزْ تاكلِ عِيشْ هَنَا يَبْقَى لَازِمْ تعرِفْ إِنَّ الْبَيْتَ دَهْ لِيَ احْتِرَامْ. انتَ جَايِ عَلَشَانْ تَشْتَغلْ مَشْ تَرْغِي وَتَعلِي صُوتَكْ وَلَوْ مَشْ عَايِزْ اتَفْضَلْ امْشِي أَنَا مَابِحْبِشْ الْحَالَ الْمَايِلِ!»، كُنْتَ قَاسِيَا إِلَى حَدَّ كَبِيرٍ وَكَانَ الطَّبَاخُ كَبِيرًا أَيْضًا، اعْتَذَرَ فِي خَجْلٍ أَوْ فِي احْتِياجٍ.. اللَّهُ أَعْلَمْ.. طَلَبَ مِنِّي أَنْ أَتَذَوَّقَ صِينِيَّةَ الْمَكْرُونَةَ بِالْبَاشَامِيلِ دِي. غَرَستَ الشُّوكَةَ الَّتِي أَعْطَانِي إِيَاهَا فِي طَرْفِ الصِّينِيَّةِ حَتَّى لَا تَتَشَوَّهَ، لَمْ يَكُنَّ التَّشَوَّهُ الَّذِي سَبَبَتِهِ الْمُخْدَةُ فِي وَجْهِي قَدْ فَارَقَ خَدِّي بَعْدَ، فَزَادَتْ خَدُودِي تَكْشِيرًا زَادَتْ وَجْهِي الغَاضِبِ تَهْجِمًا وَقَسْوَةً. سَبَقَتْ رَائِحةَ الْمَكْرُونَةِ طَعْمَهَا السَّاحِرِ إِلَى أَنْفِي.. تَذَوَّقْتُهَا.. مَا هَذِهِ الْمَكْرُونَةِ الَّتِي لَمْ أَذْقَهَا حَتَّى فِي إِيطَالِيَا؟! انْقَسَمَ وَجْهِي نَصْفَيْنِ: نَصْفٌ عَابِسٌ بِسَبِّبِ مَا فَعَلَهُ هَذَا الطَّبَاخُ عَلَى الصِّبَحِ، وَنَصْفٌ فَرَحٌ بِهَذِهِ الْمَكْرُونَةِ الْخَلَابَةِ وَالَّتِي فَعَلَهَا الطَّبَاخُ أَيْضًا.. الْفَاعِلُ وَاحِدٌ وَالْإِحْسَاسُ بِدَاخِلِي مُتَنَاقِضٌ. خَفَتْ أَنْ لَا يَتَذَكَّرَ إِلَّا التَّنْكِيلُ الَّذِي فَعَلَتْهُ بِهِ فِيمَشِي، خَفَتْ أَنْ أَرْفَعَ وَجْهِي مِنَ الصِّينِيَّةِ فَأَجَدُهُ قَدْ خَلَعَ الْمَرِيلَةَ وَأَلْقَاهَا فِي وَجْهِي وَقَرَرَ الرِّحْيلُ.. وَلَكِنَّهُ لَمْ يَفْعَلْ.. فَقَدْ كَانَ انتَظَارُهُ لِرَأْيِي فِي الْمَكْرُونَةِ أَهْمَ منْ كَرَامَتِهِ الَّتِي بَعْرَتْهَا. حَلاوةُ الْمَكْرُونَةِ جَعَلَتِنِي أَبْتَسِم.. لَا أَعْرَفُ أَبْتَسِمَتْ خَجْلًا أَمْ مَصْلَحَةً. أَبْتَسِمُ هُوَ الْآخِرُ.. قَالَ لِي: «هَاهَ».. قَلَتْ لِهِ: «أَنَا مَشْ عَايِزْكَ تَزَعَّلْ مِنِّي أَنَا زِيَّ ابْنَكَ بِرْضَهُ». مَصْلَحَتِي فِي بَقَائِهِ طَغَتْ عَلَى صِرَاحتِي فِي أَنْ أَبْقَى مَحْفَظَاً عَلَى زَعْلِي مِنْ سُلُوكِهِ، مَصْلَحَتِي جَعَلَتِنِي أَغِيرَ مَا قَدْ قَلَتْهُ مِنْ حَقِيقَةً.. كُنْتَ صَادِقًا وَأَصْبَحْتَ كاذِبًا. اسْتِيقَظْتَ شَجَاعًا وَأَصْبَحْتَ جَيَانًا بِسَبِّبِ مَعْلَقَةِ مَكْرُونَةٍ، وَزَدَتْ جَبَنَا عِنْدَمَا أَصْرَرْتَ عَلَى بَقَائِهِ لِتَناولِ الْغَذَاءِ مَعْنَا،

ولا مانع من أن يأخذ قسطاً من الراحة بعد الأكل في غرفة نومي ..
جلست مع نفسي بعد أن أكلت المكرونة كلها وماتت شهوة الأكل
بداخلي وكل حاجة راحت لحالها. نظرت لنفسي في مرآة الحمام
وأنا أغسل يدي محاولاً إخفاء تلك الصلة التي كانت كالدماء التي
لطخت يدي من جراء هذه الجريمة الشنعاء. نظرت لنفسي ووجدتني
أقول لها: «الحقيقة مش عارف أقولك إيه والله».

وزير التنمية والتقليم (*)

بحكم عملي في السينما قرأت الآلاف من المشاهد في السيناريوهات وشاهدت الآلاف منها أيضاً، ولكنني شاهدت مشهداً من بضعة أيام أقسم لكم إنني لم أضحك في حياتي مثل ما ضحكت على هذا المشهد. مشهد كوميدي ضاحك لدرجة الكركعة الهستيرية ثم البكاء. هذا المشهد ربما شاهدناه جميعاً عبر الفضائيات أو الإنترن特. مشهد لم يكتبه مؤلف بل كتبه الواقع التعليمي في المدارس والذي أصبح طلابه وأباء طلابه ومدرسيه ومدرساته ووجهاته وموجهاته وكلاؤه ووكيلاته وفراشته وفراشته وفراشاته يعيشون فيه كل يوم دراسي. لقد ضحكت ضحكا مخيفاً. ما هذا الكم من الإفيهات الارتاجالية المتعاقبة التي يعجز خيال كثير من الكتاب على تأليفها و مجرد التفكير فيها؟ ليس لعدم تمكّنهم من الكتابة ولكن لعدم قدرتهم على تقديم مثل هذا المشهد لا بتعاده الكلبي والجزئي عن عالم التصديق. سأحكى لكم المشهد الذي رأيته علشان اللي ما شافهوش يبقى عارف بتتكلم على إيه. سأحكى لكم مشهداً لو

(*) تم نشر هذه المقالة بتاريخ: ٧ من إبريل ٢٠١٠.

كنت شاهدته في فيلم لن أصدقه، وستكون الجملة التي سوف أقولها بعد مشاهدته هي ... خلوني أحكي المشهد الأول وبعدين أبقى أكتب لكم الجملة:

كان مكان المشهد في إحدى المدارس الابتدائية الحكومية.. الحكومية للأسف.. في زياره مفاجئة غادرة بمن لا يريدها ومن لم يتوقعها أو يخف منها وصل السيد الدكتور وزير التربية والتعليم صباحاً إلى هذه المدرسة الابتدائية والتي كان ولا بد أن يسموها اسمآ آخر غير هذا الاسم المكتوب والمعلق على جدرانها. وصل الوزير ودخل من الباب الخلفي - الباب اللي لقاء قدامه - ماذا وجد الوزير عندما دخل المدرسة؟ وجد الحوش.. فيه إيه بقى الحوش؟ فيه هرج ومرج وعيال بتصرف وعيال بتزمر وعيال بتلعب ويتجرى حوالين الوزير.. فين الطابور؟ أكله السبع! فين تحية العلم؟ العلم ما بيحبش حد يحييه ولا يصبح عليه! فين الرهبة والقدسية بتاعة الطابور؟ كلتها القطة! طابور إيه يا معلم صل على النبي! طبعاً كل ده كلام لم ينطق به لسان أحد، ولكن كانت تنطق به الصورة التي شاهدتها. شاهدت طابوراً في متنهى النظام.. ده اللي كان نفسي أشوفه.. سمعت تحية العلم بأصوات التلاميذ الحماسية الملائكة بحب الوطن جعلت العلم بييرفر في يوم ما فيهوش هوا.. ولا شمس وحياتك.. يوم أغبر كان نفسي أشوف فيه تحية العلم اللي أنا تخيلتها دي. ابتدى الوزير يلف حوالين نفسه يمين وشمال ويدور على أي حد يكلمه.. ولما أهل المدرسة حسوا إن في رجل غريبة دبت في المدرسة واكتشفوا إن الرجل دي رجل وزير التربية والتعليم.. ها صلت الدنيا أكثر وظاظط على الآخر.. كله جري عليه.. والحوارات اللي كنت باسمها من

اللي واقفين حواليه كلها حوارات توضح أن صاحب الجملة مالوش
دعوة باللي بيحصل ده.. ده أنا غلبان!!.. منهم سيدة فاضلة محجبة
وعلى خلق ما عرفش هي مين ويارب ما تكون مُدرسة لأنني هاتضايق
أوي لو طلعت كده علشان اللي قالته. سمعتها بتقول للوزير لما سألها
عن الهرجلة دي قالت له: «أصل انت جيت فجأة».. يا سلاااام! لا
تعليق - والله ما أنا معلق على الجملة من كتر ما هي تضحك وتبكي.
طبعاً أول حاجة عملها الوزير إنه سأل عن المسؤول عن هذه المدرسة،
وطبعاً كلنا عارفين من ساعة ما كنا عيال في المدارس إن المسؤول
الأول والأخير والمسؤول عن كل كبيرة وصغيرة في المدرسة هما
الطلبة طبعاً. علشان كده أنا مش عارف ليه بقى الوزير كان بيسأل عن
الناظر! عايز منه إيه؟ يعني مش كفاية إنه جاي فجأة وبدون ميعاد!
كمان هايسأل على الناظر؟ زمن عجيب صحيح، وزير التعليم يروح
مدرسة مايلاقيش الناظر فيها يقوم بسؤال عليه! معلش بكرة الزمن
يتعدل.. وزرا آخر زمن! عايز أقول وأنا مش متعاطف خالص مع
هذا الناظر.. قصدي الوزير اللي ما كانش مفترض يطب كده على
المدرسه فجأة من غير ما يقول.. أمال بتوع الورد وأصارى الزرع
اللي بتتفرش في المدرسة يستغلوا إزاى؟ كده نقطع رزقهم. أصحاب
 محلات الفراشة اللي كنا هانجيب منهم السجاجيد المنقوشة يقعدوا
كده من غير شغل؟

سمعنا أن الناظر عيان وعنده ظروف وكان في التأمين الصحي
بي تعالج.. والله العظيم ألف مليون سلامه عليه.. ومن قلبي. بس
المصيبة مش في إنه الناظر جه متاخر، المصيبة هي ليه المدرسة عاملة
كده وليهانا ناظر مسئول عنها أيا كان اسمه أو سنه أو ظروفه الصحية؟

أنا شفت في المشهد تلاميذ عندها ألعاب مابتلعبش، وتلاميذ بتلعب ما عندهاش ألعاب. شفت تلاميذ قاعدة في فصل مش فصلها وشفت تلاميذ شايلة كتب مش كتبها.. كتاب مكتوب عليه «إبراهيم زغلول».. ولما اتسأل كتاب مين ده؟ قال: «بتابعي». طيب انت بقى اسمك إيه؟ قال أنا إبراهيم فاروق السيد.. أمال الكتاب ده بتاع مين يابني؟ بتابعي يافندم.. أنا مش عارف الوزير محبكها ليه!! الاسم اللي على الكتاب ده اسم مؤلف الكتاب.. أو جاييز يكون التلميذ ده عنده اسمين.. واحد ليه واحد للكتاب.. شفت مدرس بيذرّس كمبيوتر طلب منه يكتب جملة من ثلاث كلمات على الكمبيوتر. كتب منهم أربع كلمات غلط. أكيد الكمبيوتر غلطان! يعني هو الكمبيوتر هايكون أذكي من الإنسان اللي اختر عه؟ لا طبعا. يا سيادة الوزير بعد كده لما تحب تعمل زيارة مفاجئة لمدرسة ابقى قول قبلها، مش تروح فجأة كده، مايصحش.. ده الاستئذان واجب. خليةم يحطوا الورد ويفرشو السجاد.. ولو كانوا فاهمين إن ريحنة الورد هاتغطي على ريحنة الإهمال وإن نقش السجاد هايشغلك عن رؤية الأخطاء يقوا فهموك غلط.. اللي بيحصل في الأيام الغبرة ده ريحته تفوق كل روائح الورد ولا تنشغل عنه نقش السجاد حتى ولو كانت سجاد.. عجمي. يا أهل المدارس يا مدرسين كفاية كده. أنا عارف إن الفقر بيوجع والمرتبات مابتكمفيش، بس برضه المفروض تعرفوا إن الجهل بيوجع أكثر وخصوصاً لو كنت انت المتسبب فيه. الضمير الصاحي بيتعجب، بس غيابه بيذمر. مش عارف ليه بقينا بنزاعق واحنا غلطانيين. أقسم بالله العظيم لو كنت مكان ناظر المضرسة دي لكنت قدمت استقالتي فوراً بسبب الظلم، بس مش الظلم اللي اتظلمته.. لا.. لأنك

انت اللي ظلمت نفسك بظلمك لتلاميذ انت مسئول عنهم.. إزاي
تفكر في الظلم اللي حصلك وما فكرتش في الظلم اللي انت عملته؟
«مش للدرجة دي المبالغة».. كانت هذه الجملة التي كنت سأقولها
إذا كنت شاهدت هذا المشهد في أحد مشاهد الأفلام. ولكن مع
الأسف لم يكن هذا مشهدا في فيلم، ولكنه كان في مدرسة مصرية
حكومية لا تحتاج لوزير تربية وتعليم.. بل لوزير تنقية وتقليم.. يتنقى
الأخطاء ويدافع الخوف والقلق على جيل قادم لا بد أن يقللها..
فلتنقى وتُقلِّم.

تحية خاصة أرسلها لكل من الأستاذ الفاضل نزيه شمس الدين
ناظر مدرسة بنها الثانوية بنين، والأستاذ الفاضل سيد هلال وكيل
مدرسة بنها الثانوية بنين.. أحبيهما من كل قلبي وأقف لهما احتراما
وتبرجاً لعدم ظلمهم لي. أقف لهم احتراماً وفخراً على تربتي التي
سبقت تعليمي، التي لولاها لم تكن أسماؤهم محفورة في قلبي
وعقلي حتى بعد مضي أكثر من خمسة وعشرين عاماً.. ولن تُمحى
أبداً.

خليلك لثيم (*)

«خليلك لثيم» ..

جملة قالها لي شخص أحبه جدا وأسعد به عند رؤيته، ولا أشكك أبدا في حبه لي. ما يمتلكه من الخبرة الحياتية يجعلني آخذ جملته بعين الاعتبار وأفكّر فيها. قال لي جملته تلك سريعا بدون أي تفسير أو شرح أو حوار أو مناقشة، فقد كانت الظروف التي قال لي فيها هذه الجملة لا تسمح لي بأن أفهم منه المزيد عنها.. فقدر رأيته في سيارته و كنت في سيارتي نسيرا على كوبري ستة أكتوبر. أشار لي بيده التي وضعها على أذنه وكأنها موبайл وقال لي هاكلمك أفهمك. انتظرت حتى يرن موبايلي ولكن لم يرن، فكان علىي أن أعتمد على نفسي وأجمع معلومات عما تحمله معنى الكلمة اللؤم حتى أتبع منهجه. اتصلت بصديق لي معروف عنه اللؤم الشديد وقلت له أنا عايز أبقى لثيم لو سمحت.. أعمل إيه؟ وطبعا لأنه لثيم لم يخبرني! وقتها لم يكن أمامي إلا أن أدخل على الإنترنت لأبحث عن مبتغاي. أحضرت

(*) تم نشر هذه المقالة بتاريخ: ١٤ من إبريل ٢٠١٠

لاب توبى وكتبت الكلمة «اللئيم» في أحد المواقع، ظهر لي سؤال: «هل أنت لئيم؟»، لو كنت لئيماً لما طلب مني هذا الشخص أن أصبح كذلك. لم أستطع أن أتجاوز السؤال فنقرت فوقه بالماوس فوجدت الآتي:

أجب عن الأسئلة الآتية لتعرف إذا كنت لئيماً أم لا.

السؤال الأول: عندما تجد نفسك في مأزق في لحظة من اللحظات، من الممكن أن تخلص من هذا المأزق لو أوقعت طرفاً ثالثاً في المشكلة، لكن هذا الطرف الثالث كان قد طلب منك عدم ذكر اسمه في الموضوع بصفة عامة.. هل:

أ- تضحي بالطرف الثالث من أجل مصلحتك أنت؟

ب- لا تذكر اسمه مهما كانت الظروف؟

ج- تشير إلى وجود شخص ثالث في الموضوع دون تحديد اسم؟

السؤال الثاني: هل أنت محظوظ في وسط الجماعة التي تحيط بك في مجال أسرتك أو عملك؟

أ- لا.

ب- نعم.

ج- ليس من كل الأشخاص.

السؤال الثالث: رئيسك في العمل أشاد أمامك بجهد زميل منافس لك.. هذا الزميل لفت الأنظار بمجهوده وسرق الأنظار من كل من حولك بمن فيهم أنت شخصياً.. هل:

أـ- تشيد بمجهوده وتأكد أنه يستحق التقدير الكبير؟

بـ- تلتزم الصمت؟

جـ- تشيد أنت الآخر بمجهود هذا الزميل، ولكنك تقول إن هناك من يساعدك في هذا التفوق، مجهول لا يعرفه أحد؟

السؤال الرابع: عندما تشعر بالغيرة من زميل لك في أي مجال..
هل:

أـ- تحاول قدر الإمكان أن تعطل هذا الزميل بإطلاق الشائعات حوله.. وتسفيه كل ما يقوم به؟

بـ- تكتفي بأن تقول عن نفسك إنك مهضوم الحق؟

جـ- تلتزم الصمت؟

السؤال الخامس: هل تعيش الأفلام البوليسية التي تعتمد على الخطط وكشف الألغاز في أحداثها؟

أـ- لا.

بـ- نعم.

جـ- أحياناً.

السؤال السادس: هل تُغير نبرة صوتك من حين لآخر حتى لا يعرف عليك من يتصل بك.. وتحاول أن يكون صوتك غامضاً غير واضح للجميع؟

أـ- نعم.

ب - لا.

ج - أحياناً.

والآن أعط نفسك هذه الدرجات .. لكل حرف درجة معينة:

السؤال الأول: (أ - ثلات درجات) - (ب - درجة واحدة) - (ج - درجتان).

السؤال الثاني: (أ - درجة واحدة) - (ب - ثلات درجات) - (ج - درجتان).

السؤال الثالث: (أ - درجتان) - (ب - ثلات درجات) - (ج - درجة واحدة).

السؤال الرابع: (أ - درجة واحدة) - (ب - درجتان) - (ج - ثلات درجات).

السؤال الخامس: (أ - ثلات درجات) - (ب - درجة واحدة) - (ج - درجتان).

السؤال السادس: (أ - درجة واحدة) - (ب - ثلات درجات) - (ج - درجتان).

والآن اجمع نقاطك واعرف نفسك:

إذا حصلت على ١٨ - ١٣ درجة فأنت إنسان واضح جدا، لا تعرف معنى المكر في حياتك، الخط المستقيم هو الخط الذي تسير عليه في حياتك ولا تعرف معنى للطرق الملتوية، تخاف من الأشخاص الذين تعرف عنهم هذه الصفة وتحاول أن تتجنبهم بشتى الطرق ..

أنت إنسان صريح وطيب وعطوف جداً. تتحمس للمغلوب على أمرهم وتقف معهم بكل ما تستطيع من قوة. المهم أن تعرف أن هذا الأمر قد يعرضك لبعض المشاكل في بعض الأحيان ولكنك على أية حال قادر على مواجهتها.

أما إذا حصلت على ١٢ - ٧ درجات فأنت إنسان متوازن جداً في حياتك، تحب الخط المستقيم في التعامل مع الآخرين، ولكنك أحياناً تلتجأ للطرق الملتوية إذا شعرت أنها تجنبك المشاكل.. ولكنها في الوقت نفسه لا تورط أحداً في المشاكل، أو على الأقل تقنع نفسك أنها لا تضر الآخرين.. أنت إنسان ناجح في عملك وفي حياتك الأسرية.

أما إذا حصلت على أقل من ٧ درجات فأنت إنسان خطير، ماكر جداً، تعشق المؤامرات ولا يمكن أن تعيش يوماً دون أن تندمج في واحدة، أو أن تكون طرفاً في أخرى. من الضروري أن تعرف أن كل من حولك يعرفون عنك هذه الميزة ومضطرون للتعامل معك إما خوفاً أو تجنياً للمشاكل. ومن المهم أن تعرف أيضاً أنه في غياب المركز الذي أنت فيه فإن الكل سينفض من حولك.

طبعاً اختبرت نفسي وكانت النتيجة أنني نجحت بجاحداً ساحقاً وحصلت على نسبة ٩٩,٩٪ في امتحان اللؤم وعرفت أنني لثيم جداً ومن الدرجة الممتازة كمان. كان الموضع الإلكتروني أيضاً يتحدث عن اللؤم ذاته ولكن بشكل علمي وتحليلي لمعنى الكلمة.. مثل أن اللثيم هو الخائن والدئيء والسيء الخلق، وهناك من قال إن اللثيم هو المنافق والحاسد وسلبي اللسان والمتطفل والبخيل. ووجدت

المتنبي على الإنترنت يقول: «إذا أنت أكرمتَ الكريمَ ملكته.. وإنْ أنتَ أكرمتَ اللئيمَ تمرداً»... إلخ.

وغيرها من صفات لا أشك لحظة في أن هذا ما قصدته صديقي لأنني متأكد أنه يعني استخداماً دارجاً للكلمة ولا يقصد معناها التحليلي العلمي. ولكني وجدت موقعاً آخر يقول إن اللغة كائنٌ حي يتغير بفعل الزمن والمكان ويتماهى معهما، فهناك مفردات كثيرةٌ طرأ على مدلولاتها تغييرٌ مع طي الاستعمال، ففي شأن وصف «اللؤم» فأنا أفهمه بالمعنى الذي أصبح دارجاً في هذا الأوان. اللئيم كما أفهمه الآن في هذه الصيغة اللغوية - هو ذاك الذي يسوق أقواله وأفعاله الاعتيادية بغية تحقيق مأربٍ خفي يكون ظاهره السلام والعفوية، وباطنه التنبيط باللمز من أجل شيء آخر. ربما كان هذا الشيء شريراً فتكون لئيماً شريراً. مثل أن تقول لرجل أعمى إن السماء شكلها حلو قوي النهاردة، أو أن تتصحّر رجلاً فقيراً بالتصييف في فرنسا، وربما كان غرضك خيراً فعندئذ تكون لئيماً سياسياً.

أعتقد هذا الكلام هو ما أبحث عنه.. وكان هذا ما يقصدته صديقي.. كان يريد مني أن أصل إلى غايتي السليمة في الكلام بشكل غير مباشر.. بمعنى أن أضع السم في العسل.. وبعد أن وجدت السم واشتريت العسل.. سأبدأ مقالتي وأنا الآن في متنه اللؤم.. وطبعاً لأنني دلوقتي لئيم فمش هاقول إن الدستور بتاعنا لازم يتعدل، ولأنني لئيم مش هاقول إن التعليم بقى يقرف، ولأنني لئيم مش هاجيب سيرة العلاج والتمريض والمستشفيات إنها بقت حاجة تجib المرض، وطبعاً لأنني لئيم لؤم رهيب عمري ما هافكر أجيب سيرة أي وزير ولا مسئول ولا عضو

مجلش شعب أو شورى محتاجين جلسات كهربائية تفوقهم! ومن اللؤم طبعاً إني ماتكلميش عن النفح اللي بيحصل في الأقسام! ولا الشوارع المدغدة ولا الزباله المترمية، ولا هاتكلم عن الأخلاق اللي بقت زفت والقيم اللي اتشد عليها السيفون لا مؤاخذة! ولا هاجيب سيرة الضمير اللي اتعدم ومات وادفن، ولا هاتكلم عن شيوخ الفضائيات، ولا عن الشباب العاطل اللي بيفكر يتطرف ولا يدمّن ولا يتحرش. مش هاتكلم عن الزحمة. مش هاتكلم عن نقص الحدائق العامة والمنتزهات. مش هاتكلم عن التخطيط الغلط. مش هاتكلم عن الميغة والعزبة والقتة المحلولة. مش هاتكلم عن إن ما فيش حمامات عامة في الشوارع للأطفال والعواجيز ومرضى السكر. مش هاتكلم عن الأتوبيس اللي بيقف في نص الشارع ده لو وقف أساساً. ولأنني لثيم جداً مش هاتكلم عن الأسعار اللي بقت نار والرواتب التي لا تنموا، ولا هاعترف إن الحاجات الصعب قلت وال حاجات الغلط زادت. ولأنني لثيم جداً مش هاقولكم إني زورت في نتيجة امتحان اللؤم اللي عملته لنفسي وكذبت عليك وقولتلكو إني نجحت فيه بامتياز وبقيت لثيم!

إيه رأيك ماتجرب تمتحن نفسك.. بس خليك لثيم.. زبي.

اعتذار مؤقت (*)

قرأت كلاماً لقراء على موقع الدستور الإلكتروني يعلقون على حبهم لمصر جعلني سعيداً ومسروراً جداً. وجدت بين هذه الكلمات التي قرأتها إحساساً صادقاً يذوب عشقاً في حب مصر ويرغب في جعلها أحسن بلد في العالم.. ولم تكن هذه الأحساسات وحيدة في صدقها، بل كانت توأذنها وتؤازرها أحاسيس أخرى لكلمات أخرى شعرت فيها بجنون جامع لحلول تبحث عن الطريق الصحيح للتنفيذ. شعرت بحماس التصحيح فيها يبحث عن منفذ للخروج من دائرة ارتسم محيطها وتلون جوفها بخطوط الجهل وتكبير الدماغ السوداء.. هذه الدائرة السوداء إن ظللت تنظر إليها من بعيد فلن تراها إلا حفرة عميقه لا يظهر عمقها من شدة سوادها، فتخاف أن تذهب إليها حتى لا تسقط فيها، وإن كنت شجاعاً ومقداماً وتباحث عن الأفضل فاقترب منها ولا تخاف، كل ما عليك هو أن تتخاذل قراراً بطرد الخوف من الاقتراب، وعند وصولك لها لن تجدها إلا دائرة

(*) تم نشر هذه المقالة بتاريخ: ٢١ من إبريل ٢٠١٠.

سوداء مرسومة على الأرض ما أسهل أن تَعبر من فوقها بقدميك. وعندما تصل إليها وتعرف أنك كنت تخاف مما لم يكن يجب أن تخاف منه ستحزن وتبكي على كل هذا الوقت الذي أضعته وأنت تقف بعيدا خائفا من الاقتراب والسقوط في شيء لا يسقط فيه إلا من خاف منه وابتعد عنه، فهناك أمور كثيرة في الحياة نراها من بعيد وحشاً مخيفة.. وإن اقتربت منها ربما تجدها أشجارا كثيفة تتظلل بها. كانت هذه الكلمات التي قرأتها ما هي إلا تعليقات لبعض القراء جاءت على موقع الدستور الإلكتروني. وما سبق هو ما شعرت به في جوف هذه الكلمات الصادقة البسيطة التي تخلو من رغبة في شهرة أو زحف نحو أن تُقرأ أو دوران حول حلاوة معنى تُكتب به؛ لذلك وجدتها كلمات كُتبت بقلب بسيط وسُطرت بعقل يفكر في الأفضل.

بعد أن انتهيت من القراءة وجاء دور الكتابة. كتابة المقال، هذا المقال الذي جعلني أصل إلى «حقيقة» أخذت بسببها «قرارا». كانت «الحقيقة» التي وصلت إليها هي أنه لما يكون مطلوب منك تعمل حاجة وتلاقي نفسك بتعمل كل الحاجات إلا الحاجة اللي مطلوب منك تعملها، ساعتها اعرف أنك مش عارف تعملها أو أنك بتهرب من إنك تعملها. أنا بقى عملت حاجات كتير ما عدا كتابة المقال.. أكل وأكلت، شُرب وشربت، نوم ونممت، صحيان وصحيت، حموم واستحممت، لعب ولعبت، رغبي ورغيت، خروج وخرجت، ودخول ودخلت، تركيز وركزت، سرحان وسرحت، عملت كل حاجة إلا إني أكتب المقال المطلوب مني. كل ما أقدر أكتب أسرح في الورقة وسطورها، أقول جايز جعان، قمت كلت، وقعدت تاني أكتب لاقيت نفسي عطشان فقمت تاني وشربت ورجعت قعدت، كبس عليا النوم

فنمـت وصحيـت. كـتبت أول حـرف، حـرف من كـلمـة.. والله ما أـعـرف
هـاتـكون إـيه. كان حـرف «حـ». شـمـيت رـيـحة وـحـشـة جـنـبي. بـعـد بـحـث
وـتـدوـير وـشـمـ، طـلـعت رـيـحتـي! قـمـت استـحـمـيت وـاتـلـيفـت وـاتـبـرـفت
وـاتـنـشـفت وـلـبـست وـقـعـدت، بـصـيـت لـلـحـرـف وـحـطـيـت نـقـطـة جـواـهـ فـبـقـى
«جـ».. وـبـرـضـه مشـ عـارـف أحـطـ الـحـرـف دـه فيـ كـلـمـة إـيه!! ما أنا لوـكـنت
عـرـفـت أحـطـه فيـ كـلـمـة وـهـوـ «حـ» كـنـت عـرـفـت أحـطـه وـهـوـ «جـيمـ».. طـيـبـ
يـاتـرـى هـابـدـأـ بيـهـ الـكـلـمـة وـلـاـ هـايـقـىـ فيـ نـصـها وـلـاـ فيـ آخـرـها؟ بـسـ أناـ
أـلـاقـيـ الـكـلـمـةـ الـأـولـ وـبـعـدـ كـدـهـ يـحلـلـهاـ أـلـفـ حـلـالـ. جـايـزـ لـمـاـ أـلـاقـيـ الـكـلـمـةـ
بـاقـيـ الـكـلـامـ يـظـهـرـ وـالـمـقـالـةـ تـطـلـعـ. قـعـدـتـ وـفـكـرـتـ تـانـيـ وـتـالـتـ وـرـابـعـ
وـعـاـشـرـ لـحـدـ مـاـ زـهـقـتـ. مـسـكـتـ مـحـمـولـيـ وـرـغـيـتـ شـوـيـةـ رـغـيـ مـالـوـشـ
أـيـ لـازـمـةـ.. قـعـدـتـ تـانـيـ بـسـ قـمـتـ.. اـتـخـنـقـتـ فـخـرـجـتـ شـوـيـةـ أـشـمـ هـوـاـ
وـرـجـعـتـ. قـعـدـتـ تـانـيـ أـفـكـرـ وـأـفـكـرـ لـحـدـ مـاـ سـرـحـتـ.. عـدـىـ وـقـتـ وـمـنـ
بـعـدـيـهـ وـقـتـ وـأـنـاـ مـاـ كـتـبـتـشـ غـيـرـ حـرـفـ وـاـحـدـ اـتـحـولـ لـحـرـفـ تـانـيـ بـنـقـطـةـ..
وـلـمـ يـكـنـ الـمـجـهـودـ الـذـيـ بـذـلـتـهـ فيـ تـحـوـيلـ الـحـرـفـ أـكـثـرـ بـكـثـيرـ مـنـ مـجـهـودـ
تـحـرـيـكـ الـقـلـمـ عـلـىـ الـوـرـقـةـ لـكـتـابـةـ حـرـفـ آخـرـ.. كـانـ «سـ».. لـمـ أـكـتبـ
إـلـاـ حـرـفـينـ.. سـيـنـ وـجـيمـ.. لـمـ أـجـدـ مـفـرـاـ إـلـاـ أـنـ تـكـونـ السـيـنـ أـولـ حـرـفـ
لـكـلـمـةـ سـؤـالـ سـأـلـتـهـ لـنـفـسـيـ: هـاتـعـمـلـ إـيهـ فيـ الـحـيـرـةـ الـلـيـ اـنـتـ فـيـهـاـ دـيـ؟
وـلـمـ تـبـاطـأـ الـجـيمـ لـوـضـعـ نـفـسـهـاـ كـأـوـلـ حـرـفـ لـكـلـمـةـ جـوابـ رـدـيـتـهـ عـلـىـ
سـؤـالـيـ: هـاعـتـذـرـ، هـاعـتـذـرـ عنـ الـكـتـابـةـ. وـلـكـنـ قـبـلـ أـنـ يـكـتمـلـ اـعـتـذـارـيـ
بـآخـرـ حـرـوفـهـ أـحـبـ أـنـ أـرـدـ عـلـىـ سـؤـالـ لـفـتـ نـظـريـ منـ أـحـدـ التـعـلـيقـاتـ
الـتـيـ قـرـأـتـهـاـ عـلـىـ مـوـقـعـ الدـسـتـورـ الـإـلـكـتـرـوـنـيـ لأـحـدـ الـقـرـاءـ كـانـ يـقـولـ:
لوـ سـمـحـتـ عـاـيـزـ تـعـلـيـقـيـ دـهـ يـتـشـرـ، عـاـيـزـ حـدـ يـجاـوـيـنـيـ وـيـقـولـ لـيـ
مـينـ أـحـمـدـ حـلـمـيـ؟

قرأت أيضا إجابة عن هذا السؤال من أحد القراء وكانت كالتالي:

ما فيش حد هايعرفك مين أحمد حلمي إلا أحمد حلمي نفسه.

فكان عليّ أن أرد وأجيب السائل وأقول له: «أنا يا عزيزي شخص
كان مطلوب منه يعمل حاجة.. فعمل كل حاجة إلا الحاجة المطلوب
منه يعملاها.. وذلك يقتلني.. من أجل ذلك أعتذر عن الكتابة وأترك
مكاني لآخر لا يأكل ولا يشرب ولا ينام ولا يستيقظ ولا يستحم
ولا يتليف ولا يتنشف ولا يرغي ولا يخرج ولا يدخل ولا يسرح
هربا مما طلب منه.. أعتذر».

قسم معالجة الكتب

مجلة الإبتسامة

زين العابدين

تم المسح الضوئي بواسطة :



www.Facebook.com

Arabic.Books

تقديم نفسك بالكتب القديمة

جروب الفيس بوك للأدب العربي والتراث العربي والروايات العربية

**الشجر لأسرة ثقافة نفهم
لرفعها الكتاب
نعت المعالجة في مجلة الابتسامة
زين العابدين**



www.Facebook.com/
Arabic.Books

لقف نفسك بالكتب الجيدة

جرب المثلكم للاع مهد الله عن تروره بالسلسلة الموقعة



اسمي أحمد محمد حلمي عواد، اتولدت في مدينة بنها بمحافظة القليوبية يوم ١٨ نوفمبر سنة ١٩٦٩. اتخرجت سنة ١٩٩٣ من المعهد العالي للفنون المسرحية - قسم الديكور. اشتغلت في الدعاية والإعلان، وبعد كده اشتغلت مذيع في القناة الفضائية المصرية في برنامج أطفال اسمه «لعب عيال»، اللي كان السبب في إني اقف قدام كامييرات السينما في أول دور سينمائي في فيلم «عبد علو الحدود».. وتتوالت الأدوار بعد كده. نصي الثاني هو زوجتي الرائعة مني زكي، ونصي الثالث بنتي لي لي.. اللي بتقول لكم: يا رب الكتاب يعجبكم يا جماعة.. يا رب.

أحمد حلمي

يا رب الكتاب يعجبكم يا جماعة.
للس أحـد كـلمـي

جميع حقوق المؤلف المادية عن هذا الكتاب يتم التبرع بها لجمعية ألوان وأوتار.
لمزيد من المعلومات عن أنشطة الجمعية يمكن زيارة هذا الموقع:

www.alwan-awtar.org

ISBN 978-977-09-3099-1



9

789770930991

دار الشروق
www.shorouk.com